

EL SANTO EVANGELIO SEGUN SAN MATEO

Jesucristo i ñiinda amei

1 ¹ Ñ nderi Jesucristo i ñiinda ã. David rei ei tuchi. Abraham abe no. ² Abraham nderi Isaac ndu. Isaac nderi Jacob ndu no. Jacob nderi Judá ru no. Judá nongue abe ru. ³ Judá rei Fares ndu. Zara ru abe no. (Tamar rei ùquĩsi.) Fares nderi Esrom ndu. Esrom nderi Aram ndu. ⁴ Aram nderi Aminadab ndu. Aminadab nderi Naasón ndu. Naasón nderi Salmón ndu. ⁵ Salmón nderi Booz ndu. (Rahab nderi esi.) Booz nderi Obed ndu. (Rut rei esi.) Obed nderi Isaí ru. ⁶ Isaí rei David ndu. David nderi ererecua. David nderi Salomón ndu. (Urías ninisi rei esi.) ⁷ Salomón nderi Roboam ndu. Roboam nderi Abías ru. Abías rei Asa ru. ⁸ Asa rei Josafat ndu. Josafat nderi Joram ndu. Joram nderi Uzías ru. ⁹ Uzías rei Jotam ndu. Jotam nderi Acáz ru. Acáz rei Ezequías ru. ¹⁰ Ezequías rei Manasés ru. Manasés rei Amón ndu. Amón nderi Josías ru. ¹¹ Josías rei Jeconías ru. Jeconías nongue abe ru. Ùquĩ ngue siqui abae judíos rerao mose Babilóniaa nda. ¹² Jeconías rei Salatiel ndu no. Salatiel nderi Zorobabel ndu. ¹³ Zorobabel nderi Abiud ndu. Abiud nderi Eliaquim ndu. Eliaquim nderi Azor ndu. ¹⁴ Azor nderi Sadoc ndu. Sadoc nderi Aquim ndu. Aquim nderi Eliud ndu. ¹⁵ Eliud nderi Eleazar ndu. Eleazar nderi Matán ndu. Matán nderi Jacob ndu. ¹⁶ Jacob nderi José ru. José quia María quereco nguiã. María rei Jesús si. Cristo, i equia ee.

¹⁷ Nyebe cator ce generaciones jaaja. Sã Abraham nane siqui no. David siqui mose, catorce generaciones cote. Abae judíos rerao mose Babilóniaa, catorce que aque abe mose cote ra. Cristo nyaacuquia mose que catorce aque mose cot e no nda.

Jesucristo nyaacuquia mose

¹⁸ Jesucristo chaacuquia tasenei na jêje. María rei esi. María que siquichõ nderi quia José ninisirã nda. Nyucuaaque ru eã ngue siqui rei ra.

Nguiirĩ ngue eteachõ ngué ye ra. Siquíã ndaque José rese. Espíritu Turã ae que eririĩ mondo erie ye ra. ¹⁹José turãte que eriqui rei ra. Eireĩte que eriqui mae María rio rese ra. —Seninisirã eã nda cote reae. Ahui rei ra esi mbia mbiiranua ndeae, i rei que ndua ndua uchi angui re ra. María siqui reĩ nguia emo ndese ee reaẽ. ²⁰José que ndua ndua quia erese ra. Ndua ndua mose que ángel mo ndu equé re cuu ra. Angel que ñee ee ra. —David riiriĩ ño nde re. María eisi turã ño neninisirã. iNdeireĩ ngúfã ño jê! Emo ngue siqui ãte quia erese ra. Espíritu Turã ae que eririĩ mondo erie ye ra. ²¹Nguiirĩ nda etea. “Jesús” ere chõ eririĩ je. Ae quia ra mbia sirõ tuchi eicuã si, i que ángel ñee José je cuu ra. ²²Eĩ nda Dios cheẽ io cote. Ae Dios cheẽ mbuchecuasa mbesa cose nae, ùquĩ nda io cote. ã ndei embesa ji ã:

²³ iSã jê! Nyucuaaque ruã nda nguiirĩ tea.

Emanuel, i ra eririĩ je.

Dios riqui nanderese co, i ñi Emanuel nde, i que embesa ji cose ra.

²⁴José que ñumumba cote ra. Angel cheẽ ndui si que María rerequia turã cote ra. ²⁵José que siqui eã mbei erese ra. Nguiirĩ ndea chee. Jesús i que José eririĩ je ra.

Mbia aquiatu nyoi Jesús itãquieĩ ndea

2 ¹Jesús que nyaacuquia Belén nda. Judea, i que hue ibi je ra. Herodes rei hue jenda mbia rerecua Jesús nyaacuquia mose. Mbia aquiatu mo ngue ngaẽ huee ra. Tenda semba si que ecuaẽ Jerusalén nda. ²Ûquĩ ngue ñee ngaẽ judíos je ra. —¿Mangue judíos rerecua mangue re? Ae nyaacuquia ramo nae ¿mangue mangue re? Uremae ngue nyasitata embae rese ra. Ureico mose ure récuua. Nyebe urechu nguiã erea co. Urecoi rã urenia ndese ñee ee. ¿Ma eriqui ma nde? i que mbia aquiatu ñee judíos je ra. ³Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ⁴Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra nyaacuquia” ¿i embesa ji re? i que Herodes ñee ee ra. ⁵Ûquĩ ngue ñee Herodes je ra. —Nyaacuquia ra Belén de Judea. I que embesa ji ra:

⁶ Sucha ñetē tuchi rei Belén.

Belén de Judea.

Mbia chiicua tuchi ra Belén cote.

Hue jenda mo nda mbia rerecuarã tuchi cote.

Ae ra serimba Israel jenda teaquiatu tuchi quia cote,

i que Dios cheẽ embesa ji ra, i que sacerdotes ñee Herodes je ra.

⁷Nyebe Herodes “jenyu” i nguiã ùquĩ mbia aquiatu je. Ñee ngue ùquĩ ísaa ra. —¿Manosete nyasitata embae rese jemaẽ nde? i que ñee ee ra.

⁸Herodes que ũquĩ mbia aquiatu mondochoĩ Belén cote ra. —Jĕso Belén. Nyaacuquia ramo je rese jĕirandu tuchi. Jĕ erea mose, sembiirandu se. Ĩ nda se abe aso mae erese. Ĩ nda acoi senia ndese se abe ñee ee, i rei que Herodes ñee ee ra. ⁹Mbia aquiatu que nyoĩ cote ra. Ae nyasitata rese eriqui mae nyii nae, aque nyasitata que oso bei quia mbia rĕta ra. Tiba que ee Belén arō cote ra. ¹⁰Nyebe mbia aquiatu ia tuchi nguiã mae mose nyasitata tiba rese cote. ¹¹Mbia aquiatu que ique tuchúaa cote ra. Huee que ãquĕ itãquieĩ ndiqui ee cote ra. Usi rese. María, i equia ee. Ngoi que ngũfã ndese eitãquieĩ je cote ra. Ñee turã ngue ee ra. Mbae que esirō mondo Jesús je cote ra. Oro. Mbae mbushimbusa abe no. Mirra abe no. ¹²Dios que ñee mbia aquiatu je cote ra. —Jĕsochĩ nda ñee Herodes mbiirandu jĕ, i que Dios ñee ee cuu ra. Nyebe echoĩ nguiã Herodes abi nguécuaa.

José nyoĩ uchã Egíptoo

¹³Aquere que Dio s ángel mo mondo ñee José je ra. Ñee ngue ee cuu ra. —Herodes ra eitãquieĩ sequia sequia. Iquia serĩte equia co. Jĕso uchã. Āquĕ jendao sunuña Egíptoo. Esi rese. Huee jĕingochō. Acheĕ jee ra ndeje huee, i que Dios ñee José je ra. ¹⁴José que ñumumba juã cote ra. Āquĕ ngue ecuruchoĩ isa usi rese ra. Nyoĩ que Egipto quiti ra. ¹⁵Chi arete que Egíptoo ra. Ererecua Herodes que mano cote ra. Dios cheĕ ngue ique cote ra. Eĩ ngue Dios cheĕ embesa ji ra:

Seriirĩ ngue aru Egipto sĩ ra,
i que embesa ji ra.

Herodes ãquĕ itãquieĩ iquia ja

¹⁶Herodes que paama i tuchi cote ra. —Mbia aquiatu sembiirĩ irĩ ñochĩ. Nyebiã ñochĩ ecuaĕ ñee seje, i que ra. Nyebe que soldados mondo mbia riiirĩ nacuĕ iquia ja cote ra. Āquĕ itãquieĩ ngu e eiquia iquia ja quia Belén jenda ra. Hue rurubinda ja abe no. Ngata ramo je abe iquia ja. Nyasitata nyecua quia mbia je nae, aque mosenda ãquĕ itãquieĩ iquia ja. ¹⁷Herodes ũquĩ iquia mose que Dios cheĕ ique cote ra. Ae Jeremías mbesa quia:

¹⁸Mbia Ramá jenda nyeseo tuchi.

Eya eã tuchi nguiirĩ ndese.

Emo embia aroneãte.

Eriirĩ nguiã mano jate nguiã ee, i que embesa ji ra.

¹⁹José chi mose Egipto que Herodes mano nyee ra. Nyebe Dios ángel mo mondo nguiã ñe e José je. ²⁰—José, echumumba rã. Jĕso Israel cote. Āquĕ abe erao. Esi rese. Ae ãquĕ iquia serĩte quia nae, ũquĩ ngue mano cote ra, i que ángel ñee José je cuu ra. ²¹José que ñumumba cote ra. Nyoĩ que nyebi Israel quiti cote ra. Āquĕ ngue equerao esi rese ra. ²²Herodes

riirĩ ngue siqui Judea jenda rerecuarã cote ra. Arquelao, i que ee ra. José jirandu mose erese que esiquiche cote ra. Oso sereãte que huee cote ra. Dios que ñee ee cuu ra. Nyebe esi nguiã Galilea cote. ²³Sucha tubiriã mo ngue chi Galiléaa ra. Nazaret, i que hue je ra. José que nyoĩ bei hue, hue jendarã cote ra. Nyebe Dios cheẽ mbesa ji ique nguiã cote. Ñ ngue Dios cheẽ nda: Nazaret jenda ra Jesús, i que Dios cheẽ nda.

Juan el Bautista Dios chẽ senei senei

3 ¹Emo mose que Juan el Bautista Dios cheẽ nenei nenei mbia je cote ra. Dios cheẽ ngue esenei senei nguia mbia je turúquiaa ra. ²—Jendua si jëicuã ndese. Jendua si Dios rese. Dios ra tu mbia rerecuarã tuchi cote, i beite que Juan nguia ñee nda. ³Sã Isafas embesa nyii no: Emo ndiqui ñeemombo mombo turúquiaa huee.

“Sã emo ndiqui ñeenda mbuquiche no, eĩ jenyee si chõ nguia jẽ abe icoquiato nandererecua je”, i equia turúquiaa hue, i que Isafas embesa ra. Juan nii si que embesa ra. ⁴Quiicuã mbuaera chõ ngue Juan irao ra. Mbae ire chõ ngue enumbicuasa no nda. Tucu mbuae chõ ngue eu quia no nda. Irao quiaa riinda abe. ⁵Jerusalén jenda que ngaẽ ngaẽ tuchi quia echeẽ andu ra. Judea jenda abe no. Ama Jordán nimia nduinda abe no. ⁶Mbia huicua nenei nenei mose Dios je, uquĩ mose que Juan ndiqui bautizar i ee ra. Ama Jordán ye.

⁷Fariseos tubiriã abe que ngaẽ ngaẽ tuchi quia Juan ndea ra. Saduceos tubiriã abe no. Juan ngue ñee asite uquĩ je ra. —Mbei rã ño jëingo nguiã ã. Mbae icuã nda tu mbia je nae, ¿uquĩ nii ño jenyu quia uchã serea co re? ⁸Jẽ mbae icuã ndecha mose Dios je, mbae turã jesaã saã mbei quiatu quia ee cote. ⁹“Abraham ndiirĩ nducucha chõ nande re. Nyebe ra Dios nandemingo bei” ijenyechĩ nda jẽ! Dios Abraham ndiirĩ nducucha chao arõte raque sita je. ¹⁰Ira rã si chõ mbia riqui nguiã ã. Sã ira mo ndiqui ia turã no. Sã emo ndiqui ia eã no. Aque quia ra mbia maña cote. Erei sacua. Eĩ serĩ serĩ ño Dios nguiã mbia je co, mbia mbae turã naa eã mose.

¹¹I je chõ aico nguiã bautizar i mbia je co. Jẽ ndua ndua si mose Dios rese. Co chi emo ndu quia serui co. Ae quia equirãcuã tuchi sesi re. Ae quia eturã tuchi sesi re. Ae quia ra bautizar i mbia je Espiritu Turã je. Mbia chiã mbitirõ sacua. Sã tata riqui mbae mbitirõ no. ¹²Ae ra mbia umbae miĩ icúe. Eturã achõ ño embae re. Ae embae eã nae, uquĩ nda eséi cote. Uquĩ ndeisa ra ua eã mbei tata. Sã mbia quiata a chiqui chiqui no. Sã ea miĩ icúe no. Sã echuruique mombo tátaa no, i que Juan ñee mbia je ra.

Juan bautizar i Jesús je

¹³Jesús que tu Galilea si cote ra. Tu que Juan ndea Ama Jordán nda. Juan bautizar i sacua ee. ¹⁴Juan ngue teã teã ndei ee ra. —¿Mañi ae ra bautizar i ndeje re? Nde chõ bautizar ere seje ae, i rei que Juan ñee Jesús

je ra. ¹⁵Jesús que ñee ee ra. —Bautizar ere rei seje. Dios cheẽ ndui si mbae nandesã turã ja quia, i que Jesús ee ra. Juan ngue eno i chee ee ra. ¹⁶Juan ngue bautizar i ee ra. Jesús que usẽ oso ama si cote ra. Ibei que nyiequia ee cote ra. Espiritu Turã ngue nguichi nyurushi rã nda. Nguichi que eu Jesús rese ra. ¹⁷Ibei jenda que ñee nda. —Seriirĩ ño co re. Sechesequa chõ co re. Seyate erese, i que Dios ñee Jesús je ra.

Jesús tambiicuã, i raque Satanás

4 ¹Turúquiaa que Espiritu Turã Jesús rerao ra. “Tã tae Jesús je”, i sacua diablo Jesús je. ²Huee que Jesús riqui arete ra. Cuarenta días. Mbae mo ngue eu eã mbei aque mose ra. Eriãcuãte que cote ra. ³Aque mose tuchi que diablo si ee ra. Embiicuã sacua. —Nde Dios riirĩ mose, mbichae esaã ã sita je. Ñ nda ereu, i rei que diablo ñee ee ra. ⁴Jesús que ñee ee ra. —Tei. Sã embesa ji ñee no: “Mbia chiũ achõ nda mbia mingo eã. Dios cheẽ nguia ra mbia mingo nguia”, i que embesa ji ra, i que Jesús ee ra. ⁵Aquere que diablo ererao Jerusalén nda. Querao que suruchui ibate Dios chuchua arõ nda. ⁶Ñee ngue Jesús je ibate ereco mose ra. —Nde Dios riirĩ mose, eo oso íbii no. Dios ra ndereaquiātu. Sã embesa ji riqui i ñee no:

Dios ra ángeles mondo ndereaquiātu sacua.

Oje ra ndeisi. Nembuquichi mingue rae.

Sita ra cua iã ndei je,

i que embesa ji ra, i rei que diablo ñee Jesús je ra. ⁷Jesús que ñee diablo je ra. —Sã embesa ji ñee no: “Ma Dios sereaquiātu. Tã tae ee no’, jenyechĩ nda Dios je”, i ñi Dios cheẽ nde, i que Jesús ñee diablo je ra. ⁸Aquere que diablo ererao ibi ibate mo nda. Ibate tuchi ererao cote. Diablo que ibi teacuquia ja ee ra. Ishonda abe reacuquia ja ee. ⁹Diablo que ñee ee ra. —Sembae ja chõ ibi re. Ibi turã ja. Ndeico mose serese, tamondo ja ndeje. Serimbarã mose nde, tamondo ja ndeje, i rei que diablo ñee Jesús je ra. ¹⁰Jesús que ñee ee ra. —Quiatúae sesi ae, Satanás. ¿Mañi nda se nderimbarã nde? “Dios ae rese chõ jeingo”, i que embesa ji ñee ndesẽ, i que Jesús ee ra. ¹¹Diablo que oso erecha cote ra. Angeles que ngaẽ Jesús reaquiātu cote ra.

Jesús mbia mbaaquiātu quiātu ramo

¹²⁻¹³Aque mose que mbia rerecua Juan tarõ cárcel nda. Jesús jirandu mose etarõ ndese que esi Galilea cote ra. Nazaret, i que sucha tubiriã je ra. Aquere que esi siri Capernaum cote ra. Ama ndisha ji. Zabolón abe ji. Neftalí abe ji. Huee que Jesús si siri ra. ¹⁴Isaías chimbesa Dios cheẽ ngue ique cote ra. Jesús siqui mose huee. Eĩ ngue Isaías embesa cose ra:

¹⁵⁻¹⁶Mbia hue jenda ja que siqui itondáruu nyii ra.

Zabolón jenda. Neftalí jenda.

Ama ndisha ji jenda.

Ama Jordán ndobeinda.

Ae judíos eã Galilea jenda nae, ũquĩ abe no.

Ũquĩ mbia que siqui ja rei itondáruu nyii ra.

Nyaashĩ ngue tu ee cote ra,

i que Isaías embesa ra. ¹⁷Aque mose bei chõ ngue Jesús riqui ñee mbia je cote ra. —Jendua si Dios rese. Mbia rerecurã tuchi ra Dios namo jiri, i que Jesús quia ñee mbei mbia je cote ra.

Jëingo serui, i Jesús uchimbaaquiaturã je

¹⁸Emo mose que Jesús si quia ama nimia ndui ra. Ama Ndisha Galilea. Huee que mae Simón Pedro rese ra. Enongue rese abe que mae nda. Andrés, i equia ee. I que eu sira mbuasa mondo mondo ii ra. Sira resenda bei rei ũquĩ. ¹⁹Jesús que ñee ee ra. —iSerui bei chõ jëingo jë! Taembaaquiatu quiatu. Mbia teendu endu bei quia seje cote, i que Jesús ee ra. ²⁰Nyoi ja que erui ra. Sira mbuasa si que echoi hui ra. ²¹Pe jiri que mae Jacobo rese ra. Enongue rese abe. Juan, i equia ee. Eru abe que siqui erese ra. Zebedeo, i equia ee. Huee que echĩ ja canoa ye sira mbuasa mbitirõ tirõ nda. —Jëingo serui, i que Jesús Jacobo je ra. Juan je abe. ²²Jesús cheẽ nduibe tuchi que echoi erui ra. Canoa ndecha. Ngu abe recha.

Jesús mbia tubiriã mbaaquiatu

²³Jesús que ngata tuchi quia Galilea rĩ nda. Mbia que embaaquiatu quiatu quia mbia chumunua nuásaa ra. Dios cheẽ turã ngue esenei senei nguia ee ra. Mbia rasi chumumbara que embucherõ cherõ nguia ra. ²⁴Mbia Siri a jenda que jirandu tuchite chee erese ra. Nyebe eriqui nguia erasi rurucuaẽ cuaẽ jate ee. Erasi chumumbara. Mbia aba checuayã nyireco abe no. Mbia quiachã quiachã je abe no. Mbia umi sayã je abe no. Jesús que embucherõ cherõ ja quia ra. ²⁵Mbia tubiriã tuchi que siqui Jesús rui cote ra. Galilea jenda. Decápolis jenda abe no. Jerusalén jenda abe no. Judea jenda abe no. Ama Jordán ndobeinda abe no. Uquĩ jenda siqui ja Jesús rui.

Jesús mbia mbaaquiatu quiatu ibi ibate

5 ¹Mbia tubiriã ngu e chi Jesús rese ra. Nyebe Jesús nyui nguia ibi ibate mo ndese ra. Ngoi que huee ra. Echimbaaquiatu que esiichã ngaẽ nda. ²Jesús que embaaquiatu quiatu ra.

Ae eyate riqui

³Eĩ ngue ñee ee ra:

—Ae siqui mingue quia nae, eya chõ ũquĩ nde. Ũquĩ nda siqui Dios rese.

⁴Ae nyeseo quia nae, eya chõ ũquĩ nde. Dios ra embia tuchi.

⁵Ae eseteâte riqui nae, eya chõ ũquĩ nde. Ibi ja ra embae cote.

⁶Ae siqui turã sete quia nae, eya chõ ũquĩ nde. Dios ra embucuata turã nguia.

⁷Ae eya eâte riqui mbia rese nae, eya chõ ũquĩ nde. Dios ia eâte ra ũquĩ ndese.

⁸Ae echiã turâte riqui nae, eya chõ ũquĩ nde. Ũquĩ nda mae Dios rese.

⁹Ae mbia mingo turã nguia nyiese nae, eya chõ ũquĩ nde. “Seririĩ” i ra Dios ũquĩ je.

¹⁰Mbia icuã icuã mose jëturã je, jëya tuchi rae. Jenderecua tuchi chõ Dios riqui nguĩã co.

¹¹Mbia ñee icuã mose jëje seriĩ, jëya tuchi rae. Mbia icuã icuã mose jëje seriĩ. Mbia ñee ñoño mose jeniĩ, jëya tuchi rae. ¹²Jeñimbia chõ nguia ũquĩ mose. Dios quia ra mbae turã tuchi mondo jëje ibate. Mbia icuã icuande jëje nyii. Eĩ ngue mbia icuã icuã nguia Dios rimba je nyii no nda.

Tata rendi rã ndei Dios quiato

¹³Embiquesa rã ño jëingo nguĩã mbia je ã. Sã embiquesa turâte no. Eise quiachamba mose, eicuã tuchi ra cote. Mbia ra emombo chõ cote. Mbia ra irõ ño erese. ¹⁴Tata rã ño jëingo nguĩã mbia Dios quiatoã je ã. Mbia sucha cuasu raã mose ibi ibátee, mbia ra mae ja erese. ¹⁵Sã nandeico lámpara mendi no. Sã nandeico eati eã no. Sã nandeico emii eã mbaequi re no. Erendi checua chõ nda nandemii nguĩã. Mbia resae ja sacua. ¹⁶Eĩ jenye si chõ nguia tata turã na. Mbae resae turã mbia je. Eĩ jenye mose ra mbia mae jëturã ndese. Ñee turã nda jendu ibatenda je cote.

Jesús mbia mbaaquiato quiato Moisés chimbesa riĩ

¹⁷Dios cheẽ ique ja sacua ño achu nguĩã co. Moisés cheẽ mbutiã sacua eã ño ngue achu nguĩã. Dios cheẽ mbuchecuasa cheẽ mbutiã sacua eã ño ngue achu nguĩã. ¹⁸Tacheẽ nyecua jëje. Moisés cheẽ nda ique ja. Ibei ra ua. Ibi abe ra ua no. Moisés cheẽ nguia ra ua eã mbei. Ique ja chee rae. ¹⁹Dios cheẽ tubiriãte raque mbia je, mbia echeẽ mumbayã sacua. Emo echeẽ mii mumba mose, Dios biãte ra ũquĩ, Dios siqui mose ererecuarã tuchi cote. “Dios cheẽ mii emumba”, i mose emo, Dios biãte ũquĩ. Ae echeẽ mumbayãte quia nae, Diosbi tuchi chõ ũquĩ nde. Ae ñee nguia mbia je nae, “Dios cheẽ jemumbayã ja” i quia mbia je nae, Diosbi tuchi chõ ũquĩ nde. ²⁰Tacheẽ nyecua jëje. Fariseos uturã saã saã tuchi raque. Embesasa abe uturã saã saã tuchi raque. iJë nguia jëingo turã tuchi ũquĩ si jë! Jë jëingo turã eã mose ũquĩ si, jëingo eã nda Dios rese, Dios siqui mose mbia rerecuarã.

Paama jenyechĩ nda emo je, i Jesús

²¹Amei ñee ngue jeñandu rei ra. “Mbia mo nda ereiquiachĩ. Nde mbia mo iquia mose, nde abe ra mbia ndeiquia arõte”, i rei que amei nda. ²²Se

quia tacheẽ nyecua jẽje. Jẽ paama i chooño mose jenongue je, mbia ra jeiquia arõte. “Ndeaquiatuã nde” jenyẽ mose jenongue je, mbia ra jẽiquia arõte. “Ndearacuayã nde” jenyẽ mose jenongue je, jẽso arõte ra tata cuasu. ²³⁻²⁴Nembae ofrenda rerao mose Dios je, endua rã nyii, emondo nonde ee. Ndenongue mo paama i mose ndeje, ofrenda esecha rã oso ñee ndenongue je. Jeñimbuturã na nguia nyii. Aquere quiatu eso nyebi ofrenda mee Dios je cote. ²⁵Emo mbia rerecua mbuqueta queta mose nderiĩ, ndeturã ño ee. Echeẽ turã ño ee. Jẽ ae chõ jeñimbuturã jenyue. Ñ nda ndererao icuã eã. Ndererao mose ra ndetarõ mbei cárceel. ²⁶Huee ra ereico bei. Nembae mondo ja tuchi chee ee.

Emo mae mose cuña mo osei osei, adulterio i ùquĩ je

²⁷Amei ñee ngue jeñandu rei ra. “Emo ninisi rese ra jẽingochĩ”, i rei que ra. ²⁸Se quia tacheẽ nyecua jẽje. Emo mae icuã mose cuña mo ndese, “aque rese nda aico raã ñã” i mose, ùquĩ abe eicuãte. Siqui raanguia erese chõ ùquĩ nde. ²⁹Nderesa mae mose mbae icuã ndese, echoo mombo. Nderesa nemingo serĩ mose mbae icuã nde se, echoo mombo. Coche nderesa miĩ eremombo nguia. Ñ nda nderete osoã tata cuásuu. ³⁰Ndeo nemingo mose mbae icuã ndese, echisia mombo. Coche ndeo mombo nguia. Ndequiatu cutinda raque. Ñ nda nderete osoã tata cuásuu.

Jeninisi ra jemombochĩ jẽ, i Jesús

³¹Amei ñee ngue jeñandu rei ra. “Emo ngüinisi mombose mose, sã emombo chõ. Papel mbesa ji emondo ee”, i rei que ameĩ nda. ³²Se quia tacheẽ nyecua jẽje. ¡Jeninisi ra jemombochĩ jẽ! Jeninisi siqui mose emo ndese, ùquĩ mose miĩ ño jeninisi jemombo arõte raque. Jẽ emombo chooño mose, jẽingo jeninisi mingo adulterio rese ùquĩ. Ae emombo ji quereco cote nae, ùquĩ abe eicuãte no. Adulterio, i chõ ùquĩ je re.

Jurar jenyẽ jirichĩ nda jẽ

³³Amei ñee ngue jeñandu rei ra. “Jurar jenyẽ mose Dios je, jeñee nda jembuchebichĩ ee”, i rei que ameĩ nda. ³⁴Se quia tacheẽ nyecua jẽje. ¡Jurar jenyẽ eã mbei tuchi jẽ! Ibei riĩ abe jurar jenyẽ eã jẽ. Dios recua chõ ibei re. ³⁵Ibi riĩ abe jurar jenyẽ eã jẽ. Dios ironguia chõ ibi re. Jerusalén niĩ abe jurar jenyẽ eã jẽ. Dios mbae tuchi chõ Jerusalén nde. ³⁶Jeãquĩ niĩ abe jurar jenyẽ eã jẽ. Jẽa miĩ mo jembushĩ aroneate. Co miĩ jemondei aroneate no. ³⁷¡Jurar jenyẽ eã jẽ! “Ae” jenyẽ chõ. “Tei” jenyẽ chõ. Ùquĩ miĩ ño jeñee. Jurar jenyẽ mose, eicuãte ùquĩ.

Emo icuã mose jẽje, jeturã ño ee

³⁸Amei ñee ngue jeñandu rei ra. “Emo nderesa mungue mose, nde abe aque resa emungue. Emo ndereĩ siquio mose, nde abe ereĩ esiquio”,

i rei que amei nda. ³⁹Se quia tacheẽ nyecua jêje. Mbae icuã nda jêsaächĩ mbia icuã je. Emo ucua mose nderitii rese, nderitii ribisho abe eteacuquia ee. ⁴⁰Emo demandar i mose ndeje, “nembae camisa emondo seje” i mose, emondo chõ ee. Ndeirao nongue abe emondo ee. ⁴¹“Sembae mbae usi erao jiri seje”, i mose emo ndeje, peebe jiri erao ee. ⁴²Emo ache ache i mose ndeje, emondo ee. “Mbae mo prestar ere seje” i mose emo, emondo ee.

⁴³Amei ñee ngue jeñandu rei ra. “Ae eturâte riqui ndeje nae, echesequa erese. Ae ndeucuãyã nguia nae, nde abe eucuãyã” i rei que amei nda. ⁴⁴Se quia tacheẽ nyecua jêje. Echesequa chõ ndeucuãyãsa rese. Mbae turã esaã ño nguia ee. Ae ñee icuã nguia nderiĩ nae, echeẽ turã ño nguia nde ee. Ae eicuãte riqui ndeje nae, ùquĩ ñi eico ñee turã Dios je. ⁴⁵Eĩ jenyeye mose ra Ibatenda riiri turã tuchi jê. Dios quiarei eturã mbia ja je. Mbia turã je. Mbia icuã je abe no. Dios quiarei tenda mbusẽ turã mbei mbia turã je. Eicuã je abe no. Dios quiarei ama mbuchaaqui turã mbei mbia turã je. Eicuã je abe. ⁴⁶Ae eturâte riqui mbia jêje nae, ùquĩ achõ je jêturã mose, eicuãte ùquĩ. Mbia icuã abe mbae turã saãte uquiato achõ je. Eĩ jenyechĩ nda jê. ⁴⁷Jêquiato achõ je jeñee turã mose, aba biãte ùquĩ. Eĩ ño Dios quiatoã abe nguia ñee turã uquiato je. ⁴⁸Jê nguia jêingo turã mbei mbia ja je. Sã jendu Ibatenda turã mbei riqui no.

Mbae turã jêsaã nyecuayã ño nguia

6 ¹“Sã mbia mae ja sechiao turã ndese”, jenyechĩ nda mbae turã naa mose. Mbia résaa achõ nda mbae turã jêsaã saächĩ jê. Ùquĩ jêsaã saã mose ra jendu Ibatenda mbae turã mee eã jêje. ²Jêingo mose mbae mee mee mbaecha reã je, jemondo checuayã ño nguia ee. Mbia mbiirandu randu eã. Ae uturã saã saã nguia nae, ùquĩ na nda jêingochĩ. Dios ra mbae turã mee eã ùquĩ je. “Sã mbia mae ja sechiao turã ndese”, jenyechĩ nda jê. ³Mbae turã jêsaã mose, jêsaã mingue chõ. ⁴Mbae turã jêsaã nyecuayã ño. Jêingo mose mbae turã naa naa nyecuayã, Dios ae ra mae jêturã ndese. Ae quia ra mbae turã mee nyecua jêje cote.

Eĩ jenyeye chõ ñee Dios je, i Jesús

⁵Jeñee mose Dios je, jeñee mingue chõ nguia ee. Uturã naa naasa rã nda jêingochĩ. Ùquĩ ndiqui nyoĩ choi mbiásaa ñee sacuã Dios je ùquĩ. “Sã mbia mae ja serese secheẽ mose Dios je”, i equia ùquĩ. Mbia riqui mae jate raque erese. Dios quia ra mbae turã mee eã ee. ⁶Nde ñeese mose Dios je, nde ae chõ echeẽ nguia ee ndechuchúaa. “Sa mbia mae ja serese”, erchĩ nda jê. Nde a e chõ echeẽ nguia ee. Dios ae ra siqui nderese. Dios ae mbae icua ja nguia. Ae quia ra mbae turã mee ndeje cote.

⁷Nde ñee mose Dios je, hue rĩ beite ra ereicochĩ ñee ee. Eĩ ño Dios icuasa reã nguia ñee ndaque Dios je. “Hue rĩ urecheẽ mbei mose ra Dios

ureandu”, i rei nguiã. ⁸Ūquĩ na nda jẽingochĩ. Ae mbae ãte riqui jẽje nae, ũquĩ Dios icuate quia co. Jeñee nonde ee. “Mbae embu ure je”, jẽ i nonde ee. ⁹Eĩ jenyẽ chõ nguia ñee Dios je:

Paba Ibatenda, sã mbia ñee turã mbei quia nderiĩ.

¹⁰Mbia rere cuarã ja sacuã echu jei fbi.

Sã mbia ibatenda riqui siqui beite ndebi rese no.

Sã mbia ibi jenda abe riqui ndebi rese.

¹¹Ae ra ureu namo, ũquĩ embu rã urechiurã.

¹²Ae uresaã icuã icuã ndeje nae, ũquĩ embutiã ná uresi. Sã ureico tesarei mbia icuã icuã mose ure je no.

¹³“Mbae icuã jẽsaã” iichĩ nda emo ure je jẽ!

Urereaquiato bei quia mbae icuã si.

Nde miĩ ño mbia rerecuarã nde.

Nde miĩ ño ndequirãcuã nde.

Nde miĩ je mbia ñee turã sacuã mbei. Amén.

Eĩ jenyẽ chõ ñee Dios je. ¹⁴Mbia icuã icuã mose jẽje, jẽtesarei chõ esi. Eĩ jenyẽ mose ra Dios Ibatenda abe jeicuã mbutiã jẽsi. ¹⁵Jẽtesarei eã mose mbia icuã si, Dios abe ra jẽicuã mbutiã eã jẽsi.

“Sã mbia mae ja serese” jenyechĩ nda hui mose jenyiu si

¹⁶Jenyiu si jẽhui mose Dios je, “sã mbia mae jate seyayã ndese”, jenyechĩ nda ñee. Jendesa ia eã techĩ nda aque mose jẽ. Eĩ ño uturã naa naasa nguiã. Mbia nda mae ja rei nguiã erese. Dios quia ra mbae turã mee eã ee. ¹⁷Ndehui mose ndechiu si Dios je, ndeya chõ eico. ¹⁸Sã mbia jiranuã nderiãcuã ndese. Sã Dios ae jirandu nderiãcuã ndese. Dios quia mbae icua jate nguiã. Ae quia ra mbae mee ndeje cote.

Jembaerã ibatenda rese quia jẽingo ndua ndua

¹⁹“Mbae turã tamunua nu a sembaerã aa íbii”, jenyechĩ nda jẽ. Chicuaquiareĩ nda eu arõte. Emo embuquiachã arõte jẽsi. Eichoi arõ ndete no. ²⁰Ibate quia mbae jemunua nua jembaerã. Ibate quia ra chicuaquiareĩ eu eã. Ibate quia ra jembaerã ichoi eã mbei. Ibate quia ra emo embuquiachã eã jẽsi. ²¹Jembaerã chi mose ibate, Dios rese ra jẽingo ndua turã. Jembaerã chi mose íbii, ibi jenda miĩ ndese ra jẽingo ndua.

Nanderesa mbae resae nanderete je

²²Nanderesa quiarei mbae resae nanderete je. Nanderesa turã mose, nanderete abe ra oso turã. ²³Nanderesa icuã mose, nanderete abe ra oso icuã icuã no. Tat a rendi rã jẽingo bei. Ūquĩ mose ra jẽingo jiri jiriã itondáruu.

Mbae isiquia Dios quiato eã

²⁴Erimba miĩ mo siqui aronea ererecua nyeremo ndese. Ererecua nyeremo mose, huee ra erimba ererecua nongue ucuayã. Ererecua nongue

ra ebite. Eĩ si chõ mbia re. Ae ndua beite quia mbae isiquia rese nae, ùquĩ siqui aroneate Dios rui. Ae siqui beite quia Dios rese nae, ùquĩ nguiarei ndua eã jiri mbae isiquia rese.

Dios uquiato teaquiatu bei

25 “¿Mbae ra nandeu re?” jenyechĩ nda quicoi coi jẽ. “¿Ma tiru ra nandemingue re?” jenyechĩ nda quicoi coi no jẽ. Mbia chiũ ae ra mbia mingo eã. Mbia irao abe ra mbia mingo eã no. 26 Sã nguireĩ no. Mbae tiquiyã ndaque. Mbae ishao eã ndaque no. Mbae ruacuã eãte raque embae no. Dios ae quiarei embuquiaru quiaru bei. Jẽ nguiarei Dios queteamba tuchi nguireĩ si. Dios ae jembuquiaru nguiã jẽ no. 27 Mbi a ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbutiarõ nguiã. 28 “¿Ma tiru ra nandemingue re?” jenyechĩ nda pare pare i jẽ. Sã mbae uti no. Sã mbae uti turãte riqui no. Mbae ao ao eã ndaque. Ninyu mburirã ndirã eã ndaque. 29 Dios ae chõ mbae uti mbuturã nguiã. Mbae uti quiarei eturã jiri Salomón si. Salomón turãte raque. 30 Sã Dios quiata mbuturã no. Quiata mano jeite raque. ¿Mañi nda Dios jembirao eã jẽ nde no? ¿Mbaerã jẽingo Dios icuayãte re? 31 “¿Mbae ra nandeu re?” jenyechĩ nda pare pare i jẽ. “¿Mbae ra nandembei re?” jenyechĩ nda pare pare i jẽ. “¿Ma tiru ra nandemingue re?” jenyechĩ nda eno jẽ. 32 Eĩ ño Dios quiatoã nguiã. Jẽ nguia jendu Ibatenda tesareĩã mbeite nguiã jesi. 33 Jẽ nguia jẽingo tuchi Dios rese jenderecuarã. Sã Dios turãte no. Úquĩ na ño jẽingo. Úquĩ mose ra Dios mbae mee mee mbei jẽje. Jenyiurã. Jeñimbeirã abe no. Jẽiraorã abe no. 34 “Mbae tiã ñochĩ nda seje isamami nde”, jenyechĩ nda pare pare i jẽ. Isamaminda rese ra jendua nduachĩ namo jẽ. Namonda mi ndese jendua namo no. Isamami nguiatu jendua isamaminda rese.

“Eicuãte que co ra”, jenyechĩ nda emo nii

7 1 “Co que eicuãte ra”, jenyechĩ nda emo nii. “Jẽicuãte” iã nda Dios jẽje chã. 2 Mbia icuã mose, jeñeechĩ nda ee. Jẽturã mose ee, Dios abe ra eturã jẽje. Mbae jemee mee turã mbia je. Dios abe quia ra mbae mee tuchi jẽje cote. Jẽ embisẽ mee mose emo je, Dios abe ra embisẽ mee jẽje no. 3 ¿Mbaerã jẽingo “eicuã” i emo je re? Jẽ jẽicuã tuchi mose esi. “Mbae ñetẽ ndiqui nderésaa aque”, jenyechĩ nda emo je, jẽ mbae cuasu rerequia mose jendésaa jẽ nguiatu. 4-5 “Mbae turã ndese chõ jẽingo”, jenyechĩ nda jẽ jẽicuã mose jẽ. “Mbae ñetẽ tasirõ nderesa si”, jenyechĩ nda mbae cuasu siqui mose jendésaa jẽ. Jẽ nguia jẽturã jësã saã ñote nguiã aque. Jẽ nane nguia jẽturã ndiqui. Aquere quia jeñee emo mingo turã cote. 6 Sã mbia mo ndiqui perro rã si no. Teasu socoi quã rã abe no. Úquĩ nguiarei mbia icuã mbei Dios cheẽ andure. Dios cheẽ isi teã teã. Dios cheẽ jësenei eã ùquĩ je cote. Emo je quia jësenei cote.

Jeñee mose Dios je, mbae ra emondo jėje

7 Jeñee mbei mose Dios je, mbae ra emondo jėje. Jē mbae mo ndequia mose, jętea rae. Jē eiquesa mbuu mbuu mose, ũquĩ mose ra embuquiata jėje no. 8 Ae ñee mbeite quia Dios je nae, mbae ra Dios mondo ee. Ae mbae mo sequia beite quia nae, tea rae. Ae eiquesa mbuu mbuu quia no nae, equia ra ee no. 9 Jendiĩrĩ “mbichae embu seje” i mose, ¿sita ra eru mee ee re? 10 Jendiĩrĩ “sira embu seje” i mose, ¿mbei ra eru mondo ee re? 11 Mbia icuã nyee mbae turã mondo mondo quia nguiĩrĩ je ã. Jendu Ibatenda quia ra mbae turã tuchi mee jėje, jeñee mose ee. 12 Sã jęyate riqui mbia siqui turã mose jėje no. Eĩ jenye si chõ nguia siqui turã mbia je no. Moisés chimbesa tuchi chõ ũquĩ nde. Dios quiato cose ndare chimbesa ja chõ ũquĩ nde.

Eiquesa chumumbi

13 Eiquesa chumumbi rĩ ño jęso ique jē. Aque ñeenda oso quia tata cuasu nae, eicoĩ chõ aque re. Ae eiquesa ngasē nguia tat a cuasu nae, eicoĩ chõ aque no nde. Hue rĩ mbia tubiriã ndiqui nguiã ũquĩ. 14 Ñeenda nongue rui quiatu ngasē nguiã Dios je. Aque ñeenda quiarei echumumbi. Echumumbi chõ aque ñeenda iquesa re. Mbia mĩ mĩ ño siqui nguiã aque ñeenda rui. ũquĩ nguia ra Dios mingo bei.

Sã ira ae ia ae ae no

15 Ae Dios cheē senei ñooño nguia nae, aba mbiĩrĩ irĩsa chõ ũquĩ nde. ũquĩ ndei Dios quiato raã ñooño. Mbia mbiĩrĩ irĩsa Dios rĩĩ. 16 Sã ira ae e a ae ae no. Uva a rã eã nda nyu a ia no. Ea ae eno nde. Higo a rã eã nda isio rashĩ a no. Ea ae eno nde. 17 Eĩ si chõ mbia no nde. Mbia turã nda siqui mbae turã ndese. Mbia icuã nda siqui mbae icuã ndese no. 18 Ira turã mose, ea abe ra eturã. Nyiabi aronea. Ira icuã mose, ea abe r a eicuã no. Ei rã si ra ea. 19 Ira mo ia turã eã mose, nyisia rae. Mendi rae. 20 Dios cheē nenei neneisa chõ jęicua rã. Dios cheē ndui si eriqui turã mose, Dios quiato chõ ũquĩ nde. Dios cheē ndui eã mose, Dios quiato eã ño ũquĩ no nde.

Mbia ra ique ja eã

21 “Sererecua” i rei mbia tubiriã nguiã seje ã. ũquĩ nguia nda ique ja eã nguiã serécuaa. Ae siqui Seru Ibatenda cheē ndui nae, ũquĩ mĩ ño nda ique serécuaa. 22 Aque mose ra mbia ñee tuchi seje. “Jesús, ndecheē ngue urembuchecua checua tuchi quia mbia je resē. Aba checuayã ngue urejea jea tuchi quia mbia si nderĩĩ ndesē. Mbia mae sayã ngue ursaã saã tuchi quia nderĩĩ ndesē”, i tuch i rei ra mbia seje. 23 ũquĩ je ra acheē. “Co aico jęicuyã mbeite co resē. Jęso serecha. Mbae icuã aosa chõ jē nde”, ae ra ee.

Tuchua nyeremo

²⁴Ae siqui serese, ae secheẽ mumbayã nguia nae, ùquĩ nguiarei eturã tuchi. Tuchua ãtã aosa rã ño ùquĩ nde. Sã eaquiato mo tuchua ao sita turã arõ no. ²⁵Ama nyaaqui mose, amandi cuasu raque. Quiririã abe ichu ichu raque tuchu a je. Tuchua mbuquiata aroneate. Sita turã arõ nguia ngue uchuchu a ao nguia. Eĩ si chõ secheẽ mumbasa rẽ a nde. Tuchu a ãtã aosa rã si. ²⁶Ae secheẽ mumba quia eandu mose nae, eaquiata ña ño ùquĩ nde. Sã eaquiata mo uchucharã ao no. Aque quiarei ibi ribicoi tuchiã. Sita quiishĩ arõchi chõ uchuchua ao nguia. ²⁷Ama nyaaqui mose, amandi cuasu ee cote. Quiririã abe ichu ichu tuchua je. Aque quiarei iacuã mbucoi asi mondo. Eĩ si chõ secheẽ mumbasa re, i que Jesús ra.

²⁸Jesús que hui ucheẽ si cote ra. Mbia que nyuruira tuchi echeẽ andu ra. ²⁹Ererecua rã ño ngue eriqui nguia mbia mbaaquiato quiatu.

Jesús mbia leproso mbucherõ

8 ¹Jesús que nguichi ibi ibate si cote ra. Mbia cuabẽte que siqui erui ra. ²Emo ndasi que tu ee ra. Leproso, i que aque erasi je ra. Tu que ngoi ngũfã ndese ñee Jesús je ra. —Sererecua, nde sembucherõse mose, sembucherõ se, i que ñee Jesús je ra. ³Jesús que oco erese cote ra. —Echerõ cote, i que ee ra. Echeẽ mosebe que nyerõ nda. ⁴Jesús que ñee ee ra. —iErecheẽchĩ nda mbia mo je jẽ! Eso nderasiã ndeacuquia sacerdote je cote. Moisés cheẽ ndui si chõ mbae mo emondo Dios je. Eĩ nda mbi a jirandu nderasiã ndese cote, i que Jesús ñee ee ra.

Jesús soldado rerecua rimba mbucherõ

⁵Jesús que oso sucha tubiriã Capernaum cote ra. Soldado rerecu a mo ngue tu ñee ee ra. Capitán ngue ae ra. ⁶—Sererecua, serimba rasite riqui sechuchua huee. Erasi tuchi. Umi umi sayã tuchi, i que capitán ñee Jesús je ra. ⁷—Taso embucherõ, i que Jesús echeẽ mose ra. ⁸Capitán ngue ñee Jesús je ra. —Seicuãte aico co, Jesús. Sechuchua ra ereiquechĩ. Echeeño. Ndecheẽ achõ ño emondo serimba mbucherõ sacua. ⁹Se abe sererecua riqui co. Echeẽ amumba aroneate quia co. Se abe soldados rerecua aico nguia co no. Secheẽ abe emumbayãte quia co no. Eso, i mose, secheẽ mumbayãte no. Echu, i mose, secheẽ mumbayãte no. Se neẽ mose serimba je, secheẽ mumbayãte no. Ndequirãcuã na eãte raque se, i que capitán ñee Jesús je ra. ¹⁰Echeẽ andu mose que Jesús nyuruirate ra. Ñee ngue nguesenda je ra. —Tacheẽ nyecua jẽje. Capitán ndiqui seicua tuchite co. Seicua tuchite equia judíos mo si co. ¹¹Tacheẽ nyecua jẽje. Ae judíos eã emo jenda ja nae, ùquĩ tubiriã nda siqui Dios rese. Dios siqui mose mbi a rerecuarã. Ùquĩ tubiriãte ra quiaru turã Abraham ndese. Isaac rese. Jacob rese no. Judíos eã ndaque ùquĩ. ¹²Dios quia ra judíos mombo

itaicuee. Itondáruu. Huee ra nyeseo tuchi cote. Erasite ra huee cote, i que Jesús ñee judíos rii nda. ¹³Jesús que ñee capitán je cote ra. —Eso chõ ndechuchúaa cote. Ereico seicuate co. Nyebe ndecheẽ amumba eã nguia nderimba mbucherõ, i que Jesús ee ra. Jesús cheẽ mosebe que erimba nyerõ nda.

Jesús Pedro ninisi si mbucherõ

¹⁴Jesús que oso Pedro chuchua cote ra. I que Pedro chari rasi u nyaara ee ra. Eracu tuchi que ra. ¹⁵Jesús que oco ari o rese ra. Eracu que ti i cote ra. Ari que juã cote ra. Mbae que echao chao quia mbia chiurã cote ra.

Jesús mbia rasi chumumbara mbucherõ

¹⁶Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã quereco qui a nae, ñquĩ ndurucuaẽ tuchi Jesús je. Aba checuayã ngue usẽ usẽ nguia mbia si Jesús cheẽ mose ra. Erasi chumumbara que embucherõ cherõ tuchi quia ra. ¹⁷Ñquĩ mose que Isaías cheẽ io cote ra. Eĩ ño ngue Isaías embesa cose ra: “Dios rucucha que nandeicua sirõ nandesí ra. Dios rucucha que nanderasi sirõ nandesí no nda”, i que Isafas embesa ra. Ñquĩ ngue io cote ra.

Jesús rui taico, i raque emo

¹⁸Mbia cuabẽte que Jesús mamate ra. Nyebe Jesús ñee nguia uchĩmbaaquiato je. —Nyao rã sobei, i rei que ee ra. ¹⁹Aque mosete que embesasa mo ñee ee ra. —Taico bei nderese. Ndeso mose manguiti, se abe ra aso bei quia nderese, i rei que ñee Jesús je ra. ²⁰Jesús que ñee ee ra. —¿Mbae rasi ra eresaã saã serese re? Eoita quia ecua jiri re. Nguireĩ nguia equisa jiri no nde. Se quia sequisayã mbei re, i que Jesús ee ra. ²¹Echĩmbaaquiato mo ngue ñee ee ra. —Sererecua, sã paba mano na. Aquere quia ra aico bei nderui cote, i rei que Jesús je ra. ²²Jesús que ñee ee ra. —Sã mbia ataque chõ nderu chati. Eico chõ serui nde, i que Jesús ñee ee ra.

Jesús quiririã icuã icuã mbutiba; ama ndebera abe

²³Jesús que ua canoa ye cote ra. Uchĩmbaaquiato rese. ²⁴Ama ndiit e re mose que quiririã icuã icuã ndu ee ra. I rebera que ique ique tuchi quia canoa ye ra. Jesús que uque oso quia canoa ye ra. ²⁵Nyebe echĩmbaaquiato Jesús mumba nguia. —Urembaaquiatusa, echumumba. Ureraaro nã. Nandemanochĩ nda re, i que ñee Jesús je ra. ²⁶Jesús que ñee uchĩmbaaquiato u je ra. —¿Mbaerã jẽsiquichete riqui re? ¿Seicuyãte equia ã nde? i que Jesús ñee ee ra. Nyuruã ngue ñee asite quiririã je cote ra. Ama je abe no. Quiririã ngue ti i echeẽ mose cote ra. Ama abe. ²⁷Echĩmbaaquiato que nyuruira tuchi mae Jesús quiracuã ndese ra. —

Quiririã echeẽ mumbayã ñochĩ. Ama abe echeẽ mumbayã ñochĩ, i que ñee ñee nyue cote ra.

Jesús aba checuayã icuã jea

²⁸Jesús que ngasẽ ama ndobei cote ra. Gadara, i que hue ibi je ra. Amei mo nyeremo ngue ngaẽ ngasẽ Jesús je ra. Mbia raaque tãsa si chõ ngue ecuaẽ ngasẽ Jesús je ra. Aba checuayã icuã ño ngue siqui tuchi nguiã ùquĩ ñiangui re ra. Aba checuayã ño ùquĩ mbiicua tuchi nguiã. Nyebe mbia mo hue rurubiã mbei nguiã. ²⁹Ùquĩ ngue ñee asite cuaẽ Jesús je ra. —¿Mañi ere ra equia ure je re, Jesús? Dios rucucha chõ nde re. ¿Urembasi jei sacua ño erechu aa re? i que ñee tuchi Jesús je ra. ³⁰Chiasu socoi tubiriã ngue chi quiaru huee rurubi ra. ³¹Nyebe aba checuayã icuã ñee jate nguiã Jesús je. —Nde urejea mose mbia si, chiasu chiangui re ureso rã, i que aba checuayã ñee Jesús je ra. ³²—Eno, i que Jesús ee ra. Nyebe aba checuayã usẽ ja nguiã amei ñia si cote. Chiasu chiangui re que echoi ja ra. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda. ³³Chiasu raarõsa mundite que ra. Mae mose erese. Nyoĩ que mbia mbiirandu jate chiasu rese ra. —Jesús que amei mbucherõ nda. Aba checuayã ngue ejea esi ra, i que maesa erese ñee mbia ataque je ra. ³⁴Nyebe hue jenda nyoĩ ja nguiã ñee Jesús je. —Eso rã urerecha urerecua si, i jate que hue such a jenda ñee Jesús je ra.

Jesús emi sayã mo mbucherõ

9 ¹Jesús que ua canoa ye cote ra. Nyoĩ que sobei ra. Ngasẽ ngue uchuchúaa cote ra. ²Mbia que erasi mo curucuaẽ quisa ye ee ra. Emi sayãte que ae ra. —Erurucuaẽsa riqui seicua ùquĩ, i que Jesús ñee uchiangui re ra. Nyebe ñee nguiã emi sayã je. —Echimbias chõ, Echo. Ndechisaã mbae icuãambutia nguiã ndesi a, i que Jesús ñee umi sayã je ra. ³Embesasa que ñee nyue ra. —Jesús riqui Dios ibatenda raã naa ñochĩ co, i que ñee nyue ra. ⁴Jesús que ùquĩ ndua ndua icuate quia ra. Nyebe ñee nguiã ee cote. —¿Mbaerã jëingo ndua ndua icuã nde? ⁵¿Ma mbaranguiatuã eã jiri jëje re? ¿Mbia icuã mbutiã esi ere? ¿Mbia rasi mbucherõ ere no? ¿Ma mbaranguiatuã eã jiri jëje re? ⁶Dios rucucha rei se. Mbia chiao icuã mbutiã aquiatu chõ se re. Sequirãcuã tateacuquia jëje, i que Jesús ñee ee ra. Ñee ngue erasi je cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra. ⁷Emi sayã ngue juã asi oso ra. ⁸Mbia que nyuruira ja u mae emi sayã ngata rese ra. Mbia que ñee turã ja Dios quirãcuã ñii cot e ra.

—Serui bei eico, i Jesús Mateo je

⁹Mateo, i que emo je ra. Ae que impuestos isi isi bei quia mbia rerecua mbaerã nda. Jesús que ngasẽ ee cote ra. Ngoi que huĩ plata isi

isi impuestorã nda. —Serui bei eico, i que Jesús ñee ee ra. Ae Mateo juã oso nguiã erui. ¹⁰Emo mose que Jesús nyoï quiaru erese ra. Impuestos isi isiquia ata que chi quiaru erese huee ra. Echimbaaquiatu abe rese. Mbia icuã mo abe que chi quiaru erese no nda. ¹¹Fariseos que ñee icuãte Jesús chimbaaquiatu je ra. —¿Mbaerã Jesús riqui quiaru mbia icuãte rese re? i que ñee nda. ¹²Nyebe Jesús ñee nguiã ee. —Sã mbia rasiã ndiqui abambucherõsa requia eãte no. Sã erasi chõ ndiqui erequia no. ¹³¿Á embesa ji jëicuayãte re?

“Mbae mo jemee seje”, ae eã nguiã jêje co.

“Jëya eã ño mbia rese”, ae chõ nguiã jêje co,

i que embesa ji ra. Ũquï embesa ji jëicua jiri ae. “Jenyu seje”, aeã ngue u nguiã mbia turã je. Mbia icuã je chõ ngue achu nguiã “jenyu seje” i, i que Jesús ñee ee ra.

Jesús chimbaaquiatu hui ãte uchiu si

¹⁴Juan ñimbaaquiatu que ngasë ñee Jesús je ra. —Ure quia ureico nguiã hui hui urechiu si ã. Fariseos chimbaaquiatu abe hui hui quia uchiu si no. ¿Mbaerã ndechimbaaquiatu riqui hui ãte uchiu si ã nde? i que ñee Jesús je ra. ¹⁵Jesús que ñee ee ra. —Sã emo ndiqui ngüinisirã isi ramo no. Sã eresenda iate riqui quiaru erese no. Sã eriqui hui aroneate uchiu si aque mose no. Sã eru riqui mano emo mose no. Aque mose quiatu ra equiato hui uchiu si cote. ¹⁶Sã emo ndiqui tiru yasu miï aroneate tiru ima sorei rese no. Eyasu ra nyaacua quiata eima si. Soro icoi tuchi ra cote. ¹⁷Sã emo mbaeri rasi ramo nderecoquiatu eã eriru ima ye no. Mbae ire ima ye ererecoquiatu aronea ño ñene. Eri rasi ra ñimatã ño mbae ire ndoro. Eri ra uchë ja. Mbae ire abe mbiicuãte ra cote. Mbaeri yasu quia nda equerecoquiatu nguiã mbae ire yasu ye. Soroã sacuã, i que Jesús ñee ee ra.

Jesús Jairo riirĩ mbucherõ; ari mo abe mbucherõ

¹⁸Jesús cheë mose que judío rerecua mo ngasë ee ra. Jesús jii que ngoi ñee ee ra. —Qui seriirĩ si mano namote qui. Nyao rã erea. Ndeoco mose erese, quera si rae, i que ñee Jesús je ra. ¹⁹Jesús que juã oso erese ra. Echimbaaquiuiatu abe nyoï erese. ²⁰Ari rasi mo abe que oso quia mbia ite rĩ nda. Eruqui nda uchë mbei quia ee ra. Doce años nyee. Eruqui nda tibayã mbei ee ra. Ari que tu Jesús quite qiti eriichã nda. Jesús irao ai rese que oco cote ra. ²¹—Seoco mose Jesús irao rese ra acherõ, i nda ra. ²²Jesús que uba ñee ari je ra. —Coche ñene, Echo. Seicuate que se ra. Nyebe arembucherõ nguiã, i que Jesús ñee ari je ra. Aque mose tuchi que eruqui tiba ee cote ra. ²³Jesús que ngasë nyee judío rerecua chuchua ra. Mbia que nyeseo seo quia ãquë ndaaque rese ra. Mbia que irasei rasei eraaque tiquia nonde ra. ²⁴Jesús que ñee ee ra. —¡Qui jë! Jëso ja itaicuee.

Eriirĩ mano eã ño nguiã. Uque chõ ñene, i que ñee mbia je ra. Mbia que iquia iquia echeẽ mose ra. ²⁵Jesús que mbia mondo ja chee itaicuee ra. Oso que i que eraaque rea cote ra. Eraaque o que eisi ra. Quera si que cote ra. Nyuruã ngue cote ra. ²⁶Mbia hue jenda que jirandu jate erese ra. Jesús eraaque mbuquera rese.

Jesús eresayã nyeremo mbucherõ

²⁷Jesús que oso hue si cote ra. Mbia resayã nyeremo ngue nyoĩ eruĩ ra. Ñee mombo mombo que Jesús je ra. —iJesús! iDavid rucucha! iNdeyayã ño urerese jẽ! i que ñee Jesús je ra. ²⁸Jesús que oso ique tuchúaa cote ra. Ae eresayã nyoĩ nguiã erurubi. Jesús que ñee ee ra. —¿Sequirãcuã jembucherõ arõte rei nguiã jẽje re? i que Jesús ñee ee ra. —Ae, i que eresayã ñee ja ee ra. ²⁹Ae Jesús oco nguiã eresa rese cote. —Seicua mose ra jaembucherõ, i que ra. ³⁰Eresa que nyerõ ja ee cote ra. —Sã mbia jiranua serese, i tuchi rei que Jesús ñee ee ra. ³¹Eresayã ngue Jesús cheẽ mumba tuchi ra. Nyoĩ que mbia mbiirandu tuchi Jesús rese hue rĩ ja ra.

Jesús echeẽ nguiã mbucherõ

³²Jesús so mose que mbia echeẽ ngũã mo curucuaẽ ee ra. Aba checuayã icuã ngue siquĩ aque chianguĩ re ra. ³³Jesús que aba checuayã icuã jea esi ra. Echeẽ ngũã ngue ñee turã cote ra. Nyebe mbia tubiriãte chĩ nguiã nyuruĩra mae erese. —Emo ngue ũquĩ saã eã mbeite quia aa Israel ra, i que nyuruĩra jate ra. ³⁴Fariseos quiatu que ñee icuãte Jesús rĩĩ nda. —Satanás quirãcuã je chõ Jesús riquĩ nguiã aba checuayã jea jea mbia si co, i rei que fariseos ñee nda.

Jesús ia eã tuchi mbia tubiriã ndese

³⁵Jesús que nyoĩ sucha mbuchesea sea ja ra. Mbia mbaaquiātu quiātu ja ra. Mbia chumunua nuásaa jate. Dios cheẽ ngue esenei senei tuchi quia ee ra. Mbia rasi chumumbara que embucherõ cherõ nguiã ra. ³⁶Mbia rasi rasi tuchi que ee ra. Mbia ia eã tuchi que ee ra. Mbia quiachã je rã ngue ee ra. Sã oveja riquĩ quiachã jate eraarõ iriã no. Eĩ si chõ mbia nguiã Jesús je. Nyebe Jesús ia eã tuchi riquĩ nguiã erese. ³⁷Jesús que ñee uchimbaaquiātu je ra. —Secheẽ andusa reã ndei etubiriã jiri. Secheẽ nenei neneisa quia rei co mĩ jiri. ³⁸Jeñee nguiã Dios je. “Dios, ndecheẽ nenei neneisa mo emondo tuchi. Mbia mbiirandu randu sacuaã”, jenyẽ chõ nguiã Dios je. Sã mbaecha mbia mo mondo mbae a ireĩ ishao shao equiche mose no, i que Jesús ñee ee ra.

Jesús mbia doce irabo uchimbaaquiaturã

10 ¹Jesús que “jenyu” i uchimbaaquiātu doce je ra. Uquirãcuã ngue emee uchimbaaquiātu je cote ra. Aba checuayã icuã jea jea sacuaã

mbia si. Mbia rasi chumumbara mbucherõ cherõ sacuã abe no. ²Ã ño echimbaaquiatu ã nde:

Simón (Pedro, i abe que mbia quia ee ra.)

Andrés (Simón nongue rei Andrés.)

Jacobo (Zebedeo riirĩ ndei Jacobo.)

Juan (Jacobo nongue rei Juan.)

³ Felipe

Bartolomé

Tomás

Mateo (Impuestos isi isiquia rei Mateo.)

Jacobo (Alfeo riirĩ ndei Jacobo.)

Lebeo (Tadeo, i abe que ee ra.)

⁴ Simón el Cananista

Judas Iscariote (Aque que Jesús mondo mbia icuã je ra.)

Ûquĩ ja que Jesús irabo ra.

Jesús uchimbaaquiatu doce mondo ucheẽ nenei nenei sacuã

⁵ Jesús que ùquĩ mondo ja ucheẽ nenei nenei sacuã nda. Emondo nonde que ñee ee ra. — Judíos achõ jembaaquiatu quiatu quia. Jësochĩ nda judíos eã je. Samaria jenda chuchua abe ra jësochĩ. ⁶ Israel jenda chõ jembuchesea sea oso. Ovejas quiachã je rã ño Israel jenda re. ⁷ Jëso mose, secheẽ jëseni senei mbei quia ee. “Mbia rerecuarã tuchi ra Dios cote”, jenyee oso secheẽ nenei nenei judíos je. ⁸ Mbia ire rasi jembucherõ cherõ nguia. Mbia rasi chumumbara jembucherõ cherõ nguia. Mbia raaque abe jembuquera quera quia. Aba checuayã icuã abe jëjea jea quia mbia si. Sequirãcuã ngue amee ñooño jëje. “Mbae mo jemee na seje eribishorõ”, ae eã tuchi se quia jëje co. Nyebe jë abe mbae turã jësaã ñooño mbia je. “Mbae embu se”, iã mbia je. ⁹ Mbae mo nda jendaochĩ icua jëso mose. Mbae isiquia mo nda jendaochĩ icua. Mbae isiquia ñete mo nda jendaochĩ icua. ¹⁰ Mbae riru mo abe ra jendaochĩ no. Jëirao nongue abe ra jendaochĩ no. Jëiyao nongue abe ra jendaochĩ no. Jenyitochoquia abe ra jendaochĩ. Ae je ra mbae turã jësaã saã nae, sã ùquĩ ae riqui jembuquiaru quiaru turã mingo. ¹¹ Jengasë mose sucha tubiriã mo, mbia turã mo jëtea huee. Aque chuchua miĩ ño jëingo uque. Tuchua ra jembuchesea seate chĩ jëingo mose huee. Ae ra jengue nyii nae, hue tuchia bei chõ jëingo uque. ¹² Jëique mose emo nyuchúaa, hue jenda je jeñee turã no. Saludar jenyee turã ee no. ¹³ Hue jenda siqui turã mose, Dios quirãcuã jemee ee. Siqui turã eã mose, Dios quirãcuã jëisibe esi. ¹⁴ Hue jenda jëisi sereã nea mose, jëhui chõ esi. Hue jenda jeñee andu sereã mose, jëso chõ hue si. Jëi tubi jembutomo tomo ee. ¹⁵ Tacheẽ nyecua jëje. Ae ra jeñee isi sereã nae, ùquĩ nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ùquĩ nguia ra embasi tuchi Sodoma jenda si. Gomorra jenda abe si.

Mbia icuã icuã tuchi ra jêje, i Jesús

¹⁶A aico jemondo secheẽ nenei nenei sacuã mbia je a. Sã nyacua icuãte riqui oveja je no. Eĩ si ra mbia icuã icuãte jêje. Oveja seteã na ño jẽingo. IJëaracua chõ nguia jê! Sã mbei aracuate riqui no. Mbae icuã mo nda jësaachĩ jê. Sã nyurushi riqui mbae icuã naa eã mbeite no. ¹⁷I Sã jê! Mbia icuã icuãte ra jêje. Jembiĩrĩ irĩ ndae. Jemee mee icuã nda mbia rerecua je. Jëiruã nua nda mbia chumunuásaa. ¹⁸Mbia icuã icuãte ra jêje seriĩ. Mbia rerecua je ra jenderao icuã. Eĩ jenyee mbia rerecua mbiirandu randu seriĩ. Judíos eã abe mbiirandu randu seriĩ. ¹⁹Jemee mose mbia rerecua je, pare pare jenyechĩ nda jê. “¿Manyae ra ùquĩ ñee ndibishorõ nde?” jenyechĩ nda pare pare i jê. Dios ae chõ nda jembucheẽ turã nuiã nguia mbia je aque mose. ²⁰Jê ae ra jeñee eã. Espiritu Turã ae nda jembucheẽ nguia mbia je. ²¹Jenongue ra jemondo chee mbia icuã je. Jëiquia sacuã. Jendu abe ra jemondo chee mbia icuã je. Jendiirĩ abe ra jemondo chee mbia icuã je. Mbia icuã nda jemo iquia iquia chee. ²²Mbia ra jëucuyã jate seriĩ. Ae ra siqui bei serese, ùquĩ nda Dios mingo bei. ²³Mbia icuã icuã mose jêje sucha moo, jëso chõ sucha tubiriã nonguee. Tacheẽ nyecua jêje. Achu jeibe ra se. Sucha Israel jenda jembuchesea sea ja eã mose chõ nda achu jei.

²⁴Jengasu ra jësaã saachĩ sesi jê. Se chõ jembaaquiatusa re. Embaaquiatusa quia ecuasú jiri echimbaaquiatusa si re. Ererecua quia ecuasú jiri erimba si re. ²⁵Coche jẽingo nguia se rã sí. Sã mbia icuã icuãte riqui seje no. Eĩ si ra eicuã icuã jêje no. Sã mbia “Satanás” i ñee icuã seje no. Eĩ si ra ñee icuã icuã jêje no. Serimba je no.

Dios riqui jendeaquiatusa bei co

²⁶Jësiquiche quichechĩ nda ñee icuã icuã je si jê. Ae mbia saã nyecuyã cuayã nguia nae, ùquĩ nda nyecua ja cote. Ùquĩ nda mbia icua ja cote. ²⁷Ae riĩ aico ñee nyecuyã cuayã jêje nae, ùquĩ jëseni senei turã mbuchecua mbia je cote. Ae asenei senei nguia jëísaa nae, ùquĩ jëseni senei turã mbuchecua mbia je cote. ²⁸Ae “taiquia” i quia jeni nae, iùquĩ si ra jësiquichechĩ jê! Ae aba mombo serĩte quia tata cuasu nae, aque si quiatusa jësiquiche. Aque si quiatusa jësiquiche tuchi jê. ²⁹Aba queteamba eã jiri raque nguireĩ. Mbae isiquia mumba eãte raque nguireĩ. Dios quia ra tesareĩã nguireĩ mo sí. Nguireĩ mo ngoi mose íbii, Dios riqui eicua jate ã. ³⁰Dios riqui jê mii mii icua jate co. Jëa mii mii abe eicua jate quia co. ³¹Jësiquichechĩ nda jê. Dios quiatusa queteã tuchi nguia jendese nguireĩ mo sí.

Jesús quiatusa chõ se re, jenyee checua chõ nguia mbia je

³²“Jesucristo quiatusa chõ se re”, ae i quia mbia je nae, ùquĩ nii nda acheẽ turã se abe. “Sequiatusa chõ ã nde”, ae ra Paba Ibatenda je.

33 “Jesucristo quiato chõ se re”, ae i ãte quia mbia je nae, ùquĩ ñi nda acheẽ turã eã se abe. “Sequiato eã ño ùquĩ nde”, ae ra Paba Ibatenda je.

Achu chõ ngue mbia mbuchao chao nyesi resẽ, i Jesús

34 ¿Achu reĩ mbia mbuturã turã sacua serimba je jẽje re? Tei. Achu chõ ngue mbia mbuchao chao nyesi resẽ. Mbia icua icua nda uchue seriĩ. Emo emo nda siqui serui. Emo emo nda siqui icua icuate ee. 35 Emo nda eicuãte ngu je seriĩ. Cuña mo nda eicuãte usi je no. Acuanĩ mo nda eicuãte uchari je seriĩ no. 36 Tuchua jenda ra nyao nyao nyesi. Emo nda siqui serese serimbarã. Eataque ra nyao nyao esi. 37 Ae nyesequa tuchi quia ngu rese sesi nae, ùquĩ nda serimbarã eã. Ae nyesequa tuchi quia usi rese sesi nae, ùquĩ nda serimbarã eã no. Ae nyesequa tuchi quia nguiĩ ndese sesi nae, ùquĩ abe ra serimbarã eã no. 38 Ae ra siquiã serui, ùquĩ nda serimbarã eã. Æe mano sereãte seriĩ, ùquĩ nda serimbarã eã. 39 Sã mbia nduate quia serese. Ae nduate quia nyiese nae, ùquĩ nda nyoĩ eãte ibate. Ae ndua eãte quia nyiese nae, ùquĩ nguia ra nyoĩ ibate.

Dios ra mbae turã mondo mbia turã je

40 Ae ra eturã ndiqui jẽje nae, seje abe chõ nda eturã ndiqui. Ae eturã ndiqui seje nae, semondosa je abe chõ eturã ndiqui nguiã. 41 Ae eturã ndiqui Dios cheẽ mbuchecuada je nae, Dios ra mbae turã mondo ee. Sã mbae turã mee ucheẽ mbuchecuada je no. Ae eturã ndiqui echiã mbuquishĩ ji je nae, ùquĩ je abe ra Dios mbae turã mondo no. 42 Tacheẽ nyecua jẽje. Emo sechĩmbaaquiato iseĩ mbiu turã mose seriĩ, mbae turã abe ra Dios mondo aque je no, i que Jesús ñee uchĩmbaaquiato je ra.

Juan el Bautista mbia mondo ñee Jesús je

11 1 Jesús que hui ñee uchĩmbaaquiato doce je cote ra. Aquere que esi Dios cheẽ nenei nenei hue rurubinda je cote ra.

2 Juan ngue chĩ cárcel nda. Hue eñi mose que jirandu Cristo chisaã ndese ra. Uchĩmbaaquiato nyeremo ngue emondo Jesús rea ra. Ñee sacua ee. 3—Jẽso ñee Jesús je. “Cristo ra tu, i beite equia ã nae, ¿ae nde re? ¿Cristo ra uresaarõ arõ mbei quia re?” jenyẽ oso Jesús je, i que Juan uchĩmbaaquiato mondo erea ra. 4 Jesús que ñee Juan nimba je ra. —Ae rese jemae nae, ùquĩ jẽsenei oso Juan je. Ae jeñandu nae, ùquĩ abe no. 5 Eĩ jenyẽ chõ ñee Juan je: “Jesús que eresayã mbucherõ nyerõ nguia ra. Ecuatayã abe mbucuat a cuata. Eire rasi abe mbucherõ nyerõ. Eraaque abe mbuquera quera. Ucheẽ turã ngue esenei senei tuchi quia mbaecha reã je ra”, jenyẽ oso Juan mbiirandu. 6 Emo hui eã mbei mose sesi, aque ia tuchi ra siqui cote, i que Jesús ucheẽ mondo Juan je ra.

7 Juan ñimondo que nyebi nyoĩ Juan ndea cote ra. Jesús que ñee mbia ja je Juan ñi cote ra. —¿Mbae rese mae jẽso turúquiaa re? ¿Quiririã idioi

ichu ichu rese chō jěso mae nde? Quiririã ndese mae eã ngue jěso resē. ⁸¿Emo irao turã ndese jěso mae nde? Ũquĩ ndese eã ngue jěso mae ndesē. Eirao turã siquĩã nguiã turuquia ñi. Ae siqui quia mbia rerecua chuchua nae, ũquĩ nguia eirao turã ndiqui nguiã. ⁹Juan ndese mae ño ngue jěso turúquiaa resē. Dios cheẽ nenei neneisa tuchi chō ae mbia mo si re. Ae chō mbia mingoquiatu qiatu nguiã se ñee sacua mbia je. ¹⁰Sã embesa ji riqui ñee no:

Secheẽ nderaosa tamondo ndenonde.

Ae ra mbia mingoquiatu ndeje, nde ñee sacua ee, i que embesa ji ñee nda. Juan ñi ño embesa ji riqui nguiã ñee. Nyebe Juan ndu nguiã senonde. ¹¹Tacheẽ nyecua jěje. Juan el Bautista quiarei i tuchi raque mbia ñiinda ja si. Ae ra siqui tuchi Dios rese erimbarã cote nae, ũquĩ nguia ra i tuchi Juan si cote. ¹²Juan Dios cheẽ nenei nenei namo mosenda bei chō mbia riqui nguiã ngaẽ ngaẽ Dios cheẽ andu ã. Mbia bite Dios siqui mose mbia rerecuarã. ¹³Juan tu nonde chō embesa ji riqui nguiã ñee j a seriĩ. “Dios rucucha ra tu emo mose”, i seriĩ. Sechu eã mose. Juan nane ngue “co eru quia co” i ñee nda. ¹⁴Sã embesa ji riqui ñee nyii no. “Elías raanguia ra tu mbae mbuquiche ja Cristo tu nonde”, sã i embesa ji no. Juan ñi ño eriqui nguiã ñee. ¹⁵Jěisa mose, isechē jěandu turã na!

¹⁶Mbia namonda siqui turã eãte quia aba cheẽ ndui ã. Mbia riirĩ na ño eriqui nguiã ã. Sã mbia riirĩ ndiqui ñumbusarei sarei no. ¹⁷Sã eriqui ñee ñee nyue no. “Flauta que ambucheẽ ñee ndei jěje ra. ¿Mbaerã jenyuruqui sereã nea nde?” sã i chō nyue no. “Mbae aba mbia eã ngue ambucheẽ ñee ndei jěje resē. ¿Mbaerã jěyate erese re?” sã i chō mbia riirĩ nyue no. Ũquĩ na si chō mbia riqui nguiã aba cheẽ mumba ã. ¹⁸Juan el Bautista que tu rei mbia je ra. Mbia que eisi turã ē a nda. “Co eriqui quiaru sereãte nanderese co. Co eriqui mbae mbei sereãte nanderese co”, i chō mbia quia ee ã. “Aba checuayã ndesenda”, i chōchĩ equia ee ã. ¹⁹Aquere que achu se abe ra. Aquiaru rei nguiã jendese co. Mbae abe ambei rei nguiã jendese co. Se abe que seisi turãya nda. “Quiaru tuchi je”, i chōchĩ seje. “Mbae mbeisa”, i abe que seje no nda. “Mbia icuã quiato chō ñene”, i chō ngue seje no nda. Ae earacuate nae, Dios aracua abe ra eicua.

Jesús ia eã mbia sucha tubiriã jenda rese

²⁰Ae mbia je Jesús uquirãcuã ndeacuquia cuquia tuchi nae, ũquĩ ngue Jesús isi eã mbei ra. Nyebe Jesús riqui nguiã ñee asi asi mbia hue jenda je. ²¹—Seya eãte jendese, Corazín jenda. Seya eãte jendese, Betsaida jenda. Jendasi tuchi rae. Mbia mae sayã ngue asaã saã jěje nae, ũquĩ naa mose Sidón jenda je, eĩ nda Sidón jenda huiicua secha rei. Eĩ nda Tiro jenda abe huiicua secha rei. Eĩ nda eya eãte rei huiicua ndese. ²²Jě nguia jěicua jěsecha sereãte rei. Nyebe ra Dios jembasi mbasi tuchi ũquĩ si

quiato. Dios mbia icuã mbasi mbasi mose. ²³Jêcuasu jêsaã saã tuchi techĩ nguia re, Capernaum jenda. Nyebe ra Dios jemondo tuchi tata cuasu. Mbia mae sayã ngue asaã saã jêje nae, ùquĩ naa mose Sodoma jenda je, eĩ nda Sodoma jenda huicua secha rei. Eĩ nda Dios hue sucha cuasu mbutiã eã ndei. ²⁴Jê nguia jêicuã jêsecha sereãte rei. Nyebe ra Dios jembasi mbasi tuchi Sodoma jenda si. Dios mbia icuã mbasi mbasi mose, i que Jesús ñee nda.

Jesús aba quenea mboseĩ

²⁵Jesús que ñee Dios je cote ra. —Seyate aico nderese co, Paba. Ibi jenda rerecua ja chõ nde re. Ibei jenda abe rerecua ja chõ nde no nde. Ndecheẽ ngue erembuchecu a eã mbia aquiato je ra. Mbia riirĩ naanguia je chõ ngue ndecheẽ erembuchecua nguia. ²⁶Ûquĩ ño ngue eturã ndeje ra, Paba, i que Jesús ra. ²⁷—Seru que mbae mondo ja seje ra. Paba miĩ ño seicua tuchi nguia. Paba riirĩ miĩ tuchi chõ se re. Se miĩ ño Paba aicua tuchi nguia no. Ae je ra Paba atecuquia nae, ùquĩ miĩ ño nda Paba icua tuchi nguia serese. ²⁸Jenguenea mose, jenyu chõ seje. Jenguenea tamboseĩ na jêsi. Taembia mingo. ²⁹Seseteã ño aico nguia se. Aico mingue chõ nguia se co. Jeñimbaaquiato jiri seriĩ. Jeñimbucha chõ serese. Eĩ jenye mose ra jeñia pare pare i eã cote. Jêya bei ra jêingo cote. ³⁰Ae siqui serimbarã nae, ùquĩ iate riqui ã. Secheẽ mbaranguiatuã eãte aba je, i que Jesús ñee nda.

Jesús chimbaaquiato mbae a ishao shao sábadu mose

12 ¹Sábadu mose que Jesús si quia mbiaco ite ite rĩ emo mose ra. Echimbaaquiato riãcuãte que eriqui ra. Nyebe que quiata a ucua miĩ miĩ nyoĩ quia ecuã mose ra. Equiti quitire oo je que ehoi quia eachãaña cote ra. ²Fariseos mo ngue ñee ee ra. —¿Mbaerã ndechimbaaquiato riqui mbae ishao shao sábadu mose re? Co mose chõ mbia riqui uquenea ucua resẽ, i que fariseos ñee Jesús je ra. ³Jesús que ñee ee ra. —¿Embesa ji rese jemaẽ eã David riĩ nyii re? David riãcuãte que aque mose ra. Eresenda abe riãcuãte que eriqui aque mose no nda. ⁴David que ique Dios chuchúaa aque mose ra. Mbichae Dios chuchua jenda que eu ra. Mee mee ngue nguesenda abe je ra. Eriãcuãte quiato ngue re. Sacerdote achõ mbaerã ndaque mbichae. ⁵¿Moisés chimbese rese jemaẽ ãte sacerdote riĩ nde? Sábadu mose que quiei quiei rei Dios chuchua ra. “Dios cheẽ mumbasa”, i ãte quia mbia nguia ñee ee. ⁶Tacheẽ nyecua jêje. Secheẽ nguia i tuchi jiri nguia Dios chuchua si co. ⁷Co embesa ji jêicuayãte quia ã. “Sebite jêya eã jêingo mose mbia rese. Sebiãte ofrenda jemee ñooño mose”, i Dios quia co. Jêingo ùquĩ icuayãte ã. Eĩ nda jeñee icuã eãte rei mbia turã je. ⁸Sábadu rerecua bei chõ se re, i que Jesús ñee fariseos je ra.

Jesús emo o tomei mbucherō

⁹Jesús que oso mbia chumunuásaa cote ra. ¹⁰Huee que eo tomei mo ndiqui ee ra. Mbia que Jesús mbucheẽ icuã sete ra. Nyebe ñee nguiã ee. —¿Eicuãte erasi mbucherō sábadu mose re? ¿I ere? Echeẽ ure je jẽ, i que mbia ñee Jesús je ra. ¹¹Jesús que ñee ee ra. —Sã jenimba oveja mo ndiqui jaã no. Ngoi oso ibicua mo ye no. ¿Sábadu mose ra jenosẽ ibicua si re? Ae. Jenosẽ jei rae. Sábadu mose raque. ¹²Dios queteamba tuchi chõ mbia riqui nguiã oveja si ã. Coche nandeico nguiã mbae turã naa naa sábadu mose, i que Jesús ñee mbia je ra. ¹³Ñee ngue eo tomei je cote ra. —Ndeo emee secuti, i que ee ra. O que emee Jesús cheẽ mose ra. Aque mosechi que eo nyerõ cote ra. ¹⁴Nyebe fariseos paama i nguiã Jesús je. Mbia mbucherō mose sábadu mose. —¿Mañi nande ra Jesús je re? Nandeiquia rei ra reae, i tuchi que eu ñee nyue ra.

Isaías chimbesea ique Jesús riĩ

¹⁵Jesús que jirandu ũquĩ ñee ndese ra. Nyebe esi nguiã hue si. Mbia tubiriã ngue nyoĩ erui ra. Jesús que mbia rasi mbucherō cherō ja quia ra. ¹⁶—iMbia ra jembiiranduchi serese jẽ! i que Jesús ñee ee ra. ¹⁷Aque mose que Isaías chimbesea ique cote ra. Eĩ ngue Isaías embesa miĩ Jesús riĩ nda: ¹⁸Serimba chõ co re. Co que airabo ra. Sechesequa chõ ae re. Seyate aico erese co. Espíritu Turã tamondo tuchi ee. Ae ra secheẽ turã senei senei ja mbia je. ¹⁹Eicuã icuã eã nda emo je. Ñee icuã eã ndae. Ucuasu ra esaã saã eã mbia je. ²⁰Siqui turãte ra equia equirãcuã nea je. Siqui turãte ra equia equiatuã je no. Mbia ra siqui turã nyee erui ererecuarã. ²¹Mbia ja ra ndua turã mbei erese cote, i que Isaías embesa cose ra. Ũquĩ ngue ique cote ra.

Aba checuayã quirãcuã Jesús quereco co, i raque mbia

²²Mbia que eresayã mo curucuaẽ Jesús je ra. Echeẽ aquiatuãte abe que ra. Aba checuayã icuã nguiatu ngue siqui nguiã echiangui re. Jesús que embucherō nda. Nyebe mae turã nguiã cote. Ñee turã abe cote no. ²³Mbia que nyuruira ja mae erese ra. —David rucucha chõ Jesús riqui re, i chõ ngue mbia quia ndua ndua ra. ²⁴Fariseos que echandu ja ra. Nyebe ñee icuã icuã nguiã Jesús je. —Ab a checuayã icuã nderecu tuchi chõ Satanás nde. Satanás quirãcuã je chõ Jesús riqui nguiã aba checuayã icuã jea jea mbia si co, i rei que fariseos ñee icuã Jesús je ra. ²⁵Jesús que ũquĩ ndua ndua icuate ra. Nyebe ñee nguiã ee. —Gobierno icuã icuã mose

nyue, ua rae. Tuchuamo jenda icuã icuã mose nyue, ua ra eno. ²⁶¿Mañi nda Satanás aba checuayã jea mbia si re? Erimba chõ nyeresẽ. Satanás icuã icuã mose nyue, equirãcuã nda ua no. ²⁷“Satanás quirãcuã je chõ Jesús riqui nguiã aba checuayã jea jea mbia si”, jenyẽ chõchĩ nguia seje ã. ¿Aba uquirãcuã mee jenimba je jẽ nde? Aba checuayã icuã jea nonde re. ¿Satanás uquirãcuã mee jenimba je serese re? ²⁸Dios quirãcuã je quiatu aico nguiã aba checuayã jea jea mbia si co. “Dios quirãcuã ndese chõ ureico nguiã mae”, jenyẽ eã ñochĩ equia ã. ²⁹Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co. ³⁰Ae siqui ãte quia serese nae, eicuã ño ùquĩ ndiqui nguiã seje. Ae secheẽ senei senei eãte quia mbia je nae, ùquĩ icuã ño eriqui nguiã seje. ³¹Tacheẽ nyecua jẽje. Emo siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no. Emo ñee icuã mose Espiritu Turã nii, ùquĩ icuã nguiatu ra Dios mbutiã eã mbei esi. ³²Emo ñee icuã mose seriĩ, Dios echeẽ icuã mbutiã arõte. Emo ñee icuã mose Espiritu Turã nii, ùquĩ icuã nguia ra Dios mbutiã eã mbei. Mbae ua ja mose chee ra Dios ùquĩ ñee icuã mbutiã eã mbei.

Sã ira ae ea ae ae no

³³Ira turã mose, ea abe ra eturã no. Ira icuã mose, ea abe ra eicuã no. Mbia ira icua mose, ea abe ra eicua. Nyiabiã ndae. Sã ira ae ea ae ae no. ³⁴Mbei rã ño jẽingo nguiã. Jẽicuã ño jẽingo nguiã. Nyebe jeñee turã aquiatu ãte riqui ã. Ae rese mbia riqui ndua ndua uchiangui re nae, ùquĩ nii sí ra ñee. ³⁵Mbia turã nda ñee turã. Echiangui renda quia eturãte re. Nyebe eriqui nguiã ñee turã. Mbia icuã nguia ñee icuã nguiã. Echiangui renda quia eicuãte riqui nguiã. Nyebe eriqui nguiã ñee icuã. ³⁶Tacheẽ nyecua jẽje. Emo ñee ñooño mose, Dios ra ñee asite aque je. Dios mbia icuã ndea rea mose. ³⁷Emo ñee turã mose, echiangui renda turã ño ñene. Nyebe ra Dios ñee asiã ee. Emo ñee ñooño mose, echiangui renda icuã ño ñene. Nyebe ra Dios ñee asi ùquĩ je, i que Jesús ñee nda.

Mbia mae sayã esaã ure je, i bei mbia Jesús je

³⁸Fariseos mo ngue ngaẽ Jesús rea ra. Embesasa abe que ngaẽ erea ra. Ñee ngue ee ra. —Mbia mae sayã esaã na ure je, i rei que ñee Jesús je ra. ³⁹Jesús que ñee ee ra. —Jẽicuãte riqui co mosenda jẽ ja ã. “Mbia mae sayã esaã ure je”, jenyẽ beite equia ã. Mbia mae sayã mii ño nda asaã jẽje. Jonás na si. ⁴⁰Sã Jonás ndiqui raque tres días sira rie ye no nae. Jonás na sí ra asaã mbia je. Tres días ra aico ibicua rie. ⁴¹Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huiãcuã ndecha Jonás ñee mose ee no. Aico

raque ñee jėje co mosenda je co. Jē secheẽ jemumbate chõ chĩ nguia ã. Se quia raque ererecua tuchi Jonás si. Nyebe ra Dios jembasi tuchi mbia icuã ndea rea mose. ⁴²La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu isho si tuchi Salomón ñee andu no. Se quia acheẽ ndaque quia jėje. Searacua tuchi raque se quiatu Salomón si. Secheẽ jemumbate chõchĩ nguia ã. Nyebe ra Dios jembasi tuchi mbia icuã ndea rea mose.

Aba checuayã icuã nyebi u mbia chianguí re

⁴³Aba checuayã icuã usẽ mose emo ñia si, ngata bei chõ nguia. “¿Mangue ra sequenea aucua que re?” i chõ nguia. Uquenea ucua sacuã mo etea eãte. ⁴⁴“Tasobe rei nyebi. Ae si achu usẽ, aque chiã ye sí taso”, i que aba checuayã nda. Nyebi si mose u, mbia chiã oreãte que ee ra. Echiã ndecoteã eãte que ee ra. Tuchua tii ji raãte que ee ra. ⁴⁵Aba checuayã icuã ngue nguesenda siete queru cote ra. Ique ja que echoi aque chianguí re cote ra. Ae chianguí re aba checuayã icuã siete riqui nae, aque icuã i i tuchi que eriqui cote ra. Aba checuayã miĩ ngue siqui eye nyii ra. Etubiriãte cote. Aque icuã tuchi cote nyii si, i que Jesús mbia je ra.

Jesús nongue ngae erea usi resẽ

⁴⁶Jesús ñee mbei mose que esi ngaẽ ndei ee huee ra. Jesús nongue ja rese. Chichõ ja chõ ngue taicuee ra. Ñee serete que ee ra. ⁴⁷—Hue ndesi riqui nderequia taicuee huee. Ndenongue rese, i que emo Jesús mbiirandu ra. ⁴⁸Jesús que ñee umbiirandusa je ra. —¿Aba je chõ aico “taĩ” i chã? ¿Aba je chõ aico “senongue” i no ña? i que Jesús ñee nda. ⁴⁹Jesús que o mee uchimbaaquiatu cuti ra. —¿Aba je chõ aico nguia “taĩ” i. ¿Aba je chõ aico nguia “senongue” i no. ⁵⁰Ae Paba Ibatenda cheẽ mumbayã nguia nae, ũquĩ je chõ aico nguia “senongue” i. Ũquĩ je chõ aico nguia “taĩ” i no, i que Jesús ñee ee ra.

Emo mbae eĩ mombiquia mbiquia

13 ¹Aque mose sí que Jesús si usẽ tuchia si ra. Tuchua si que esi ngoi ama ndish a nimíaa nda. ²Mbia que ngaẽ ngaẽ ja quia Jesús rea ra. Nyebe Jesús ua oso nguia ngoi canoa ye. Mbia quiatu que chichõ ama nimíaa ndese ra. ³Jesús que embaaquiatu quiatu tuchi quia ra. Ejemplos que esaã saã tuchi ee ra. —Sã emo si rei mbae eĩ mombiquia mbiquia no. ⁴Sã emo ndiqui uqui uqui ñeenda rui no. Sã nguireĩ ndiqui ngaẽ eu no. ⁵Sã emo emo ndiqui uqui sita arõ no. Sita aronda suri jei raque. Ibi ererate quia ñene. ⁶Tenda ibate mose que eriqui ñimama mano nda. Erao eãte quia ñene. Nyebe mano jei nguia. ⁷Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echati asi u eriquisã nda. ⁸Sã emo ndiqui uqui uqui ibi túraã no. Ũquĩ nguiau

que ia turã nda. Sã emo ia cien no. Sã emo ia sesenta no. Sã emo ia treinta no. ⁹Jëisa mose, isecheë jeñandu turã na!

Dios riqui ucheë mbiasa jaaja jêje co, i uchimbaaquiato je

¹⁰Jesús chimbaaquiato que ñee nyecuayã Jesús ísaa ra. —¿Mbaerã ejemplos achõ eresenei senei mbia je re? i que echimbaaquiato ñee ee ra. ¹¹Jesús que ñee ee ra. —Mbia rerecua tuchi quiarei Ibatenda. Ae riqui nguiã ucheë mbiasa asa ja jêje co. Mbia ataque quia siqui sereã erese co. Mbia ataque je quia eriqui nguiã ucheë mbiasa eã jiri. ¹²Emo umbae rerequia mose, Dios ra emo mondobe ee. Emo embae eã mose, Dios ra embae sirõ ja esi. ¹³Nyebe aico nguiã ejemplos achõ nenei nenei mbia je co. Eanduchõ sacuã. Eicua turã ndocoï. ¹⁴Mbia eanduchõ mose que Isafas chimbesa ique cote ra:

Mbia ra secheë ñandu raque.

Icuayã nguiatu rae.

¹⁵Eaquí átate riqui ã.

Secheë andu sereãte equia ã.

Mae sereãte equia sechiao rese ã.

Ndua eã mbei equia serese ã.

Nyebe ra ambitirõ eã mbei,

i que Dios cheë Isafas chimbesa rese ra. ¹⁶Jë nguiatu Dios cheë jeñandu turãte nguiã ã. Jë nguiatu jemaie serete nguiã Dios chiao rese ã. Nyebe jëyate jëingo nguiã ã. ¹⁷Tacheë nyecua jêje. Ae jeñandu quia secheë ã nae, Dios cheë mbuchecuaa ñiinda ã ñandu serete raque. Mbia turã ñiinda abe ã andu serete raque. Ñandu eã mbeite equia ã. Jë ae chõ jëingo nguiã eandu ã cote. Jë ae je chõ echecua riqui nguiã.

Jesús ucheë mbiasa uchimbaaquiato je mbae eĩ nii

¹⁸Secheë tambiasa jêje cote. Mbae eĩ mombiquia mbiquia ji riñ. ¹⁹Ae uqui uqui ñeenda rui nae, Dios cheë andu chooñosa rã ño ùquĩ nde. Icuã eãte quia ñene. Nyebe diablo ru nguiã Dios cheë ndirõ echiangui si. ²⁰Ae uqui uqui sita arõ nae, mbia mo na ño ùquĩ no nde. Dios cheë andu mose, isi turã ndaque. Eyate raque erese. ²¹Mbia icuã icuã mose ee Dios cheë nii, hui jei chõ nguiã esi. Mbae rao eã naanguia chõ ùquĩ nde. ²²Ae uqui uqui nyu réndaa nae, mbia mo na ño ùquĩ no nde. Dios cheë andu turã ndaque. Siqui bei eã ño nguiã erui. Umbaerã achõ ndese chõ eriquichĩ nguiã ndua. “Mbaecha tuchite ra se”, i bei chõ nguiã ndua ndua. Nyebe hui chõ nguiã Dios cheë si. Nyebe Dios cheë ndiqui nguiã ia eã mbeite ee. ²³Ae uqui uqui ibi túraã nae, mbia mo na ño ùquĩ no nde. Ùquĩ nguiatu Dios cheë ñandu turã nguiã. Icuã icuã turã ño nguiã. Nyebe eriqui bei nguiã erese. Ia ia bei raanguia cote. Emo emo ia cien. Emo ia sesenta no. Emo ia treinta no, i que Jesús ucheë mbiasa ñee nda.

Mbae icuã suri trigo turã ndese

24 Jesús que ejemplo nongue senei ee ra. —Sã emo trigo eĩ mombiquia mbiquia úcoo no. Ūquĩ na ño Dios rimba riqui nguiã ã. 25 Sã trigo eĩ mombiquiasa uque cote no. Sã emo tu nyu eĩ mombiquia mbiquia trigo eĩ mumbara mbara no. 26 Trigo eĩ ngue obo cote ra. Nyu abe que suri erese ra. 27 Nyebe erimba ñee nguiã echa je. “Trigo eĩ achõ eremombiquia mbiquia reĩ nguiã seje. ¿Mbaerã nyu abe riqui suri suri erese re?” i que ererecua je ra. 28 Ererecua que ñee ee ra. “Seucuãyãsa chõ ũquĩ nde. Nyu eĩ mombiquia mbiquia chõchĩ trigo eĩ mumbara mbara”, i que ererecua ñee nda. —¿Ureso ra eriqui riqui re? i rei que erimba ñee nguerecua je ra. 29 Ererecua que ñee nda. “Tei. Nyu riqui riqui mose ra trigo abe riqui riquichĩ nde. 30 Sã echichõ ja. Eucua mose ja chee. Ea ireĩ mose quiatu ra acheẽ serimba je cote. Serimba ra nyu rane siqui siqui aque mose cote. Nyu ra esei cote. Aquere quia ra trigo a ishao shao erereco quiatu sacua sechuchua cote”, i que echa ñee nda, i que Jesús ñee nda.

Mbae eĩ na ño Dios rimba re

31 Jesús que ejemplo mo senei mbia je ra. —Mbae eĩ na ño Dios rimba re. Sã mbia mostaza eĩ tiquia no. 32 Eñetẽ tuchite raque mbae eĩ mo si. Suri oso quia cote. Ecuasu tuchite chee cote. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Ūquĩ mĩi ndaque nyii. Ñimbeta tuchi cote. Mbae eĩ na, i que Jesús ñee nda.

Levadura rã ño Dios rimba re

33 Jesús que ejemplo mo senei mbia je ra. —Levadura rã ño Dios rimba re. Sã mbia levadura ñetẽ mondo mbichae ao ramo mose no. Sã levadura riqui oso mbichae mbuchimatã ja no. Eĩ si chõ Dios rimba re, i que Jesús ñee nda.

Jesús ejemplos senei tuchi mbia je

34 Eĩ ño ngue Jesús quia mbia tubiriã mbaaquiato quiato ejemplos je ra. Ejemplos achõ ngue esenei senei mbia mbaaquiato sacua nda. 35 Nyebe Dios cheẽ mbuchecua chimbesa ique cote. Eĩ ño echimbese re:

Ejemplos je mbia tambaquiato quiato.

Ae mbia icuayã mbeite quia nae, ũquĩ tambuchecua mbia je, i que embesa ji ra, i que Jesús ñee nda.

Jesús ejemplo mbuchecua nyu eĩ nii

36 Jesús que mbia mondo ja cote ra. Aquere que esi ique tuchu a mo nda. Echimbbaquiato que ecurubite ñee ee ra. —Ae ejemplo eresenei mbia je nyu eĩ nii nae, ũquĩ embiasa jiri ure je, i que ñee ee ra. 37 Jesús

que ñee ee ra. —Ae trigo eĩ mombiquia mbiquia nae, se rã ño ae re. ³⁸Ae íbii emombiquia mbiquia nae, mbia ja rã ño ùquĩ ibi re. Trigo eĩ turã na ño Dios quiato re. Nyu eĩ icuã na ño diablo quiato no nde. ³⁹Ae mbae eĩ icuã mombiquia mbiquia nae, aba checuayã nderecua rã ño ùquĩ nde. Mbae a ishao shao raanguia ra ibi ua mose cote. Mbae a ishao shaosa rã ño angeles re. ⁴⁰Sã mbia riqui nyu mombo mombo tátaa nae, eĩ si ra Dios uquiatoã mombo tátaa ibi ua ja mose no. ⁴¹Serimba ángeles ra amondo mbi a rea rea ja. Ae mbae icuã saã uquia quia mbia je nae, serimba ra ùquĩ sirõ ja. ⁴²Serimba ra ùquĩ mombo mondo tata cuásuu. Nyeseo seo tuchi ra tátaa. Huee ra ureĩ quiti quiti tuchi. ⁴³Ae Dios mbuturã nae, ùquĩ nininya tuchi ra tenda rã si cote. Eru ibatenda siqui mose mbia rerecuarã tuchi.

Tesoro rã ndei Dios cheẽ

⁴⁴Dios cheẽ nguiĩrĩ nii ndei eturã tuchi mbae ja si. Eturã tuchi tesoro si no. Sã ameĩ mo tesoro ati ji rea íbii no. Tesoro turã tuchi que ee ra. Ameĩ ia tuchi que erea mose ra. Sã ameĩ vender i ja umbae je no. Aque ibi isi sacuaã. Tesoro miĩ ndese ndua.

Dios cheẽ ndei perla turã na

⁴⁵Dios cheẽ nguiĩrĩ nii ndei eturã tuchi mbae ja si. Sã comerciante mo perlas turã ndequia requia no. ⁴⁶Perla turã tuchi mo ndea mose, aque miĩ ndese chõ eriqui nguiã ndua ndua cote. Sã vender i ja umbae je aque perla ribishorõ no.

Dios ra mbia icuã quirirõ

⁴⁷Sira mbua mbua ji rã ño Dios rimba re. Sã emo tarafa mundo ii no. Sira chumumbarate que embua ra. ⁴⁸Sã sira mbuasa mbisẽ tuchi riqui no. Sã echa econosẽ serao usẽ cote no. Echa que ngoi sira turã irabo rabo cote ra. Sira icuã ndirirõ ndirõ emombo sacuaã. ⁴⁹Eĩ si ra Dios mbae ua ja mose. Dios ra ángeles mbu mbia icuã mombo sacuaã mbia turã si. ⁵⁰Eicuã nda emombo tata cuásuu. Nyeseo seo tuchi ra tátaa. Huee ra ureĩ quiti quiti tuchi. ⁵¹¿Secheẽ jẽicuate rei quia ã nde? i que Jesús ñee mbia je ra. —Ae, i que ñee Jesús je ra. ⁵²Jesús que ñee ee ra. —Embesasa mo siqui mose serese, mbaecha rã ño aque re. Sã mbaecha riqui umbae ima ndirõ mbia je emo mose no. Umbae yasu abe rirõ emo mose no, i que Jesús ñee mbia je ra.

Mbia Nazaret jenda Jesús isiteã

⁵³Jesús que ùquĩ ejemplos senei ja mbia je ra. Hue si que esi cote ra. ⁵⁴Oso que ngasẽ nguecua Nazaret cote ra. Oso que mbia mbaaquiato judíos chumunuásaa ra. Nyebe mbia nyuruira tuchi nguiã ñee nyue. —¿Mangue

eriqui ñimbaaquiatsu tuchite re? Nandemae sayã esaã saã tuchichĩ nguia re. ⁵⁵Ira mbitirõ tirõsa ririñ ño ndaque. María abe ririñ ño ndaque no. Jacobo nongue chõ ndaque. José abe no. Simón abe no. Judas abe no. ⁵⁶Ã echari abe riqui ja raque nanderese ã. ¿Mañi equia mbae i cua ja tuchite re? i que mbia Jesús recu a jenda ñee nyue ra. ⁵⁷Nyebe mbia hue jenda riqui Jesús isiteã nde. Jesús que ñee ee ra. —Dios cheẽ mbuchecuasa ishonda cheẽ nguia ra mbia isi turã mbei. Nguécua jenda cheẽ achõ nguia ra eisi turã eã. Ngõngue cheẽ achõ nguia ra eisi turã eã no, i que Jesús ñee nguécua jenda je ra. ⁵⁸Hue jenda mbia que Jesús icua eãte ra. Isiteã ño ngue ra. Nyebe Jesús mbia mae sayã naa eã jiri nguia ee huee.

Mbia Juan el Bautista iquia

14 ¹Mbia que jirandu ja Jesús rese cote ra. Herodes abe que jirandu erese ra. Ererecua que ae ra. ²Juan el Bautista Jesús riqui reñ ee reaẽ. Ae que ñee ngũimba je Jesús riñ nda. —Sechiiquia quera si chõchĩ. Juan el Bautista quera si chõchĩ. Nyebe eriqui nguia mbia mae sayã naa naa co, i que Herodes ñee Jesús riñ nda. ³⁻⁴Herodes que Juan isi icuã nyii ra. Nyucua que mondo tarõ nda. Paama i nda Juan je ra. —iNde ndenongue ninisi erereco aroneate jẽ! i quiatsu que Juan ñee ee nyii ra. Herodes siqui mose nõngue ninisi rese. Herodías, i que enongue ninisi je ra. Felipe, i que enongue je ra. ⁵—Juan taiquia, i rei que Herodes ñee nda. Mbia ataque quiarei siqui tuchi Juan ndese. Dios cheẽ mbuchecuasa, i chõ mbia nguia Juan je. Nyebe Herodes siquiche jiri nguia Juan iquiayã aque mose. ⁶Herodes mbae cumpleaños mose, Herodías ririñ ngue nyuruqui ruqui mbia ja je aque mose ra. Nyucuaaque que ae ra. Herodes ia tuchi que mae nyucuaaque nyuruqui rese ra. ⁷—¿Mbae ra amee ndeje re? Echeẽ ño seje. “Sebite co” nde i mose, aque tamondo ndeje. Acheẽ ñooño eã ño nguia ndeje a, i que Herodes ñee nyucuaaque je ra. ⁸Esi quia ñee ñee nguia nyucuaaque je nyii reaẽ. Nyebe nyucuaaque ñee nguia Herodes je. —Juan el Bautista ãquĩ emee na seje mbia chiu riru ye, i que nyucuaaque ñee ererecua Herodes je ra. ⁹Ererecua chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. Æ seandu ja chõchĩ. Nyebe ra secheẽ ambuchebi eã ee, i que ererecua uchiangui re ra. —Juan ãquĩ emee ee, i que ngũimba je cote ra. ¹⁰—Juan ãquĩ jendoso oso cárcel. Jemondo nyucuaaque je, i que ra. ¹¹—Juan ãquĩ ngue ecurucuaẽ mbia chiu riru ye cote ra. Mee ngue nyucuaaque je cote ra. Nyucuaaque que emee usi je cote ra. ¹²Juan ñimbaaquiatsu que ngaẽ Juan ndaaque rea ra. Nyati que suruchoi ra. Nyoĩ que Jesús mbiirandu erese cote ra.

Jesús mbichae tubiriã saã mbichae miije

¹³Jesús jirandu mose Juan ndese que esi turúquiaa ra. Ama ndui que esi canoa ye ra. Mbia que jirandu randu erese ra. Nyebe nyoĩ ja

nguiã erui ibi rĩ. Sucha ja ja jenda. ¹⁴Jesús que usẽ canoa si cote ra. Mbia tubiriã ndese que mae nda. Eya eã tuchite que erese ra. Erasi que embucherõ cherõ nda. ¹⁵Tenda nyeseco mose que echimbaaquiatu ñee ndei ee ra. —Mbae ãte a turúquiaa. Tenda abe nyesecote. Mbia emondo rã sucha tubiriã nia. Sã echoi bei uchiurã isi, i rei que echimbaaquiatu ñee Jesús je ra. ¹⁶—Sã echoi eã. Jeño mbae jemondo ee echiurã, i que Jesús ñee ee ra. ¹⁷—Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbaaquiatu ñee Jesús je ra. ¹⁸—Jembu rã seje, i que Jesús ra. ¹⁹Ñee ngue mbia tubiriã je cote ra. —Jengoi ja quiata tose, i que ra. Jesús que mbichae cinco sirõ cote ra. Sira nyeremo abe no. Mae ngue ibate ra. Gracias, i que ñee Dios je ra. Mbichae que esiquio quio cote ra. Mee ngue uchimbaaquiatu je ra. Echimbaaquiatu que emee mee mbia ja je cote ra. ²⁰Mbia que embuquiaru ja tuchi cote ra. Miãtã tuchi que ra. Mbia huisa tubiriã ngue cote ra. Sira rire. Mbichae rire abe no. Doce iru que mbia mombisẽ esique sique je ra. ²¹Ae mbichae u sira rese nae, etubiriã tuchite que ra. Cinco mil ndobei. Cuña abe etubiriã. Mbia riirĩ abe etubiriã no.

Jesús ngata i arõ

²²Aquere que Jesús uchimbaaquiatu mondo ja canoa ye ra. —Jẽ nane jẽso sobei. Mbia tambui turã na mondo uchuchúaa se nyii, i que ra. ²³Jesús que mbia tubiriã mbui turã mondo uchuchúaa cote ra. Ae ae que oso sita ibate rĩ cote ra. Ñee sacua Dios je. Huee que ae ae riqui itondaru chee ra. ²⁴Canoa yenda que chi bei quia ama ite rĩ nda. Quiririã ngue tu icuã icuã ee ra. I rebera que tu asi asi tuchi ee ra. ²⁵Nguira cheẽ mose que Jesús ngasẽ ee ra. I arõ ngue esi quia ngata ra. ²⁶Echimbaaquiatu que mae erese ra. Echiã ngue cuaãcuã i tuchi ra. Ngata mose i arõ. —Aba checuayã ño tu nguiã aque, i rei que tasẽ tasẽ nda. Siquiche tuchi que ra. ²⁷—Jësiquichechĩ nguiã. Se chõ nyeresẽ, i jeite que Jesús ñee ee ra. ²⁸Pedro que ñee ee ra. —Nde mose, echeẽ seje. “Echu ngata i arõ”, ere seje, i que Pedro ñee Jesús je ra. ²⁹—Quiatuchu, i que Jesús ñee ee ra. Ae Pedro nguichi nguiã canoa si i rese irõ. Oso nda ngata i arõ Jesús rea chã nde. ³⁰Pedro mae mose quiririã icuã ndese que esiquichete ra. I que oso quia ñĩmi nda. —iSererecua! iSenonosẽ na se! i que ñee Jesús je ra. ³¹Ae Jesús o mundo nguiã eo isi. —Seicuayã ñochĩ. ¿Mbaerã ereico seicuayãte re? i que Jesús ñee ee ra. ³²Ua mose canoa ye que quiririã tiba cote ra. ³³Canoa yenda que ñee turãte Jesús je cote ra. —Dios rucucha tuchi chõ nde riqui re. iAe bei jẽ! i que ee ra.

Jesús mbia Genesaret jenda mbucherõ cherõ

³⁴Ngasẽ nyee que sobei cote ra. Genesaret, i que hue ibi je ra. ³⁵Hue jenda que jirandu ja erese ra. Hue rurubinda abe que mbia mbiirandu

erese ra. Mbia que er asi curucuaẽ cuaẽ ja Jesús je cote ra. ³⁶—Sã mbia rasi oco oco rã ndeirao ai rese, i tuchi que mbia Jesús je ra. Ae oco erese nae, ùquĩ ngue nyerõ nyerõ ja ra.

Mbia chiangui renda ae chõ embiicuañguiã

15 ¹Aquere que fariseos mo ngaẽ ñee Jesús je ra. Embesasa mo abe que ra. Jerusalén jenda chõ ùquĩ ja re. ²Ùquĩ ngue ñee Jesús je ra. —¿Mbaerã ndechimbaaquiato riqui nanderamei ñee mumba mumba beite re? Echoi quiiriã mbei chõ quiaru nguiã, i que ñee asite Jesús je ra. ³Jesús que ñee ee ra. —¿Mbaerã jëingo Dios cheẽ mumba mumba jë nde? Jenamei ñee ndese chõte jëingochĩ nguiã ã. Siqui rocoĩ Dios cheẽ ndese. ⁴Dios que ñee mbia je cose ra. “Jëturã ño jëingo jendu je. Jësi je abe no. Emo ñee icuã mose ngu riĩ, ùquĩ jëiquia. Emo ñee icuã mose usi abe riĩ no, ùquĩ abe jëiquia no”, i quia que Dios ñee mbia mbaaquiato cose ra. ⁵⁻⁶Dios cheẽ jenyabi tuchi chõchĩ nguiã mbia mbaaquiato quiato ã. “Ae nda amee neĩ jëje, ùquĩ ngue amee ja Dios je ra”, i mose emo ñee ngu je, “coche ñene” jentye chõchĩ nguiã ee. Mbae mee eã mose ngu je. Usi abe je. Nyebe jëingo nguiã mbia mbaaquiato icuã icuã ùquĩ. Jenamei ñee achõ ño jëseni senei nguiã mbia je ùquĩ. Dios cheẽ nenei nenei ndocoĩ ee. ⁷Jëturã jësaã ñooño ño nguiã ùquĩ. Jeni tuchi chõ ngue Isafas embesa nguiã cose. Eĩ ngue Isafas embesa cose ra:

⁸ Æ mbia ñee turã ndaque quia seje ã.

Uchiangui re quia eriquiãte nguiã serese ã.

⁹ Ñee turãte raque equia seje ã.

Amei ñee achõ ño esenei seneichĩ nguiã mbia je.

Dios cheẽ miĩ nenei nenei ndocoĩ ee,

i que Isafas embesa jeni nda, i que Jesús ñee ucuasu raã naasa je ra.

¹⁰—Jenyu rã secheẽ andu, i que Jesús ñee mbia tubiriã je ra. —Secheẽ jëicua rã jëiangui re. ¹¹Mbia chiũ embiicuañ eã nguiã. Echiangui renda chõ embiicuañ nguiã. Echiangui renda chõ usẽ nguiã echuru rĩ echeẽ mose. Ùquĩ ño embiicuañ nguiã, i que Jesús mbia mbaaquiato ra. ¹²Echimbaaquiato que ngaẽ ñee Jesús ísaa cote ra. —¿Ereicuayãte ere? Ndecheẽ ngue fariseos mbupaama ite ra, i que echimbaaquiato ñee nyecuayã ee ra. ¹³Jesús que ñee ee ra. —Ae ira Paba Ibatenda chutã eã nae, ùquĩ nda esiqui ja erao resebe. Ùquĩ ira rã ño fariseos riqui nguiã ã. ¹⁴Eresayã na ño fariseos riqui nguiã. Sã eresayã mo “ñeenda tateacuquia jëje” i raque emo je no. Quiachã ja chõ ndae, i que Jesús ñee ee ra. ¹⁵Pedro que ñee ee cote ra. —Erecheẽ ngue namo, “ùquĩ nda mbia mbiicuañ” ere que, ùquĩ embuchecua rã ndecheẽ ure je, i que Pedro ee ra. ¹⁶Jesús que ñee ee ra. —¿Jë abe jëicuayãte quia re? ¹⁷Ae mbia u quia nae, oso chõ nguiã erie ye. Echiique rui chõ eriqui nguiã oso oso. Usẽ nyee. ¹⁸Mbia chiangui renda chõ embiicuañ nguiã usẽ mose echuru

rĩ. ¹⁹Aba chiangui renda quia aba mundua icuã icuãte nguiã. Nyebe mbia riqui nguiã emo iquia. Siqui siqui emo ninisi rese. Emo ndu rese abe no. Siqui siqui eruã ndese no. Mbae mbuquiachã quiachã no. Ñee ñoño abe no. Ñee icuã icuã no. ²⁰Mbia chiangui renda ja chõ ũquĩ nde. Ũquĩ ño mbia mbiicuã icuã nguiã ũquĩ ao ao mose. Uchoi quiiriã mose quiaru, ũquĩ nguia ra mbia mbiicuã eã, i que Jesús ñee nda.

Ari mo Jesús icua

²¹Jesús que nyoĩ hue recha cote ra. Ngasẽ ngue Tiro jii cote ra. Sidón jii abe no. ²²Ari mo Canaán jenda que siqui huee ra. Ae que tu ñee Jesús je ra. —David nducucha chõ nde re, Jesús. iNdeyayã ño serese jẽ! Aba checuayã icuã ndiqui seriirĩ mbasi mbasi co, i tuchi que ari ñee Jesús je ra. ²³Jesús que ñee ãte ee ra. Echimbaaquiato que ngaẽ ñee Jesús je ra. —Ari emondo chõ uchuchúaa. Eñi mbeichĩ ñee nande je a, i que echimbaaquiato ñee Jesús je ra. ²⁴Jesús que ñee ee ra. —Sã ovejas mo quiachã no. Ũquĩ na ño judíos riqui nguiã ã. Judíos achõ je chõ ngue Dios sembu nguiã, i que Jesús ee ra. ²⁵Ari que tu ngoi ngúĩã ndese ñee Jesús je ra. —Sererecua, seriirĩ embucherõ na seje, i que ari ñee Jesús je ra. ²⁶Jesús que ñee ee ra. —Judíos rese rane taico mbae raã naa. Ahui aronea judíos si, mbae raã naa mbiamo je, i que Jesús ee ra. ²⁷Ari que ñee ee ra. —Aicuate raque se, Sererecua. Mbiamo ndaque ure. Judíos eã ndaque ure. Ure abe je chõ mbae esaã ae. Seriirĩ embucherõ seje ae, i que ari ñee ee ra. ²⁸—Seicuate equia co, Ari. Nderiirĩ tambucherõ ndeje, i que Jesús ñee ari je ra. Aque mosechi tuchi que eriirĩ nyerõ nda.

Jesús mbia rasi chumumbara mbucherõ

²⁹Jesús que oso hue recha cote ra. Oso que equia ama nimia ndui ra. Ama Ndisha Galilea nimia ndui. Hue si que esi sita ibate cote ra. Huee que ngoi huee ra. ³⁰Mbia que ngaẽ ngaẽ tuchi quia ee huee ra. Erasi chumumbara rurucuaẽ cuaẽ tuchi ee. Ecuatayã. Eresayã. Echeẽ ngúĩã. Eo icuã. Mbia que ũquĩ ndasi chono ja Jesús i jii ra. Jesús que ũquĩ mbucherõ ja ra. ³¹Nyebe mbia riqui nguiã nyuruira tuchi mae erese. Echeẽ ngúĩã ñee turã mose. Eo icuã mbuturã mose. Ecuatayã ngata turã mose. Eresayã mae turã mose. Nyebe mbia ñee turã ja nguiã Dios riĩ.

Jesús mbichae tubiriã saã mbichae miĩ je

³²Jesús que ñee uchimbaaquiato ísaa cote ra. —Seyayãte aico ã mbia tubiriã ndese co. A echi arete serese tres días a. Embae mo eãte echiurã aa. Eriacuã amondo sereãte echuchúaa. Eriacuã nda eiquia ñeenda cúa, i que Jesús ra. ³³Echimbaaquiato que ñee ee ra. —Turúquiaa chõ nandeico a resẽ. ¿Mañi nda aba ã mbuquiaru ja re? Mbae eã tuchite a resẽ, i que echimbaaquiato ñee Jesús je ra. ³⁴—¿Manya mbichae jembae re? i que Jesús

ee ra. —Siete mbichae. Sira ñetē mo ndese, i que ee ra. ³⁵Jesús que mbia mbucoi ja fbii ra. ³⁶Mbichae que eisi ja o je ra. Sira ñetē abe no. Gracias, i que Dios je ra. Mbichae que esiquio quio mbia je cote ra. Sir a rese. Mee ja que uchimbaaquiatu je cote ra. Ūquĩ ngue emee mee mbia ja je cote ra. ³⁷Mbia que eu ja ñimbio chee ra. Mbichae sique sique que emunua nua ja ra. Sira sique rese. Siete iru que emombisē nyee ra. ³⁸Mbichaecua rei mbia cuatro mil. Cuña abe abe. Mbia riirĩ abe abe no. ³⁹Jesús que mbia mondochoi ja cote ra. Jesús que ua canoa ye cote ra. Oso que Magdala quiti cote ra.

Mbia mae sayā eteacuquia ure je, i fariseos

16 ¹—Tã nande rã Jesús je, i que fariseos ñee nyue ra. Saduceos rese. Nyebe ūquĩ ngaē nguiã ñee Jesús je. —Mbia mae sayā esaã na ure je. Ī nda “Dios chĩmbu” ure tuchi ndeje, i rei que ñee Jesús je ra. ²Jesús que ñee ee ra. —Ibei jēicuate raque ūquĩ. Ibei ireĩ ndese jemae mose eresaitō, “ama nda nyaaquíã” jenyee chō nguiã eicua. ³Ibei ireĩ ndese jemae mose eresaitō ndabe, “nyaaqui rae”, jenyee chō nguiã eicua ūquĩ no. Ibei jēicuate raque quia ā. Ae Dios teacuquia jēje nae, ūquĩ jēicuayā mbei chōchĩ nguia ā. Ae ra tu icuâte mbia je nae, ¿mberã jēingo ūquĩ nguiatu icuayâte re? ¿Mberã jēingo jēaracua raã naa nde? ⁴Mbia icuã ja chō ā nde. Ae siqui ibi rĩ namo nae. Hui jate equia Dios si ā. “Mbia mae sayā esaã ure je”, i chōchĩ equia seje ā. Aque miĩ nda asaã jēje. Jonás na si ra asaã jēje, i que Jesús ñee nda. Oso que erecha cote ra.

Fariseos mbia mbaaquiatu icuã, i Jesús

⁵Jesús chimbaaquiatu que uchĩurã curuchoi eã nda. Tesarei que esi nyoĩ mose sobei ra. ⁶Jesús que ñee ee ra. —Mbichae mbuchimatãsa rã ndei fariseos cheē. Saduceos cheē abe no. Ūquĩ ñee ndese ra jēingochĩ jē, i que Jesús ee ra. ⁷—Mbichae quiatu ngue nanderuã nguiã. Nyebe eriqui nguiã ñee nande je ūquĩ, i rei que echimbaaquiatu ñee nyue ra. ⁸Jesús que echeē ñee icuate ra. Nyebe ñee nguiã ee. —¿Mberã jēingo “mbichae nanderuãchĩ” i re? ¿Mberã jēingo seicuayâte re? ⁹Ae riĩ aico ñee jēje nae, ¿ūquĩ jēicuayā mbeite quia re? Se mbichae mbeta mose ¿ūquĩ si jētesarei chō nde? Cinco mbichae mbeta mose mbia cinco mil je, ¿manya iru jemombisē mbichae sique sique je re? ¹⁰Siete mbichae mbeta mose mbia cuatro mil je ¿manya iru jemombisē mbichae sique sique je no? ¹¹Secheē mose jēje nyii, “mbichae mbuchimatãsa rã ndei fariseos cheē”, i mose jēje, secheē jēicua rã. Mbichae riĩ aico ñee áte jēje co. Fariseos cheē ndese jēingo eã sacua ño aico nguiã ñee jēje. Saduceos cheē ndese abe jēingo eã sacua, i que Jesús ra. ¹²Echimbaaquiatu que eicua chee ra. —Mbi chae mbuchimatãsa riĩ eã ño eriqui ñee nande je re. Ae fariseos senei senei icuã nguia mbia mbaaquiatu nae, ūquĩ niĩ ño eriqui ñee nde. Saduceo ñee niĩ abe no, i que echimbaaquiatu eicua ramo cote ra.

Cristo chō nde resē, i Pedro Jesús je

¹³Jesús que nyoĩ Cesarea de Filípoo cote ra. Huee que ñee uchimbaaquiato je cote ra. —Mbiarã ngue achu íbii ra. ¿Aba aico reĩ se mbia je re? i que Jesús ñee ee ra. ¹⁴Echimbaaquiato que ñee ee ra. —Juan el Bautista ereico reĩ nguiã mbia je co. Elías ereico reĩ nguiã emo je no. Jeremías ereico reĩ nguiã emo je no. Dios cheẽ nenei neneisa mo ereico reĩ nguiã emo je no, i que echimbaaquiato ñee Jesús je ra. ¹⁵—¿Aba aico reĩ jêje co re? i que Jesús ee ra. ¹⁶—Cristo chō nde resē. Dios riirĩ ño nde resē, i que Pedro ee ra. ¹⁷⁻¹⁸Jesús que ñee Pedro je cote ra. —Ndeyate ereico co, Simón. Mbia mo nembiirandu eãte quia serese co. Paba Ibatenda mii ño nembiirandu nguiã serese. Jonás ndiirĩ ndei nde. Tacheẽ tuchi ndeje. “Pedro” i chō equia ndeje co. “Sita” i ñi Pedro je re. Aque sita arō ño nda sembae iglesia achao. Satanás nda esiquisã eãte. Satanás quirãcuãte raque. Mbia iquiasa raque ae no. Ae ra sembae iglesia siquisã eã mbei. ¹⁹Mbae tamee ndeje. Llave tamee ndeje. Aque je ra Dios recua iquesa erembuquiata quiata mbia je. Mbia ique sacua. Ae je ra erembuqui ata, ùquĩ nda ique. Ae je ra erembuquiata eã, ùquĩ nda ique eã, i que Jesús ra. ²⁰Jesús que ñee uchimbaaquiato ja je cote ra. —“Jesús rei Dios chimondo” jenyechĩ nda emo mbiirandu jê, i que ee ra.

Mbia ra seiquia, i Jesús

²¹Aque mose bei que Jesús umano nonde senei senei uchimbaaquiato je ra. —Paba ra sererao Jerusalén. Huee ra amei seiruã nu a tuchi. Sacerdotes rerecua abe ra sembasi mbasi tuchi no. Embesasa abe no. Seiquia rae. Tres días mose ra aquera si, i que Jesús ñee ee ra. ²²Pedro que Jesús querao pe jiri ñee sacua ee ra. —Mbia ra jêĩ jêichĩ ndeje jê. Mbia ra ndeiquiachĩ jê, i rei que Pedro ñee asi ee ra. ²³Jesús que uba ñee Pedro je ra. —Ehui chō sesi, Satanás. ¿Mbaerã ereico seriquisã quisã nde? Mbia ndua rã ño ereico nguiã ndua. Dios ndua rã eã, i que ñee Pedro je ra.

²⁴Jesús que ñee uchimbaaquiato je cote ra. —Emo siquise mose serui, sã hui ja mbae ubi si. Sã cruz umbaerã ndui se rã si. Sã eriqui serui bei cote. ²⁵Emo ndua bei mose nguenco rese, ereco ra ua esi. Emo hui mose nguenco si seje, ùquĩ nda siqui bei. ²⁶Emo nguenco mumba chooño mose, eya eã mbei rae. Mbaecha rete raque. Emo nguenco mumba chooño mose, mbae mo eãte ereco ribishorō sacua. ²⁷Dios ra sembu si íbii uquirãcuã je. Ibatenda rese ra achu ángeles. Ae mbae turã saã saã nguia nae, ùquĩ je ra mbae turã amondo se tu mose. Ae mbae icuã saã saã nguia nae, ùquĩ je ra mbae icuã amondo no. ²⁸Tacheẽ nyecua jêje. A jengu a nae, jemo nda jema sechu rese. Achu ra mbia rerecuarã tuchi cote. Jemo jemano eã mose r a achu mbia rerecuarã tuchi cote, i que Jesús ra.

Jesús nyiicuabo uchimbaaquiatsu résa

17 ¹Tenda seis uare que Jesús uchimbaaquiatsu mo nderao sita ibátee ra. Pedro. Jacobo. Juan abe no. Jacobo nongue rei Juan. Ñquĩ ngue equerao ja mbia tiásaa ra. ²Jesús que nyiicuabo erésaa ra. Eruba que ñimbiasu ra. Tenda nininya rã tuchi que eruba ra. Eirao abe nininya tuchi que ra. Eiraoshĩ nininya tuchi que ee ra. ³Mbia nyeremo ngue nyecua u ibate si ra. Jesús nininya mose que echi ñee ñee erese ra. Moisés que enongue ra. Elías que enongue ra. ⁴Pedro que ñee Jesús je ra. —Sembaaquiatusa, nandecu turãte a. Sucha ñetẽ uresaã saã na, ndebi mose. Enongue nembraerã. Enongue Moisés mbaerã no. Enongue Elías mbaerã no, i rei que Pedro ñee Jesús je ra. ⁵Pedro cheẽ mosete que ibeishĩ ndu eite ñi nda. Abamo ñee mo ngue echandu ibeishĩ qui re ra. —Co rei sebi tuchi seriirĩ co. Seya tuchite aico erese co. Echeẽ jeñandu bei quia, i que Dios ñee ee ibeishĩ qui re ra. ⁶Echimbaaquiatsu que siquichete eandu mose ra. Echeẽ mose que echoi nyaara nguie qiti ra. ⁷Jesús que esiichã oco oco erese ra. —Jēhuã na. Jēsiquichechĩ nda jē, i que ñee ee ra. ⁸Echimbaaquiatsu soboiba mose que mae Jesús mii ndese cote ra.

⁹I ecuaẽ nguia nguichi mose sita ibate si que Jesús ñee ee ra. —Ae rese jemae namo nae, ùquĩ nda jēsenei seneichĩ emo je jē. Seraaque quera si mose, aque mose ramo ño jēsenei senei mbia je cote, i que Jesús ñee ee ra. ¹⁰Echimbaaquiatsu que ñee ee cote ra. —¿Mbaerã “Elías rane nda tu Cristo si” i embesasa re? i que ñee Jesús je ra. ¹¹Jesús que ñee ee ra. —Ae bei. Coche Elías rane tu nguia mbae mbitirõ ja. ¹²Elías que tu ra. Mbia que eicuayãte ra. Mbia icuã icuã jate que eriqui ee ra. Eĩ si ra mbia icuã icuã seje no, i que Jesús ee ra. ¹³Echimbaaquiatsu que Jesús cheẽ icua ramo cote ra. —Juan el Bautista riĩ ño eriqui ñee nde, i que Jesús cheẽ icua ramo cote ra.

Jesús aba checuayã jea mbia riirĩ mo si

¹⁴Ngasẽ ngue mbia ja je cote ra. Emo ngue ngoi ngũĩã ndese ñee Jesús je ra. ¹⁵—Seriirĩ embucherõ na, Sererecua. Tẽ i beite que equia ra. Titi titi i beite que equia no nda. Erasi tuchite. Ngoi coi beite tátaa. Ama ye abe ngoi coi beite. ¹⁶“Seriirĩ embucherõ na”, ae rei ngue nguia ndechimbaaquiatsu je. Mbia mbucherõ aquiatsuã ño eriqui re, i que eru ñee Jesús je ra. ¹⁷Jesús que ñee cote ra. —¿Mañi jenyé quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jėje re? i que Jesús ra. —Eriirĩ jendu rã seje, i que cote ra. ¹⁸Jesús que ñee asite aba checuayã je cote ra. Aba checuayã ngue usẽ eriirĩ si cote ra. Aque mose tuchi que eriirĩ nyerõ cote ra. ¹⁹Aquere que echimbaaquiatsu ñee Jesús ísaa ra. —¿Mbaerã ureico aba checuayã jea aroneate mbia si re? i que ñee Jesús je ra. ²⁰Jesús que ñee ee ra. —Seicuayãte jiri quiatsu

nguiã ã. Tacheẽ nyecua jêje. Sã mostaza eĩ ñetête riqui raque no. Jê seicua ñetê mose, mbae ra asaã ja jêje. “Eso pe jiri”, jenyê mose co sita ibate je, siri ra oso pe jiri jeñee nguire. Jê seicua mose, mbae jê saã ja arondete. ²¹Aba checuayã ngue ajae namo, ùquĩ nda jêjea eã jeñee eã mose Dios je. Ùquĩ nda jêjea eã, jêhui eã mose jenyiu si, i que Jesús ñee ee ra.

Mbia ra seiquia, i si Jesús

²²Galilea rĩ ngue Jesús riqui ngata uchimbaaquiato rese ra. Jesús que embaaquiato quiato quia ra. —Mbiarã ngue achu ra. Mbia ra semee mbia icuã je. ²³Mbia icuã nda seiquia. Tres nyaashĩ mose r a aquera si, i que Jesús ra. Echimbaaquiato ia eã tuchi que echeẽ mose ra.

Jesús mbae isiquia mondo impuestos pagar i sacuã

²⁴Ngasẽ ja que Capernaum cote ra. Ae impuestos isi isi quia Dios chuchua jenda nae, ùquĩ ngue nyoĩ ñee Pedro je ra. —¿Jenderecua impuestos mee eã nguia Dios chuchua jenda je re? i que ñee Pedro je ra. ²⁵—Impuestos emee mee mbeite quia co, i que Pedro ee ra. Pedro que oso ique tuchúaa cote ra. Jesús rane ngue ñee ee ra. —Í ere, Pedro. ¿Aba je mbia rerecua riqui “impuestos jemee na seje” i re? Í eã nda nguiri je. Mbiamo je chõ nda ñee nguia, i que Jesús ee ra. ²⁶—Ae. Mbiamo si ra eisi, i que Pedro ñee ee ra. Jesús que ñee ee cote ra. —Eriirĩ nda impuestos mee eã ee resẽ. ²⁷Dios riirĩ ndaque se. Impuestos nandemee ndei Dios chuchua jenda je. Sã mbia ndua icuã eã nande rese. Quiato ama ndíshaa. Sira mbabasa emondo ii. Ae rane nda sira erembua nae, aque churu ye ra mbae isiquia mo eretea. Aque emee serao impuestos isi isiquia je. Sembae impuestos sacuã. Nembae sacuã abe no, i que Jesús ñee Pedro je ra.

Ererecua tuchi ra se, i jaaja Jesús chimbaaquiato nyue

18 ¹Aque mose que echimbaaquiato ñee jate Jesús je ra. —¿Aba ra ererecua tuchi ure nderese re? i que ñee Jesús je ra. ²Jesús que ãquẽ mo mbucoi miĩ eite re ra. ³Ñee ngue mbia je cote ra. —Tacheẽ nyecua jêje. Dios quiti jemba eã mose ra jenderecua eã mbei Dios. Mbia riirĩ na jêingoã mose ra jenderecua eã mbei Dios no. ⁴Ae siqui quia cocheete nae, ùquĩ nda mbia rerecuarã nyee Dios rese. Ae siqui quia mbia riirĩ n a nae, ùquĩ nda mbia rerecuarã nyee Dios rese. ⁵Ae eturã ndiqui mbia riirĩ je seriĩ nae, seje abe chõ eturã ndiqui nguia.

Mbae icuã nda nandesã uquiachiĩ emo je

⁶Ae ra mbae icuã saã uquia seicuasa mo je nae, ùquĩ nda mbae rasi saã tuchi cote. Ùquĩ nda aba mombo chõ ama ndisha ye nyii re chã. Sita resebe ecua ji mondo. Í nda mbae icuã naa uquia eãte rei seicuasa je.

7Mbae icuã nguiarei siqui bei tuchi mbia mbiicuã nonde. Ae ñee nguia mbia je nae, “mbae icuã esaã” i nae, eicuã tuchi chõ ũquĩ nde. Ae “mbae icuã esaã” i nae, ũquĩ nda mbae rasi saã tuchi cote. 8Ndeo nemingo mose mbae icuã ndese, ndeo echisia mombo. Coche rei ra ereso ibate ndeo mii nderequia, siqui bei sacua huee. Ndei nemingo mose mbae i cuã ndese, ndei echisia mombo no. Coche rei ra ereso ibate ndei mii nderequia, siqui bei sacua huee. Oso rocoĩ tata cuásuu, ndeo nyeremo nderao. Ndei nyeremo nderao. Tata ra uqueã mbei huee no. 9Nderesa nemingo mose mbae icuã ndese, nderesa echoo. Coche rei ra ereso ibate nderesa mii nderequia. Nemombo rocoĩ tata cuásuu, nderesa nyeremo nderao.

Oveja quiachã je

10Seriirĩ ñetē mo nda jēucuāyāchĩ jē. Angeles riqui eraarōte ã. Angeles riqui Paba rese ibate pe. 11Se que achu quiachã je rea ra. 12Sã emo nimba quiachã oveja no. Cien ndei ngue erimba re. Co mii ngue quiachã ee ra. Aque esi quia quiachã je requia aque. Eataque recha. Noventa y nueve recha. 13Tacheē nyecua jēje. Echa quiachã je rea mose, eyate que erese ra. Eya tuchi que erese ovejas ataque si ra. Quiachã eã je si. 14Sã jendu ibatenda abe no. —Sã aque mii quiachã eã seriirĩ ñetē mo, i chõ Dios nguia co.

Emo mbae icuã naa mbei mose ndeje, etesarei sarei bei chõ

15Nderesenda icuã mose ndeje, eso ñee ee. “Ã ngue eresaã mbae icuã nda”, ere chõ ñee efsaa. Ndecheē andu turã mose, nderesenda que eremitirõ turã nda. 16Ndecheē andu sereã mose, emo abe erao ñee sacua ee. Aque mii nda reae. Nyeremo nda re no ae. Ũquĩ abe ñee sacua ee. Jeñee ja mose ee hue rĩ ja, jēandu turã arōte. 17Ũquĩ andu sereã mose, jeñee mbia chumunuásaa cote. Sã mbia ñumunua je ñee ja ee. Ũquĩ ñee andu sereã mose, jemombo chõ cote. Dios quiatoã naanguia jēsaã ño ee cote. Mbia icuã naanguia jēsaã ño nguia ee cote. 18Tacheē nyecua jēje. Jē mbae mo ndiquisã mose, Dios abe ra esiquisã. Jē mbae mo ndiquisã eã mose, Dios abe ra esiquisã eã no. 19Tacheē nyecua jēje. Jē nyeremo ndua turã mose hue rĩ sí, “co embu ure je” jenyē turã ja mose Dios je, Paba Ibatenda ra emondo jēje. 20Jē nyeremo ñumunua mose seriĩ, aico chee nguia jendese jēite re huee, i que Jesús uchimbaaquiatu je ra.

21Pedro que ñee Jesús je ra. —Seresenda icuã mbei mose seje ¿manya veces ra atesarei eicuã si re? ¿Siete veces ra re? i que Pedro ra. 22Jesús que ñee ee ra. —Tei. Siete veces eã. Eata tuchi quia ñene. Setenta veces siete quia ñene, i que Jesús ee ra.

Jendesenda icuã si chõ jētesarei

23Sã ererecua mo ndiqui no. Dios rã si chõ ererecua re. Sã ererecua a cuenta raã naa ja nguimba je no. 24Cuenta raã naa mose que erimba

mo ndurucuaẽ ee ra. Aque que deber i tuchi quia ee ra. ²⁵Mbae ãte que erimba mbae pagar i sacuaõ nda. Nyebe ererecua ñee nguiã. “Embae je vender nande ja rã. Eriirĩ abe je vender nande. Eninisi abe no. Ae abe je vender nande. Ñ nda cuenta ua jiri”, i rei que ererecua ñee nda. ²⁶Erimba ia eã tuchi que echeẽ andu ra. Ngoi que ngũfã ndese ñee nguerecua je ra. “Sererecua, eico tochi chõ seje ae. Mbae tamondo ja chee ndeje”, i que erimba ra. ²⁷Ererecua ia eã tuchi que erese ra. “Mbae emondo eã ndei seje pagar i sacuaõ”, i chõ nyee que ee ra. Hui chõ nyee que esi ra. ²⁸Erimba que usẽ ndei oso quia ra. Aque mosechi que ngasẽ nguesenda mo je ra. Deber i miite rei ee reaẽ. “Pagar ere rã seje”, i que echosoi isi ra. ²⁹Eresenda que ngoi ngũfã ndese ñee ee ra. “Eico tochi chõ seje ae. Mbae tamondo ja chee ndeje”, i que eresenda ñee ee ra. ³⁰“Nya” i chõ ngue enongue echeẽ mose ra. Cárcel chõ ngue ererao chee matã nda. Mbae mondo ja chee sacuaõ ee. ³¹Eresenda ataque ia eã tuchi que mae erese ra. Nyebe echoi nguiã ñee ererecua je. ³²Nyebe ererecua “echu” i nguiã ee. “Serimba icuãte chõ ereicochĩ nde re. Ae deber ere seje, ùquĩ nii ngue acheẽ eãte ndeje. Seya eãte que nderese nde ñee mose seje nyii. ³³¿Mbaerã ndeya eã eã ño ndenongue rese nde re? Sã ñi seya eãte nderese nyii no”, i que ererecua ñee ee ra. ³⁴Ererecua que paama i tuchi ee ra. “Jẽiruã nua tuchi, pagar i ja chee”, i que ererecua ñee mbia je ra, i que Jesús mbia mbaaquiату quiату ra. ³⁵—Eĩ sí ra Paba Ibatenda paama i jẽje, jẽtesareiã mose jendesenda icuã si, i que Jesús mbi a je ra.

Jesús ñee mbia ngũinisi mombo je ri

19 ¹Jesús cheẽ uare que esi Galilea si cote ra. Ama Jordán ndobei que esi sobei cote ra. Judea bei chõ hue ja ibi re. ²Mbia que nyoï ja tuchi quia erui ra. Huee que mbia rasi mbucherõ cherõ tuchi ra. ³Fariseos mo ngue nyoï Jesús riichã nda. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia ngũinisi jea ubiã mose re? i que ñee Jesús je cote ra. ⁴Jesús que ñee ee ra. —¿Embesa ji rese jẽingo mae ãte re? “Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda. ⁵Nyebe ra emo ndiqui ngũinisi rese bei. Ngu si isho. Usi si abe no. Ngũinisi rese siqui bei sacuaõ. Co miĩ na siqui sacuaõ nyiese”, i ñi embesa ji re. ⁶Nyeremo siqui rã eã ño cote re. Co miĩ siqui rã ño ùquĩ cote re. Ae Dios mbucha nyiese nae, sã ùquĩ hui eã mbei nyesi, i que Jesús ñee ee ra. ⁷Fariseos que ñee ee cote ra. —¿Mbaerã Moisés ñee ùquĩ nde? “Jeninisi jea nonde, papel mbesa je jemondo ee”, i ee re, i que ra. ⁸Jesús que ñee ee ra. —Jëaquẽ ãtãte quiату ngue re. Nyebe Moisés embesa nguiã jẽje ùquĩ. ùquĩ i ãte que Dios mbia ao ramo mose nyii ra. ⁹Ae ngũinisi jea nae, eninisi siquiã ndaque emo ndese, eicuã tuchi chõ ùquĩ nde. Ae ngũinisirã mo ndeabe mose, adulterio i que ùquĩ je ra, i que Jesús ñee ee ra.

¹⁰Echimbaaquiatsu que ñee ee ra. —Mbaeiaie mose ngũinisi jea mose ÷mberã nguiatsu ra ngũinisirã ndea re? i rei que echimbaaquiatsu ñee nda. ¹¹Jesús que ñee ee ra. —Mbia ja riqui ũquĩ icua eãte ã. Ae Dios mbaaquiatsu quiatsu nae, ũquĩ mii ño siqui nguiã eicua ã. ¹²Ae eninisi sereã mbeite nae, ũquĩ nda siqui turã, eninisiã ndaque rae. Emo nyia o ji mose, ũquĩ abe ra siqui turã, eninisiã ndaque rae. Emo ngũinisirã nderequia eã mose Dios riĩ, ũquĩ abe ra siqui turã, eninisiã ndaque ra eno. Ae ra “coche seninisiã aico nguiã co” i mose, sã eriqui bei eninisiã, i que Jesús ñee ee ra.

Jesús mbia riirĩ isi turã turã

¹³Mbia que nguiirĩ ngurucuaẽ cuaẽ nguia Jesús je ra. Jesús o noono sacua eãquĩ arõ. Jesús ñee sacua Dios je eriĩ. —÷Mbaerã jendiirĩ jendu quia co re? i rei que Jesús chimbaaquiatsu ñee mbia je ra. ¹⁴Jesús que ñee nda. —Tei. Jẽhui chõ esi. Sã nguiirĩ ndurucuaẽ cuaẽ seje. Eĩ ño Dios rimba nguiã. Ucuasu raã naa eã. Mbia riirĩ na, i que Jesús ñee ee ra. ¹⁵Jesús que o chono ñono mbia riirĩ arõ nda. Aquere que esi ngata cote ra.

Acuanindu mbaecha mo ñee Jesús je

¹⁶Acuanindu mo ngue tu ñee Jesús je ra. —Mbia mbaaquiatusa turãte nde. ÷Mbae turã mo nda asaã Dios je semingo bei sacua nde? i que ñee Jesús je ra. ¹⁷Jesús que ñee ee ra. —÷Mbaerã ereico eturã i seje re? Dios mii ño eturã ndesẽ. Nde ndeico beise mose, Dios cheẽ emumbayã ja, i que Jesús ñee e e ra. ¹⁸—÷Mbae ra amumbayã Dios cheẽ nde? i que acuanindu ee ra. Jesús que ñee ee ra. —“Mbia mo nda ereiquiachĩ. Emo ninisi rese ra ereicochĩ. Mbae mo nda erembuquiachãchĩ. Erecheẽ ñooñoichĩ nda emo nii. ¹⁹Ndeturã ño nderu je. Ndeturã ño ndesi abe je. Sã erchesequia ndechiese no nae, eĩ ere si chõ nyesequia nde ji jenda rese”. Dios cheẽ ja chõ ũquĩ nde. Mbia echeẽ mumbayã sacua, i que Jesús ñee acuanindu je ra. ²⁰Acuanindu que ñee ndei ee ra. —Ũquĩ ngue amumbayã ja bei quia ra. Señetẽ mosenda bei. ÷Mbae mo abe ra asaã nde? i que acuanindu ñee Jesús je ra. ²¹Jesús que ñee ee ra. —“Taico turã tuchi”, nde i mose, ã abe esaã. Nembae emondo mondo ja mbia mbaecha reã je. Nde ũquĩ naa mose, mbae tubiriã nda nembae, ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²²Acuanindu Jesús cheẽ andu mose que echosoi oso serĩte cote ra. Eyayãte que oso ra. Mbaecha tuchite quiatsu ngue ae re.

²³Jesús que ñee uchimbaaquiatsu je cote ra. —Tacheẽ nyecua jẽje. Mbaranguiatu ãte mbaecha je ngasẽ sacua ibate siqui bei sacua huee. ²⁴Sã ticuasú mo ndiqui oso aroneate ique aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra. ²⁵Echimbaaquiatsu que nyuruira tuchi echeẽ andu ra. —÷Aba quia ra oso

Dios rea ibate re no? i que echimbaaquiatu Jesús je cote ra. ²⁶Jesús que mae erese ñee ee ra. —Ae mbia saã aroneate quia nae, Dios mii ño nda esaã, i que Jesús ee ra. ²⁷Pedro que ñee Jesús je ra. —Ure que urembae uresech a ja ra. Siqui sacua nderui. ¿Mbae ra eremeë ure je re? i que Pedro ñee nda. ²⁸Jesús que ñee ee ra. —Tacheë nyecua jêje. Dios mbae mbiasu ja mose ra ererecua tuchi rei se cote. Mbia ra mae ja serese aque mose. Aque mose ra jê abe ererecua. Jê doce. Trono jaaja ra jembraera cote. Judíos rerecua ja ra jê. ²⁹Emo umbae secha ja mose siqui sacua serui, embae ra asibishorô tuchi ee cote. Ae uchuchua secha. Ae ngôngue secha. Ae ngu secha. Ae usi secha. Ae nguïnisi secha. Ae nguiirî secha. Ae umbae ibi secha no. Ũquî mbae ja ra asibishorô tuchi cien veces. Aquere ra siqui bei tuchi Dios rese ibate cote. ³⁰Ae rane eriqui nyii nae, ũquî nda siqui mbia rui tuchi cote. Ae siqui quia mbia rui tuchi nyii nae, ũquî nane nda cote, i que Jesús ra.

Ae rane eriqui nyii nae, ũquî nda siqui mbia rui tuchi cote

20 ¹Jesús que mbia mbaaquiatu quiatube no nda. —Dios rei mbia rerecua tuchi. Sã mbaecha mo ndiqui no. Sã mbaecha uva tubiriâte riqui embae no. Sã mbaecha mbia mo ndea rea umbae ishao shao sacua no. Nyaashî namo mose. ²“Denario mii tamondo mondo ja jêje. Sembae ishao shao sacua tenda mondo chee”, i que emondochoi úcoo cote ra. ³Tenda chui mose que mae emo ndecoteã eã ndese ra. ⁴—Jê abe jêso sembae ishao shao. Mbae mo tamee jêje, i que ee ra. Nyoî que echeë mose ra. ⁵Tenda nandeite re mose que echa emo mondo choi cote ra. Umbae ishao shao sacua. Eî si que echa tenda chaara ramo mose no nda. ⁶Tenda ireî mose abe que mae emo ndecoteã eã ndese no nda. “¿Mbaerã jêingo tenda mondochooño siqui rocoî mbae mo ndese a re?” i que echa ñee ee ra. ⁷“Emo ngue ‘mbae mo esaã seje’ i âte ure je ra”, i que ee ra. “Jêso jê abe sembae ishao shao. Mbae mo tamee jêje”, i que echa ee ra. ⁸Itondaru ramo mose que echa ñee mbia reaquiatusa je ra. “‘Jenyu’ ere sembae ishao shaosa je. Pagar ere rã ũquî ja je. Ae ique ramo eresaitô nae, ũquî nane je pagar ere. Ae rane ique nyii nae, ũquî je pagar ere hui bei cote”, i que echa ñee nda. ⁹Ae ique eresaitô nae, ũquî nane je que denario mii mee mee nda. ¹⁰Ae rane ique nyii nae, ũquî ngue ñee ñee u nyue ra. “Eata jiri ra emee nande je reae. Nande rane ngue uva a nandeishao shao”, i rei que eu ñee ñee nyue ra. Ũquî je abe que denario mii mee mee nda. ¹¹Pagar i mose ee que ñee asi asi echa je ra. ¹²“Ae ique ramo eresaitô nae, ũquî ngue mbae ishao shao eã jiri resê. Eresaitôte que ique. Ure quiatu que tenda uremumba rei uva a ishao shao ndeje. ¿Mbaerã mbae isiquia eremeë ee ure rã si chô nde?” i que ñee echa je ra. ¹³Echa que ñee ũquî mo je ra. “Mbae icua mo asaã eâte ndeje resê. ‘Denario mii’, nande que ñee nyii resê. ¹⁴Quiatu nembae denario rerao cote. Ae ique ramo nae,

Jesús je ra. —iSererecua! iDavid rucucha! iNdeya eã ño urerese jê! i que eresayã ñee Jesús je ra. ³¹—iJëquiriri chõ jê! i tuchi rei que mbia ñee ee ra. —iSererecua! iDavid rucucha! iNdeya eã ño urerese jê! ibe que eresayã ñee Jesús je ra. ³²Jesús que tiba ñee ee cote ra. —Jenyu rã. ¿Mañi ae ra jêje re? i que Jesús ñee eresayã je ra. ³³—Ureresa embuturã na, Urererecua, i que eresayã ñee ee ra. ³⁴Jesús ia eã tuchi que erese ra. Oco ja que eresa rese ra. Aque mose tuchi que eresayã ndesa turã ja cote ra. Mae turã ngue cote ra. Jesús rui que echoi quia cote ra.

Jesús ngasë Jerusalén

21 ¹Jesús que Jerusalén curubite nyoï quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que hue je ra. Hue si que Jesús uchimbaaquiatu nyeremo mondo ra. ²Ñee ngue ee ra. —Achi súchaa chõ jëso rã. Burro cuasa ra chĩ nguiirĩ ndese jêje huee. Ũquĩ jenyura seru seje. ³Emo ñee mose jêje, “¿mbaerã nda jenyura re?” i mose jêje, jeñee ee. “Nandererecua que ‘jendu’ i ra. Mondo jeibe ra jêje”, jenye ee, i que Jesús ñee ũquĩ nyeremo mondo ra. ⁴Embesa ji cheë io sacua ño ngue ũquĩ nda. I embesa ji huĩ a:

⁵Jeñee Jerusalén jenda je.

“iSã jê! Jenderecua ru quia jêje burro ato co.

Ucuasu esaã saã eãte u quia co.

Burro riirĩ átoo eru quia co”, jenye ee,

i que embesa ji huĩ nyii ra. ⁶Ũquĩ nyeremo ngue Jesús mondo cote ra. Ae riĩ Jesús ñee ee nae, ũquĩ ngue nyecua ja ee cote ra. ⁷Burro que ecuruchoi Jesús je ra. Huiirao que echono ñono burro quite arõ nda. Burro riirĩ quite arõ abe. Jesús que nyui eato cote ra. ⁸Jesús que ngata rei oso quia burro átoo ra. Mbia tubiriã ngue huiirao mbiitee tee nyoï quia ibi rĩ enonde ra. Emo emo ngue sindo mbiitee tee ee no nda. Jesús oso sacua hue rĩ. ⁹Mbia ia tuchi que tasë tasë nda. —Co nandererecua ru quia ngasëte co. Co Dios chimbu ru quia ngasëte nande je co. David rucucha ru quia co. Dios turã tuchi riqui nande je co, i tuchi que mbia quia ñee nda. Ae nyoï quia Jesús nonde nae, ũquĩ. Ae nyoï quia erui nae, ũquĩ abe no. ¹⁰Jesús que ngasë Jerusalén cote ra. Mbia hue jenda ia tuchi que o o ja erese ra. —¿Aba co re? i tuchi que equia Jesús riĩ nda. ¹¹Mbia ataque que echeë sibishorõ nda. —Dios chimondo chõ co re. Jesús i equia ee. Nazaret de Galilea jenda chõ ae re, i que ñee nda.

Jesús mbia mbusë Dios chuchua si

¹²Jesús que oso Dios chuchúaa ra. Huee que mbia riqui mbae isi isi bei ra. Mbae mondo mundo abe mbae isiquia ribishorõ. Ũquĩ ja que Jesús mombo hue si ra. Ae mbae isiquia sibishorõ shorõ nguia, ũquĩ mbae abe que embuchiichere chere ja mesa ra. Mesa aronda resebe. Ae nyurushi

cuasu mondo mondo mbia je mbae ribishorõ nae, ùquĩ nenda abe que embuchiichere chere ra. ¹³Jesús que ñee ùquĩ ja je ra. —“Mbia cheësa Dios je’, i ra mbia Dios chuchua je”, i rei que embesa ji huĩ nda. Jẽ nguia jẽicuã tuchite Dios chuchu a je re. Mbae mbuquiachãsa chuchua jẽsaãte chĩ nguia ee, i que Jesús ñee asite ùquĩ je ra.

¹⁴Jesús siqui mose Dios chuchúaa, mbia resayã ngue nyoĩ nyoĩ erea huee ra. Mbia cuatayã abe no. Jesús que ùquĩ mbucherõ ja ra. ¹⁵Ererecua cuabẽte que chi mae icuã icuã erese ra. Sacerdote rerecua abe no. Embesasa abe no. Jesús chisaã turã ndese mae mose que paama ite ee no ra. —David rucucha turãte riqui co, i mose mbia riirĩ Jesús riĩ, ùquĩ mose que ererecua paama i ja Jesús je ra. ¹⁶—¿Mbia riirĩ ñee erechandu quia re? i que ùquĩ ñee Jesús je ra. Jesús que ñee ee cote ra. —Ae. ¿Embesa ji rese jemaẽ eãte re? “Dios ra mbia riirĩ mbucheẽ turã uturã niĩ”, i que embesa ji ra, i que Jesús ñee ererecua je ra. ¹⁷Jesús que oso mbia rerecua recha ja cote ra. Sucha tubiriã abe recha. Oso que Betãniaa nda. Huee que itõ nda.

Jesús ñee icuã higo i je

¹⁸Isamamimbe que Jesús choi sí quia sucha tubiriã nda. Eriãcuãte abe que nyoĩ quia ra. ¹⁹Higo i mo ndese que mae ñeenda jie ra. Siichã ndei que oso ra. Ea eãte que ee ra. Ero achõte chõ ngue ee ra. Nyebe Jesús ñee nguia higo i je. —Ndea eã mbei r a cote, i que Jesús ñee ee ra. Aque mosebe tuchi que esĩ quia ñimama mano nda. ²⁰Echĩmbaaquiato que nyuruira tuchi mae erese ra. —¿Mañi higo i quia ñimama asite mano nde? i que ñee Jesús je ra. ²¹Jesús que ñee ee ra. —Tacheẽ nyecua jẽje. Ae asaã higo i je nae, jẽ abe ra ùquĩ jẽsaã serã sí, jẽ Dios jẽicua tuchi mose. Jeñee nyee ra sita ibate mo je. “Esiri rã oso am a ndisha ye”, jenyee chee ra sita ibate mo je. Sita ibate ra jeñee mumbayã jẽ Dios jẽicua tuchi mose. ²²“Ã emondo seje”, jenyee mose Dios je, mondo r a jẽje. “Dios ra emondo seje”, jenyee mose jeñiangui re, Dios ra emondo jẽje, i que Jesús ra.

¿Aba nembu re? i mbia ñee Jesús je

²³Jesús que oso Dios chuchúaa ra. Huee que eriqui mbia mbaaquiato quiato ra. Sacerdote rerecua que nyoĩ ñee ee amei ndese ra. —¿Mbaerã ereico mbia mbaaquiato quiato Dios chuchúaa re? ¿Aba “ùquĩ esaã saã” i ndeje re? i que ererecua ñee ja Jesús je ra. ²⁴Jesús que ñee ee ra. —Se rane tacheẽ jẽje. Se rane preguntar tae jẽje. Secheẽ jẽsibishorõ turã mose, ùquĩ mose quiato ra jeñee asibishorõ turã se abe. ²⁵¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra. Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate ñee ee. Nyebe ra ñee nande je. “¿Mbaerã jẽingo eãte erui re

no?” i quiarei ra nande je. ²⁶“Dios eã ngue embu ra”, nande aroneate ñee ee no. Mbia ataque ra paama i tuchi nande je. Juan quiato tuchi quiarei mbia, i que ererecua u ñee ñee nyue ra. ²⁷Ererecua que ñee nyee Jesús je cote ra. —Ureicuayâte. Aba chõ Juan mbu bautizar i sacua mbia je, i que ererecua ñee ja Jesús je ra. Jesús abe que ñee ee cote ra. —Se abe tacheẽ eã ndei jêje no. Ae “ã esaã” i seje nae, aque riĩ nda acheẽ eã jêje no, i que Jesús ererecua je ra.

Acuanindu ndua ndua si

²⁸Jesús que ñeembe ee ra. —I ra ã jêje reae. Sã amei mo ndiirĩ nyeremo no. “Quiatu rã uvas ishao shao seje”, i que amei nguiirĩ ndiquii je ra. ²⁹“Nya” i rei que eriiirĩ ndiquii ñee ngu je ra. Aquere que ndua si chõ oso uvas ishao shao ra. ³⁰“Quiatu rã uvas ishao shao seje”, i rei que amei ñee nguiirĩ nduinda je cote ra. “Se quiatu taso, Paba”, i rei que ee ra. Osoã ño ngue ra. ³¹¿Ma ngu cheẽ mumbayã ùquĩ mo nde? i que Jesús ñee judíos rerecua je ra. —Eriqui chõ ngue ngu cheẽ mumbayã ndesẽ, i que ñee ee ra. Jesús que ñee ee ra. —Tacheẽ nyecua jêje. Cuñandu ata ata riqui Dios cheẽ andu turã jësi ã. Impuestos isi isiquia abe riqui Dios cheẽ andu turã jësi ã. Ûquĩ nda siqui tuchi Dios rese jësi. ³²“Eĩ jenye chõ siqui turã Dios je”, i rei que Juan el Bautista jembaaquiato quiatu ra. Jê nguiatu que echeẽ jemumbate ra. Cuñandu ata ata quiatu que echeẽ isi turã nda. Impuestos isi isiqui a rese. Ûquĩ ndese mae mose abe que jëya eã eã jëicuã ndese no nda. Jê echeẽ isi turã sacua.

Uva raarõsa icuã icuã nguerecua je

³³Ã abe jeñandu. Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao ra. Uco raarõ turã ja sacua. “Sembae uvas jësaarõ”, i que emo je cote ra. Ae que oso isho itõte cote ra. ³⁴Uva quiche mose que ngũimba mo mondo rei umbaerã ndea ra. ³⁵Uva raarõsa que erimba mbucuasẽ icuã ño nda. Iruã nua ño ngue ra. Echa que ngũimba nongue mo abe mondo rei erea ra. Eraarõsa que aque iquia ra. Enongue que echei chei tuchi mbuqui sita je ra. ³⁶Eĩ eĩ mbei que eraarõsa quia echa rimba ja je ra. ³⁷Aquere que echa nguiirĩ mondo erea cote ra. “Ireĩ ireĩ jiri ra seriirĩ si”, i rei que ra. ³⁸Uva raarõsa mae mose erese que ñee nyue ra. “iCo eriiirĩ ndu quia co cote jê! iNandeiquia rei jê! ĩ nda uvas nandembaerã ae tuchi cote”, i que ñee nyue ra. ³⁹Eraarõsa que eriiirĩ isi icuã cote ra. Curuchoi que pe jiri iquia ra. Mano ngue cote ra. ⁴⁰¿Mañi nda echa quia eraarõsa je cote re? i que Jesús ñee mbia je ra. ⁴¹Mbia que ñee ee ra. —Echa ra eraarõsa icuã iquia ja cote. Uva i ra emondo emo je eraarõ sacua cote. Ûquĩ nguia ra embaerã mee turã turã ee equiche mose, i que mbia ñee Jesús je ra.

⁴²Jesús que ñee mbia je ra. —¿Ã embesa ji rese jemae ãte re?

Sã emo ndiqui tuchia ao sita je no.

Sita mo ngue equirirõ mombo ra.

Eicuãte eriqui reĩ nguiã ee.

Aquere Dios emundua si erese. “Earonda sacuã turambi chõ eriqui re”, i ndua si uchimombo rese.

Uchimombo que esirõ si cote ra.

Dios chiao chõ ùquĩ nde.

Dios chiao turã tuchi riqui nande je ã,

i ñi embesa ji re. ⁴³Tacheẽ nyecua jẽje. Jenderecua eã nyee ra Dios cote. Ae miamo nda Dios icua nae, ùquĩ nderecua quia ra Dios cote. ⁴⁴Ae ra ngoi aque sita arõ nae, ùquĩ nda huẽ. Aque sita ngoi mose emo arõ, ùquĩ nda mano no, i que Jesús ra. —Aque sita rã ndei se, i chõ ngue re.

⁴⁵Sacerdote rerecua que Jesús cheẽ ñandu ja ejemplos ra. Fariseos abe echandu ja. —Urerii ño eriqui nguiã ñee co, i que ndua ndua ra. ⁴⁶Paama i tuchi que Jesús je ra. Jesús nda eisi icuã nguiã ña. Siquiche quiatu que mbia si ra. —Dios cheẽ na si tuchi chõ Jesús riqui nguiã ñee co, i jate quiatu que mbia ataque quia ra.

Jenyu quiaru serese, i raque emo uquiato je

22 ¹Jesús que ejemplo mo senei mbia je ra. ²—“Jenyu serea”, i raque Dios quia emo emo je co. Sã ererecua mo ndiqui ñee mbia je no. “Jenyu quiaru serese”, i rei que uquiato je ra. Eriirĩ ngüinisi rea ramo mose. ³Mbae quiche ja mose que ngüimba mo mondo rei mbia mbiirandu ra. Mbia que ngaẽ sereã nea ja chõ erea ra. ⁴Ngüimba mo ngue emondobe rei erea ra. “Mbae quiche jate que ra. Ticuasú quira tuchi que equishĩ nda. Eriirĩ ngüinisirã isi ramo ndese jëso mae. Jëso quiaru erese”, i rei que erimba mbia je ra. ⁵Ae je “jenyu” i nae, ùquĩ ngue echeẽ mumba ja chõ nda. “Co aso quia seco co”, i que emo nda. “Co aso quia mbae mo naa naa se co no”, i que emo no nda. ⁶Mbia que teã teã ja ra. Ererecua rimba iruã nua ño ngue ra. Eiquia chee. ⁷Ùquĩ mose que ererecua paama i tuchi ra. Soldados que emondo ngüimba iquiasa iquia iquia ra. Echuchua abe rei rei. ⁸Ererecua que ñee ngüimba je cote ra. “Mbae quiche chi ja raque a. Ae je ‘jenyu’ ae rei nyii nae, sã ùquĩ ngaẽ eã. Eicuãte quia ñene. ⁹Jëso ñee mbia ja je. Ishonda ja je. ‘Jenyu ja ererecua riiirĩ ngüinisi rerequia ramo ndese mae’, jenyu oso quia mbia mbuchesea sea”, i que ererecua ñee nda. ¹⁰Erimba que nyoĩ mbia mbiirandu randu ja ra. Mbia turã mbiirandu. Mbia icuã abe mbiirandu randu no. Mbia que ngaẽ tuchi cote ra. Tuchia itãyã nyee que ra.

¹¹Ererecua que ique mbia tubiriã ndese mae cote ra. Emo irao icuãte que chi ee huee ra. Tiru ererecua chimondo emingue eã ñochĩ nguia reaẽ. ¹²Ererecua que ñee ee ra. “Seriirĩ ndiqui ngüinisirã isi a resẽ. ¿Mbaerã ndeirao turã eremingue eã nde?” i que ererecua ñee ee ra. Ñee

eâte que ererecua cheẽ mose ra. ¹³Ererecua que ñee ngũimba je cote ra. “Co jẽisi jẽ. Eo jenyucua. Ei abe jenyucua. Jenosẽ serao mombo itaicuee itondaruqui re. Huee ra nyeseo tuchi. Huee ra ureĩ quiti quiti tuchi”, i que ererecua ñee nda. ¹⁴“Jenyu serui” i tuchi Dios quia mbia ja je co. Mbia mii mii ño eisirõ sirõ nguiã co, i que Jesús ñee nda.

¿Impuestos ra uremee ererecua je re? i mbia ñee Jesús je

¹⁵—Jesús nandembucheẽ icuã na. Ñ nda mbia paama i ee, i que fariseos ñee ñee nyue ra. ¹⁶Nyebe fariseos uchimbaaquiato mo mondochoi nguiã Jesús rea. Herodes chimbaaquiato rese. Jesús mbucheẽ icuã sacua ño ùquĩ nde. Utura ñgue esaã ñooño Jesús je ra. —Jesús, co ereico mbia mbaaquiato quiato turãte co. Ndeturãte ereico mbia ja je co. Co ereico turãt e mbia mbuchiabiã co. Mbia erembaaquiato quiato turãte quia Dios icha riĩ co. ¹⁷Nyebe urechu nguiã ñee ndeje a. ¿Coche mbia mbae isiqui a mee mee Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra. ¹⁸Jesús que ùquĩ icuã icuate ra. Nyebe ñee nguiã ee. —¿Mbaerã jẽingo “ĩ nda Jesús ucheẽ nyabi”, i seriĩ nde? ¹⁹Mbae isiquia mo jẽteacuquia imbu seje, i que ee ra. Mbia que eteacuquia ee ra. ²⁰—¿Aba mbae nombre ñi mbae isiqui a rese a re? ¿Aba aqũ aingue abe ñi a re? i que Jesús ee ra. ²¹—Romano nderecua, i que ñee Jesús je ra. Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee no, i que Jesús ee ra. ²²Mbia que nyuruira jate u Jesús cheẽ andu ra. Nyoĩ ja que erecha cote ra.

Mbia raaque ra quera si, i Jesús

²³—Mbia raaque ra quera eã mbei, i que mbiamo nguia ñee nda. Saduceos i que ùquĩ je ra. Ùquĩ mo ñgue nyoĩ ñee Jesús je ra. ²⁴—Sererecua, ã ñgue Moisés mbesa nande je ra: “Emo mano mose eriiriã, sã enongue mano je ninisi rerequia erendaque re. Sã tiiri ngõngue raaque riĩ”, i que Moisés embesa nande je ra. ²⁵Eriqui mo ñgue siqui urerese ra. Seis que eribi ra. Eriqui que ngũinisirã quereco rei ra. Mano ño ñgue tiiri ndocoĩ ngũinisi recha ra. Enongue que nguiqui checha quereco rei cote ra. ²⁶Ae abe que mano ño tiiri ndocoĩ no nda. Ùquĩ seis que ngõngue checha quereco ja rei ra. Mano ja chõ ñgue tiiri ndocoĩ no nda. ²⁷Eninisi eru checha que mano nyee chõ cote no nda. ²⁸Siete rei que eru nyii ra. Mbia raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chõ ñgue re. ²⁹Jesús que ñee ee ra. —¿Mbaerã jẽingo Dios cheẽ icua eãte ã nde? Jẽingo Dios cheẽ abi tuchi ã. Jẽingo Dios quiracuã icua eãte ã. ³⁰Ae raaque ra Dios mbuquera si nae, ùquĩ nda ngũinisi quereco eã mbei huee cote. Ùquĩ nda ngu quereco eã mbei huee cote no. Angeles rã mbei ra mbia riqui huee ibate cote. ³¹Mbia raaque quera si riĩ ño ñgue

Dios jembiirandu rei ra. ¿Embesa ji rese jemaē āte re? ³²Ā ño Dios cheē embesa ji re:

Abraham nderecua chō aico nguiā se co.

Isaac nderecua abe.

Jacob rerecua abe no,

i que embesa ji ra. Ā ngue mano ndei nyii ra. Eresco siqui bei chō nguiā namo ā. Mbia raaque rerecua eā ño Dios re. Mbia reco rerecua chō ae re, i que Jesús ñee mbia je ra. ³³Mbia tubiriā ngue chi nyuruira tuchi eandu ra. Jesús mbae icua ja mose.

Echeseccua tuchi quia Dios rese

³⁴Jesús cheē aquiatu tuchi que ra. Nyebe saduceos cheē mbutiba nguiā. Fariseos jirandu mose erese que ñumunua ñee nyue ra. ³⁵—Se chō tacheē Jesús je. Ma Jesús ñee icuā, i rei que fariseo mo nda. Embesasa que ae ra. ³⁶—Jesús, Dios cheē tubiriāte riqui ā ndesē. Mbia echeē mumbayā sacua. ¿Ma Dios cheē ndiita tuchi ma nde? i que fariseo ñee Jesús je ra. ³⁷Jesús que ñee ee ra. —Ā ño Dios cheē ndiita ā nde: “Echeseccua tuchi quia Dios rese. Ndechĩā je. Neaĩ je abe. Nendua ndua je abe”. ³⁸Ūquĩ ño Dios cheē ndiita ūquĩ nde. Ūquĩ ño Dios cheē ñiinda ūquĩ nde. ³⁹Ā abe rei ūquĩ nduinda ā no: “Sā ereico nyeseccua ndechiese no. Eĩ ere si chō nyeseccua mbia rese”. ⁴⁰Moisés chimbasa tuchi chō ūquĩ nde. Dios quiato cose ndare chimbasa ja chō ūquĩ nde, i que Jesús ra.

¿Aba rucucha Cristo re?

⁴¹Fariseos chichō mose ñumunua ngue Jesús ñee ee ra. ⁴²—¿Aba rucucha Cristo re? ¿Aba jenye equia ee re? i que Jesús ñee ee ra. —David nducucha chō ñene, i que fariseos ñee nda. ⁴³Jesús que ñee ee cote ra. —¿Mbaerā David “sererecua” i ee re no? Espíritu turā embucheē mose. ⁴⁴Ā ngue David ñee nda:

Dios que ñee Cristo sererecua je ra:

“Ecoi seji. Nde abe ra ererecua serese.

Ae ndeucuayāte quia nae, ūquĩ je ra ndequirācuā atecuquia tuchi.

Ndequirācuā tuchi chee ra ūquĩ si”, i que Dios ñee sererecua je ra, i que David ra. ⁴⁵David sí chō “sererecua” i nguiā Cristo je. Cristo David rucucha mose, ¿mbaerā David “sererecua” i ee re? i que Jesús fariseos je ra. ⁴⁶Ūquĩ ngue ñee aquiatuāte Jesús cheē ndibishorō nda. Aque mose bei que mbia preguntar i eā mbei Jesús je cote ra.

Jesús ñee asi fariseos je

23 ¹Jesús que ñee uchimbaaquiato je ra. Mbia tubiriā je abe no. ²—Fariseos rā nda jēngochĩ jē. Embesasa rā abe ra jēngochĩ jē. “Ure quia Moisés chimbasa ureicuate nguiā ure ā”, i chō nguiā. ³Coche

jëingo nguiã echeẽ mumbayã ndaque. Erã sí quia nda jëingoã nguiã. Echeẽ turã turãte raque. Siqui turã eãte quiatu nguiã. ⁴Dios cheẽ embeta mbeta tuchichĩ nguiã mbia je ã. Mbia echeẽ mumbayã aroneate chee quia ã. Eya eã eãte eriqui mbia rese ã. ⁵Mbae turã naa mose, mbia mae sacuaã erese chõ ùquĩ nde. Tiru huiirao ibi quitinda ai mbiicoi tuchi equia ã. Dios cheẽ mbesa ji echucua bei quia uchiba cúa rese ã. Mbia mae sacuaã erese chõ eriqui nguiã ùquĩ naa naa ã. ⁶Aba mbia eã tuchi fariseos. “Serendarã turã nguiatu se jẽ”, i tuchi equia mbia chumunua nua mose ã. ⁷“Sã mbia ererecua i nande je”, i beite equia ã. Ebi tuchi “mbia mbaaquiatusa” i mose ee. ⁸“Mbia mbaaquiatusa rei se”, jenyechĩ nda jẽ. Se miĩ ño jembaaquiatusa re. Nyiesenda chõ jẽ nde. ⁹“Paba” jenyechĩ nda mbia mo je jẽ. Jendu miĩ ño siqui nguiã ibate pe. ¹⁰“Ererecuarã se”, jenyechĩ nda eno. Se miĩ ño jenderecua re. ¹¹Jemo siqui mingue mose, mbae raã naa mose uataque je, aque quia ra ererecuarã. ¹²Ae ucuasu raã naa nguiã nae, mbia ñetẽ nda Dios saã ño ùquĩ je. Ae siqui mingue quia nae, mbia rerecuarã ño nda Dios saã ùquĩ je.

¹³Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jëcuasu jësaã saãte quia ã. Jëingo sereãte quia Dios rese ã. Mbia siquise mose Dios rese, jëingo emingo eãte erese ã no. ¹⁴Aba mbia eã tuchite jẽ. Eru cheecha mbae jembutiã tiã ñochĩ nguiã ã. Ùquĩnde jëingo chõchĩ ñee oco oco Dios je ã no. “Ï nda mbia mae nanderese” jenye chõchĩ equia ã. Nyebe ra Dios jembasi tuchi cote. ¹⁵Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jëcuasu jësaã saãte quia ã. “Jëingo ure rui” jenye bei chõchĩ equia mbia je ã. Ùquĩ mo siqui mose jendui, eicuã tuchi chõ ùquĩ abe cote re.

¹⁶Aba mbia eã tuchite jẽ. Sã eresayã mo ndiqui emo ndesayã mbuti echiba rese no. Ùquĩ na ño jẽ nde. Jëaquiutuã ño mbia mbaaquiatu quiatuchĩ nguiã. “Jurar jenye mose Dios chuchua riĩ, coche jeñee jembuchebi nguiã”, jenye chõchĩ nguiã mbia je ã. “Jurar jenye mose oro Dios chuchua jenda riĩ, ùquĩ mose quiatu jeñee jembuchebi aroneate nguiã”, jenye chõchĩ nguiã mbia je ã. ¹⁷¿Oro quiatu i tuchi jiri Dios chuchua si re? ¿Mbaerã jëaquiutuãte riqui re? ¹⁸“Jurar jenye mose altar riĩ, coche jeñee jembuchebi nguiã”, jenye chõchĩ nguiã mbia je ã. “Jurar jenye mose ofrenda altar jenda riĩ, ùquĩ mose quiatu jeñee jembuchebi aroneate nguiã”, jenye chõchĩ nguiã mbia je ã. ¹⁹Eresayã na tuchi chõ jëingochĩ nguiã. ¿Mbaerã jëaquiutuãte riqui re? ¿Ofrenda quiatu i tuchi jiri altar si re? ²⁰Jurar jenye mose altar riĩ, earonda abe riĩ ño jëingo nguiã jurar i ofrenda. ²¹Jurar jenye mose Dios chuchua riĩ, Dios abe riĩ ño jëingo nguiã jurar i. Dios abe quia siqui nguiã uchuchua huee. ²²Jurar jenye mose ibei riĩ, Dios renda abe riĩ ño jëingo nguiã jurar i. Dios sí riĩ abe no.

²³Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jëcuasu jësaã saãte quia ã. Décimo jemee mee ndaque quia Dios

je mbae ñetẽ nii. Comino. Menta. Anís. Dios cheẽ ndiita quiatu jemumba mumbate nguiã. Dios jêicua rã nyii. Jêingo turã na nyii. Jêya eã na mbia rese nyii. Aquere quiatu mbae ñetẽ jêsaã cote. ²⁴Sã eresayã mo ndiqui emo ndesayã mbuti echiba rese no. Ûquĩ na ño jê nde. Mbae ñetẽ jêsaã turã turãte raque quia ã. Dios cheẽ ndiita quiatu jemumba mumbate nguiã. ²⁵Aba mbia eã tuchite jê, Embesasa. Aba mbia eã tuchite jê abe no, Fariseos. Jêcuasu jêsaã saãte quia ã. Sã emo ndiqui i riru irei irei earonda no. Eimi nguiatu eirei quiiriãte re. Eĩ ño jê no nde. Jêturã aba reã ño jêaronda no nde. Jeñiangui renda quiatu eicuã icuãte re. Mbae quia jembuquiachã quiachãte nguiã. Mbae abe quia jenyosei icuã icuãte nguiã. ²⁶Eresayã na tuchi chõ jêingochĩ jê nde, Fariseos. Jeñiangui renda rane nguiatu jêirei. Jêaronda abe ra equishĩ cote.

²⁷Aba mbia eã tuchite jê, Embesasa. Aba mbia eã tuchite jê abe no, Fariseos. Jêcuasu jêsaã saãte quia ã. Mbia raaque tãsa rã ño jêingo nguiã. Eati ji turãte raque. Eimi ye quiatu mbia raaque quiangue chi nguiã hue. Eroo cuĩ abe no. ²⁸Eĩ si chõ jê nde. Jêaronda turãte aba reã ndiqui raque mbia je. Jeñiangui rend a quiatu eicuãte re.

²⁹Aba mbia eã tuchite jê, Embesasa. Aba mbia eã tuchite jê abe no, Fariseos. Jêcuasu jêsaã saãte quia ã. Ae mbia turã mano cose nae, ùquĩ tãsa jembiiã turã mbeite raque quia ã. Dios cheẽ mbuchecuasa tãsa abe no. ³⁰“Cose ureico mose, i nda ureicuã eãte rei Dios quiato je. Ureramei na eã”, jenyete raque equia ã. ³¹“Mbia iquia iquiasa riirĩ ño ure re”, jenyete equia ùquĩ. Jendu rã si tuchi jê. Mbia i quiasa. ³²Jenamei icuã na si chõ jêingo no. ³³Mbei tásie rã tuchi chõ jê nde. Eĩ jenyete bei oso quia aque ngasẽ nyee tata cuasu. ³⁴Nyebe ra Dios cheẽ mbuchecuasa amondo mondo quia jêje. Mbia mbaaquiatusa ra amondo jêje. Mbia aracua abe no. Jê nda sechimondo emo emo jêiquia. Emo emo nda jêiruã nua mbia chumunuásaa no. Jêico ico ra equia erese eiquia chee. ³⁵Ae Dios quiato iquia iquia quia cose nae, ùquĩ nii nda Dios jembasi cote. Sã mbia Abel iquia cose no. Sã mbia Zacarías abe iquia Dios chuchua jii no. Berequías riirĩ ndei aque. Sã mbia Dios quiato iquia iquia bei cose no. ³⁶Ûquĩ ja riĩ nda Dios jembasi cote. Acheẽ nyecua quia jêje a.

Jesús ia eã tuchi Jerusalén jenda rese

³⁷Tacheẽ na jêje, Jerusalén jenda. Seya eãte aicochĩ jendese co. Hue jêingo mbia iquia iquia beite hue. Dios cheẽ mbuchecuasa iquia iquia. Dios chimondo abe iquia iquia no. Sã nguira riqui nguiire reaquiato mondo ujeoqui re no. “Eĩ tae jendeaquiato”, ae beite rei nguiã jêje co. Secheẽ jêisi sereã mbei chõchĩ nguiã ã. ³⁸Iaico jendecha a cote jê! ³⁹Jemae mae eã nda serese cote. Sechube mose ibate si, aque ramo mose ra jemae serese cote. “iCo chi Dios rucucha ru quia co cote jê!” i ra mbia seisi turã aque mose cote, i que Jesús ñee nda.

Mbia ra Dios chuchua mbucoi ja, i Jesús

24 ¹Jesús que oso usē Dios chuchua si cote ra. Ecuata mose que echimbaaquiatu ñee ee ra. —Sā Dios chuchua turā tuchite jē, i que ñee ee ra. ²Jesús que ñee ee ra. —Tacheē nyecua rā jēje. Ae rese jēingo mae ā nae, ũquĩ nda mbia mbucoi ja cote. Sita mo nda chi eā nyichuarō Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chō ā nde

³Jesús que chĩ ngoi huee ibi ibátee mo nda. Monte de los Olivos i que hue je ra. Echimbaaquiatu que ngasē ñee eísaa ra. —¿Manosete ra ũquĩ nde? ¿Mbae ra urembiirandu nderese ndechu serĩ mose re? ¿Mbae ra urembiirandu mbae ua ja serĩ mose re no? i que echimbaaquiatu ñee Jesús je ra. ⁴Jesús que ñee ee ra. —Jētesa jiri quia jē. Mbia mo nda jembĩĩrĩ irĩchĩ ñee jēje jē. ⁵“Cristo chō se re”, i ra mbia ñee ata atate jēje. ũquĩ ñee nda jeñanduchĩ jē. ũquĩ nda mbia mbiĩrĩ irĩ jate. Ñee ñooño je chō ũquĩ nde. ⁶Mbia ra guerras saā saā tuchi. Mbia ra ñee ñee tuchi quia nyĩiquia iquia je rĩĩ. ũquĩ mose ra jēsiquichechĩ jē. ũquĩ ja rane nda nyecua raque. Aque mose ra mbae ja ua eā ná. ⁷Mbia ra guerras saā tuchi chee. Nyĩiquia iquia tuchi rae. Mbia riācuā tuchi ra aque mose no. Emo ñooñoa tuchi ra mbia rasi. Mangue chooñoa tuchi ra ibi nyere nyere. ⁸Jembasi ramo mose chō nda ũquĩ nde. Aquere ra jembasi tuchi cote.

⁹Mbia icuā icuā tuchi r a jēje serĩĩ. Nguerecua je ra mbia jenderao rao tuchi. Jēiquia chee rae. Mbia mangue chooñoa jenda ra jēucuyā tuchi serĩĩ. ¹⁰Ae siqui quia serui nae, ũquĩ tubiriā nda hui sesi ũquĩ mose cote. ũquĩ nda nyiucuyā. ũquĩ nda nguerecua mbuqueta queta tuchi ngōngue rĩĩ. ¹¹“Dios cheē mbuchecuasa chō se re”, i ra mbia ñee ata atate jēje. ũquĩ nda mbia mbiĩrĩ irĩ tuchi. ¹²Mbia icuā icuā tuchi ra cote. Aba cheē mumba mumba beite ra cote. Mbia ra nyesecua eā tuchi nyiese cote. ¹³Ae ra siqui bei serese, ũquĩ nda Dios mingo bei. ¹⁴Sequiato r a Dios cheē turā senei senei ná mbia ja je nyii. Mangue chooñoā jenda ja je. Aquere ra mbae ua ja cote.

¹⁵Dios cheē mbuchecuasa rei Daniel. Ae que embesa Mbae Mbutiāsa İcuā niĩ nda. “Dios rendaque re taico se quiatu”, i ra equia huee. (Ae ra mae nguia sechimbese rese nae, sā ũquĩ eicua.) ¹⁶Jemae mose Mbae Mbutiāsa İcuā ndese, jeña esi. Ae siqui quia Judéaa, sā ũquĩ uchā jei choi ibi ibátee mo. ¹⁷Ae ra siqui tuchua quite rese, sā ũquĩ iqueā nyoi uchuchua uquichi mose. Sā echoi chō uchā hue si bei, umbae rirō ndocoĩ. ¹⁸Ae ra siqui úcoo, sā ũquĩ nyebiā ngaē huiĩrao rea. Sā hue si bei chō echoi uchā. ¹⁹Aba mbia eā tuchi ra emo āquē ndiru rerequia mose aque mose. Nguiĩrĩ mbuquiambu je abe no. ²⁰“Nyiiiseĩ mose eā urechā” jenyee

Dios je. “Sábado mose eã abe urechã”, jeny e abe Dios je no. ²¹Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacua ño ùquĩ nde. ²²Ae rasi ra mbia saã tuchi nae, ùquĩ nda Dios mbujua jiri uquiato riĩ. Ñ nda emo ñimbiracuã eã tuchi rei ùquĩ ndasi je. ²³“A Cristo riqui a jẽ” i mose emo jẽje, “nyia” jenyechĩ nda ùquĩ ñee mose jẽ. “Hue Cristo riqui hue jẽ” i mose emo jẽje, “nyia” jenyechĩ nda eno jẽ. ²⁴“Cristo chõ se re”, ichõĩño nda mbia ñee ata atate jẽje. “Dios cheẽ mbuchecua chõ se re”, ichõĩño nda mbia ñee ata atate jẽje no. Mbia mae sayã nda esaã saã tuchi mbia mbiirĩ irĩ sacua. Ùquĩ Dios quiato abe chee mbiirĩ irĩ arõte. ²⁵Ùquĩ nonde chõ aico nguiã jembirandu randu co. ²⁶“Hue Cristo riqui turuquia hue”, ichõĩño nda mbia jẽje seriĩ. “A Cristo riqui tuchia a”, ichõĩño nda emo jẽje seriĩ no. Ùquĩ mose ra “nyia” jenyechĩ jẽ. ²⁷Sã amandiqui pirirã i ibei resae ja no, eĩ nda sechu mose. Mbia ra mae ja serese. ²⁸Sã urubu riqui mae ja mbae raaque rese no. Eĩ si ra seicua mae ja sechu rese no.

Dios riirĩ nda tube ibate sã

²⁹Mbia ùquĩ ndasi raã ja mose r a tenda checuayã mbei cote. Nyasi abe no. Nyasitata ra ngoĩ ngoĩ. Ibei jenda abe ra quiata quiata chee cote no. ³⁰Aque mose ra achu ibei rese. Senininya tuchi ra sechu mose. Sequiracuã tuchi ra sechu mose no. Mbia ra mae ja tuchi sechu rese mangue chooñoa jenda ja. Mbia ia eã tuchi ra nyeseo mae mose serese. ³¹Angeles serimba ra amondo corneta mbucheẽ sacua. Ùquĩ nda mbia sechiisirõ munua nua ja seje cote. Ishonda ja. Mangue chooñoa jenda ja. ³²Sã higuera riqui no. Sã ira mo ndiqui no. Ero quira usẽ j a mose, “iraro itõ ndacu ra cote”, i chõ mbia nguiã aque mose. ³³Eĩ sí ra mbae ua ja nonde. Ae riĩ aico ñee jẽje nae, ùquĩ ndese jemae mose, “mbae ra ua ja cote” jeny e ra cote. ³⁴Tacheẽ nyecua jẽje. A mbia riqui ngata ibi ã nae, ùquĩ emo emo nda manoã mbae ua ja nonde. ³⁵Ibei ra ua. Ibi abe ra ua no. Secheẽ nguia ra ua eã mbei.

³⁶Manosete chõ nda mbae ua ja. Aico eicuayãte co. Mbia mo abe eicuayãte quia ã no. Angeles abe eicuayãte quia ã no. Paba miĩ ño eicua nguiã co. ³⁷Sã Noé mosenda mbia siqui sereãte Dios rese cose no. Eĩ si ra mbia siqui sereã Dios rese sechu nonde no. ³⁸Sã Noé mosenda mbia quiaru chooño no. Ndua rocoĩ Dios rese. Ngüinisirã ngue equereco chooño ndua rocoĩ Dios rese no nda. Noé que ique chee arca ye ra. Amandi cuasu nonde. ³⁹Ama ngue uchi u quia mbia iquia ja nonde cote ra. Mbia mbua tuchi que ra. Eĩ ae ra u mbia mbua tuchi sechu mose. ⁴⁰Sechu mose ra mbia nyeremo siqui úcoo. Co miĩ nda arao. Enongue ra siquichõ. ⁴¹Cuña nyeremo nd a chi raque mbua tocho no. Co miĩ nda arao. Enongue ra siquichõ. ⁴²Jëtesa bei quiatu quia serese. Ae mose ra

achu, aque tenda rese jëiranuate riqui ã. ⁴³Mbaecha mo jirandu mose mbae mbuquiachãsa rese, “co isa ra eru” i mose, ùquĩ mose nda uqueã nde chaẽ. Ñ nda mbae mbuquiachãsa mbae sirõ eã ndei. ⁴⁴Jëingoquiatsu bei quiatsu quia seraarõ arõ. Jendua eã mose serese ra achu jembuate.

Erimba echeẽ mumbayã mose, eya tuchi rae

⁴⁵Dios rimba aba cheẽ mumbayã je aico ñee a. Dios rimba aquiatsu je aico ñee a. Sã ererecua mo ñee ngũimba turã je no. “Sembae esaarõ turã ja quia secutiã. Serimba ataque embuquiaru quiaru turã secutiã”, i que ererecua ee ra. ⁴⁶Erimba echeẽ mumbayã mose, ererecua ia tuchi ra eru mose. Erimba abe ra eya tuchi no. ⁴⁷Ererecua ra ngũimba mii umbae raarõ mbei sacua cote. ⁴⁸Sã erimba ndua ndua uchiangui re no. “Sererecua ra tu jei ãte” i ndua ndua. ⁴⁹Hue ñee icua icua uataque je hue cote. Iruã nua cote. Quiaru chooño cote. Mbae mbei chooño abe cote. Quiacua quiacua mbia icua ndese cote. ⁵⁰Sã ererecua ruchĩ nguia ngũimba mbuate aque mose cote jẽ. ⁵¹Ererecua ra eiruã nua tuchi. Mombo rae. Mbae rasi ra esaã tuchi. Ae ucuasu saã saã nguia nae, ùquĩ ndese ra mbae rasi raã tuchi cote. Nyeseo seo tuchi ra equia. Ureĩ nda equiti quiti tuchi.

Nyucuaaque icoquiatsu je

25 ¹Nyucuaaque icoquiatsu je rã si rei Dios rimba. Sã nyucuaaque diez nyoĩ quia emo ngũinisi nderequia ramo ndese maenno. Lamparina nendi que ecuruchoĩ ja quia ra. ²Cinco que icoquiatsu je ra. Cinco que icoquiatsuã je no nda. ³Ae icoquiatsuã nae, ùquĩ ngue mbae quira curuchoĩ eã umbae lamparina mombisẽ sacua nda. ⁴Ae icoquiatsu nae, ùquĩ ngue mbae quira curuchoĩ botella ye ra. Lamparina ye abe. ⁵Ae ra ngũinisi isi reĩ nguia ee, aque que itõte ee ra. Nyucuaaque reesi esi chee que ra. Uque uque ja chee que ra. ⁶Itondiite mose que to i andu cote ra. “Co erurã ndu quia co cote jẽ. Jëso mae erese cote”, i que mbia tasẽ tasẽ ee ra. ⁷Nyucuaaque que nyuruã ja cote ra. “Nandembae lamparina nandemombisẽ mbisẽ ja”, i rei que ra. ⁸Ae icoquiatsuã nae, ùquĩ ngue ñee ndei icoquiatsu je ra. “Urembae uque uquete. Mbae quira ñetẽ jemee mee na ure je”, i rei que uataque je ra. ⁹“Ateẽ. Nande ja chayãte ra resẽ. Emo jëisi chõ oso icua”, i que icoquiatsu je ñee ee ra. ¹⁰Nyoĩ rei que equia eisi cote ra. Ecutiã ngue erurã ndu cote ra. Nyucuaaque icoquiatsu je que nyoĩ ique erese ra. Ngũinisirã isi ramo ndese mae. Quiaru abe que echoĩ erese ra. Eiquesa que ematã cote ra. ¹¹Icoquiatsuã je abe que ngaẽ nyee ra. I que eiquesa matã ji mi ee ra. “Embuquiata rã ure je”, i rei que ñee eru je ra. ¹²Eru que ñee ee ra. “Tei. Jaëicuayã tuchi se”, i que eru ñee ee ra, i que Jesús ñee mbia je ra. ¹³—Jëingoquiatsu bei quia jẽ. Ae mose ra achu, ùquĩ jëicuayãte quia ã.

Ererecu a mbae isiquia mbuchao chao ngũimba je

¹⁴Sã ererecu mo mbae isiquia mee mee ngũimba je no. Eĩ si chõ Dios nguiã mbae mee mee ngũimba je. Ererecu oso serĩ mose que umbae mbae isiquia mee mee ngũimba je ra. Embaata ata sacua ño ngue emee nguiã ee. ¹⁵Cinco mil que emee emo je ra. Dos mil enongue je no. Un mil que enongue je no nda. “Jenya chõ tamee mee jẽje jẽ”, i que ñee ee ra. Secha que oso isho cote ra. ¹⁶Ae je ererecu cinco mil mondo nae, aque que negocio saã saã mbae isiquia je ra. Mbae isiquia que embaata tuchi ra. ¹⁷Ae je ererecu dos mil mondo nae, aque abe que negocio saã saã mbae isiquia je ra. Mbae isiquia que embaata tuchi no nda. ¹⁸Ae je ererecu un mil mondo nae, aque que ibi sibicoi mbae isiquia rerecoquiato sacua nda. ¹⁹Emo mose tuchi que ererecu ru cote ra. Ñee ngue ngũimba je cote ra. “Jenyu sembiirandu sembae mbae isiquia rese cote”, i que ñee ee ra. ²⁰Ae je cinco mil mondo nae, aque rane ngue tu ñee nguerecu je ra. “Cinco mil que ereme ndei seje nae, uqui ngue ambaata ra. Cinco mil que aisibe ra”, i que emee ja nguerecu je ra. ²¹Ererecu que ñee ee ra. “Coche ñene. Nde quiarei serimba turã tuchi. Mbae ñetẽ ngue eresaã turãte nde ra. Nyebe ra mbae tubiriã ereteaquiato seje cote. Ndeya bei tuchi ra ereico serese cote”, i que ererecu ñee ee ra. ²²Ae je ererecu dos mil mondo nae, aque que tu ñee nguerecu je cote ra. “Dos mil que ereme ndei seje nae, uqui ngue ambaata ra. Dos mil que aisibe ra”, i que emee ja nguerecu je ra. ²³Ererecu que ñee ee ra. “Coche ñene. Nde quiarei serimba turã tuchi. Mbae ñetẽ ngue eresaã turãte nde ra. Nyebe ra mbae tubiriã ereteaquiato seje cote. Ndeya bei tuchi ra ereico serese cote”, i que ererecu ñee ee ra. ²⁴Ae je ererecu un mil mondo nae, aque que tu rei ñee nguerecu je cote ra. “Nde que ere queteãte quiato nguiã mbae rese. Ndechitiquia eã abe ereishao shaote quia co. ²⁵Nyebe asiquiche tuchi nguiã mbae isiquia mee mose seje. Nyebe achati nguiã ibi je. Co é co resẽ”, i que ñee nguerecu je ra. ²⁶Ererecu que ñee ee ra. “Aba rimba biã tuchi quiarei nde. Ndetomei tuchi chõ eriqui re. Sequeteã mose mbae rese ndeje, ¿mbaerã secheẽ eremumba re? ²⁷Sembae mbae isiquia eremonaõ ñochĩ banco. Ī nda eata jiri sechu mose cote re chã”, i que ererecu ñee asite ee ra. ²⁸Ererecu que ñee mbi a hue jenda je cote ra. “Mbae isiquia jēsirõ na esi un mil. Ae diez mil quereco nae, aque je jemondo. ²⁹Ae embae tubiriãte nae, aque je mbae tamondobe. Ae embae ãte nae, embae ñetẽ tasirõ ja esi. ³⁰Co que serimba icua tuchi ra. Jemombo itondaruqui re. Mbae rasi ra esaã tuchi huee. Huee ra nyeseo tuchi. Ureĩ nda equiti quiti tuchi”, i que ererecu ñee nda.

Jesús ra mbia emo emo mingo icúe umbaerã

³¹Sechu mose íbii mbia rerecuarã, ángeles sembae ra semama tuchi aque mose. Serenda nininya tuchi ra aque mose. ³²Mbia mangue choñoa

jenda ja ra chi ñumunua huee aque mose. Mbia emo emo nda achono icúe sembaerã aque mose. Sã oveja raarõsa riqui ovejas no icúe chivos si no. ³³Uquiato cuti ra ovejas no. Uquiato cutiã nda chivos no no. ³⁴Eĩ ae ra se mbia rerecua tuchi mose. Acheẽ nda mbia sequiatio cutinda je. “Jenyu serese. Jenderecua turã tuchi ra aico jėje. Paba turãte riqui jėje co. Paba que jęirabo nyii mbae ao nonde ra. Jęingo sacua serese. ³⁵Seriãcuã mose que mbae jemee seje ra. Seisei mose que sembiu ra. Sechuchua eã mose que seisi turã no nda. ³⁶Seirao eã mose que tiru jemee seje ra. Serasi mose que jęso mae serese ra. Seico mose cárcel que jęso mae serese no nda”, ae ra ñee sequiatio cutinda je. ³⁷Sequiatio cutinda ra ñee seje cote. “¿Manose mbae uremee ndeje nderiãcuã mose re? ¿Manose ureso nembiu ndeisei mose re? ³⁸¿Manose ure ndeisi turã ndechuchua eã mose re? ¿Manose tiru uremee ndeje ndeirao eã mose re? ³⁹¿Manose ureso mae nderese nderasi mose re? ¿Manose ureso mae nderese ndeico mose cárcel re?” i tuchi ra ñee seje. ⁴⁰Aque mose ra acheẽ ee. “Tacheẽ nyecua jėje. Senongue mo mbaech a reã ndaque. Ae turã jęsaã senongue mo je nae, seje eraã naanguia chõ ũquĩ nde”, ae ra ñee ee. ⁴¹Acheẽ nda sequiatio cutiã quitinda je cote. “Jęso sesi. Mbae turã nda jęisiã seo jenda. Jęso tata cuásuu. Ae Dios chiao tata, diablo mbasi sacua. Diablo rimb a abe mbasi sacua. ũquĩ tata ra uqueã mbei. ⁴²Seriãcuã mose que mbae mo jemee eãte seje ra. Seisei mose que sembiu eãte no nda. ⁴³Sechuchua eã mose que seisi turã eã nda. Seirao eã mose que tiru jemee eãte seje ra. Serasi mose que jęso eãte mae serese ra. Seico mose cárcel que jęso eãte mae serese no nda”, ae ra sequiatio cutiã quitinda je. ⁴⁴Sequiatio cutiã quitinda ra ñee seje cote. “¿Manose mbae mo uremee eã ndeje nderiãcuã mose re? Ndeisei mose abe no. Ndechuchua eã mose abe no. Ndeirao eã mose abe no. ¿Manose uresoã nderea nderasi mose re? ¿Manose uresoã nderea ndereco mose cárcel nde no?” i ra sequiatio cutiã quitinda ñee seje. ⁴⁵Acheẽ nda ee. “Mbae turã jęsaã eã mose emo je, seje eraã eã naanguia chõ ũquĩ nde”, ae ra sequiatio cutiã quitinda je. ⁴⁶ũquĩ nda nyoĩ ja tata cuasu cote. Huee ra mbae rasi raã mbei tuchi cote. Sequiatio cutinda quia ra siqui turã mbei ibate cote, i que Jesús ñee nda.

Jesú nandeisi tarõ, i ja ererecua nyue

26 ¹Aquere que Jesús ñee uchimbaaquiato je cote ra. ²—Dos días mose ra fiesta de la pascua cote. Aque mose ra mbia icuã semee ererecua je seiquia sacua, i que Jesús ñee nda. ³Sacerdote rerecua que ñumunua ja cote ra. Amei ja rese. Embesasa rese abe no. ũquĩ ngue ñumunua ja u Caifás itaicuee ra. Caifás rei sacerdote rerecua tuchi. ⁴Caifás itaicuee que ũquĩ nyi ñee ñee Jesús riĩ nda. —Jesús nandembĩrĩ irĩ ję. Eisi sacua. Etarõ sacua. Eiquia sacua cote, i que u ñee ñee nyue ra. ⁵—Fiesta mose eã ño nandeisi ję. Mbia ra paama i tuchi nande je, i que u ñee ñee nyue ra.

Cuña mo aba mbusimbusa turā ichusē Jesús āquī ndese

⁶Jesús que siqui Simón Leproso chuchúaa ra. Betania, i que hue je ra. ⁷Cuña mo ngue tu erea hue ra. Aba mbusimbusa mo ngue equeru Jesús je ra. Embisē tuchi que equeru ra. Mbae isiquia mumbasa tuchi que ũquĩ nda. Ichusē ja que Jesús āquī ndese equiaru mose ra. ⁸Echimbaaquiātu que chi ja mae erese ra. Paama i que cuña je ra. ⁹—¿Mbaerā eichusē ñooño nde? Mbae isiquia ribishorō ño nda aba emondo re. Mbaecha reā je emee mee sacuā, i que echimbaaquiātu ñee nyue ra. ¹⁰Jesús que echeē ñandu ra. Ñee ngue ee ra. —¿Mbaerā jëingo ñee ũquĩ nde? Sā cuña ae riqui ae. Ae esaā seje nae, eturāte seje ũquĩ. ¹¹Mbaecha reā nguia ra chi arete íbii a. Se quia nda aico bei eā nguia jendese aa. ¹²Seati nonde chō ngue cuña aba mbusimbusa ichusē nguia serese. ¹³Tacheē nyecua jêje. Mbia Dios cheē turā nenei nenei mose mangue chooñoa jenda ja je, cuña nyisaā abe ra esenei senei. Mbia ndua turā ja sacuā echisaā abe rese, i que Jesús ñee uchimbaaquiātu je ra.

Jesús tamee jêje, i Judas mbia icuā je

¹⁴Judas Iscariote, i rei que Jesús chimbaaquiātu mo je ra. Aque que oso ñee sacerdote rerecua je ra. ¹⁵—Jesús tamee jêje. ¿Mbae ra jemee seje eribishorō nde? i que Judas ñee sacerdote rerecua je ra. Sacerdote rerecua que mbae isiquia ata mee ee ra. Treinta que ra. ¹⁶—Mbia eāsa quiātu Jesús tamee jêje, i que Judas ñee ee ra.

Jesús quiaru uchimbaaquiātu rese

¹⁷Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatā iriā ngue eu eu quia aque mose querabe no nda. Fiesta nonde que echimbaaquiātu ñee Jesús je ra. —¿Mangue ra oveja urembuchi mangue ndechiurā nde? i que ñee Jesús je ra. ¹⁸Jesús que ñee ee ra. —Jëso sucha cuasu. Jeñee aque je. “Jesús que urembu ñee ndeje ra. ‘Ndechuchua oveja tau sequiato rese semana nonde’, i que Jesús ucheē mbu ndeje ra”, jenye aque je, i que Jesús ñee nda. ¹⁹Echimbaaquiātu que nyoĩ erea Jesús cheē nguire ra. Oveja que embuchi huee cote ra.

²⁰Itondaru ramo mose que Jesús chi quiaru uchimbaaquiātu rese huee cote ra. ²¹Quiaru mose que Jesús ñee ee cote ra. —Tacheē nyecua jêje. Jemo nda semondo mbia icuā je, i que ñee uchimbaaquiātu je ra. ²²Echimbaaquiātu ia eā tuchi que echeē mose ra. —¿Se ra aremondo ee re? i ja jate que ñee Jesús je ra. ²³Jesús que ñee ee ra. —Ae chĩ quiaru serese aque plato ye sí a nae, aque tuchi ra semondo mbia icuā je. ²⁴Dios cheē ndui sí tuchi ra amano ndaque. Ae ra semee mbia icuā je, aque ra mbae rasi saā tuchi quia. Aba mbia eā tuchi ra aque. “Taĩ sembuchecua

jirichĩ nguia curi”, i chee ra aque, i que Jesús ra. ²⁵—¿Se ra aremondo mbia icuã je re? i que Judas ñee Jesús je ra. Jesús riĩ ñeende mbia icuã je nyii. “Ae” i que Jesús echeẽ mose ra.

²⁶Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Ã mbichae jẽu. Serete chõ ã nde, i que Jesús ñee ee ra. ²⁷Vino mbeisa que esirõ cote no nda. Gracias i que Dios je ra. Mondo que uchimbaa quiatu oo cote ra. —Jembei mbei ja. ²⁸Seruqui chõ ã nde. Mbia icuã mbutiã sacua ño seruqui re. Dios cheẽ yasu rui si chõ seruqui riqui nguia mbia icuã mbutiã co. ²⁹Tacheẽ nyecua tuchi jėje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguia jendese cote, i que Jesús ñee nda.

Jesús aicuayãte resẽ, ichõĩño nda Pedro seriĩ, i Jesús

³⁰Frãsei rãsei que cote ra. Nyoĩ que Monte de los Olivos ra. ³¹Jesús que ñee uchimbaaquiãtu je ra. —Jẽireĩ ireĩte ra seriĩ co isa. Jeñimboseĩ mboseĩ nda oso serecha co isa. Sã embesa ji riqui ñee no: “Dios ra oveja raarõsa iquia. Oveja ra ñimboseĩ nyoĩ cote”, sã embesa ji riqui i no. ³²Seraaque quera sire ra aso se rane jendarõ Galilea, i que Jesús ra. ³³Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã mbei ndesi, i rei que Pedro ñee ee ra. ³⁴Jesús que ñee ee ra. —Tacheẽ nyecua ndeje, Pedro. Nguira cheẽ nonde ra erecheẽ ñoño tres veces seriĩ namo, Pedro. “Jesús aicuayãte resẽ”, ere chooño ño nda seriĩ, i que Jesús ñee ee ra. ³⁵Pedro que ñee ee ra. —Mbia seiquia arõte raque nderiĩ, acheẽ ñoño eã nda nderiĩ, i rei que Pedro ra. Eĩ ja que ñee nda.

Jesús ñee ngu je

³⁶Jesús que oso Getsemaní cote ra. Uchimbaaquiãtu rese. —Jengoi rã u aa. Taso rã ñee Paba je pe jiri se, i que Jesús ee ra. ³⁷Pe quti jiri que Pedro rerao ra. Zebedeo riirĩ nyeremo ndese. Eya eã ndasi tuchi que tu ee aque mose ra. ³⁸Ñee ngue ùquĩ je ra. —Seya eã ndasi tuchi aico co. Seya eã ndasi ra seiquia chee. Jenguchõ na jẽ aa. Jẽtesa tesa bei u aa, i que Jesús ñee ee ra. ³⁹Jesús que oso pe quti jiri cot e ra. Nyibi que u ngũfã ndese ñee Dios je ra. —Paba, ùquĩ ndasi asaã sereãte raque quia co. Ae sebite riqui nae, ùquĩ ndese semingo eã. Ae ndebite riqui nae, ùquĩ ndese quiãtu semingo, i que Jesús ñee Dios je ra. ⁴⁰Nyebi que u uchimbaaquiãtu je cote ra. I que eu uque ja ee cote ra. Ñee ngue Pedro je ra. —Jẽingo areã ñochĩ tesa serese se ñee mose Dios je. ⁴¹Jẽtesa tesa u. Jengue eã u ñee Dios je. Mbae icuã tã i eã sacua jėje. Jẽingo serete raque serese. Mbae icuã nguia jembuti mbutite nguia, i que Jesús ee ra. ⁴²Oso que ñee Dios je pe jiri cote ra. —Paba, nde ñee mose seje, “mbae rasi ra eresaã” nde i mose seje, asaã nda se, i que ñee Dios je ra. ⁴³Nyebi

que u uchimbaaquiato je cote ra. I sí que u uque ee no nda. Eresa quiatu ngue eshiu shiute nguiã. ⁴⁴Jesús que osobe erecha ñee Dios je ra. Tres veces que aque cote ra. Hue rĩ sí que ñee Dios je ra. ⁴⁵Uchimbaaquiato jii que esi ñee ee cote ra. —Jengue cote. Jenguenea jẽucua cote. Semondo ra mbia icuã je cote. Seiquia sacua. ⁴⁶Jẽhuã cote. Nyao cote. Ae ra semee mbia icuã je, co eru quia semee sacua co cote, i que Jesús uchimbaaquiato je ra.

Mbia icuã Jesús isi suruchoi

⁴⁷Jesús cheẽ mosebe tuchi que Judas ru erea ra. Jesús chimbaaquiato rei que ae ra. Aque rese que mbia cuaẽ tuchi quia ra. Tiquise abe que ecurucuaẽ nguia ra. Ira jua abe no. Sacerdote rerecua chõ ùquĩ mbucuaẽ nguia reaẽ. Amei abe. ⁴⁸Judas ñee nyecuayã nguiatu quia ùquĩ je nyii reaẽ. —Ae ritii ra asiite, aque chõ ñene. Aque jẽisi serao, i quia equia ee nyii reaẽ. ⁴⁹Jesús riichã ngue esi saludar i ee cote ra. Jesús ritii que esiite ee cote ra. ⁵⁰—¿Mbaerã erechu serea re? i que Jesús ee ra. Mbia que ngaẽ Jesús isi ecua cote ra. ⁵¹Ùquĩ mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra. ⁵²Jesús que ñee ee ra. —Ndechuuru emingue chõ eriru ye. Nde emo nyiisha mose tiquise je, nde abe ra emo ndeisha. ⁵³¿Ndeiranuate ángeles rese re? Se ñee mose Paba je, ángeles tubiriã tuchi nda embu seje re chaẽ. Sereaquiato sacua. ⁵⁴“Ángeles embu rã sereaquiato”, ae eã nda Paba je. Ùquĩ mose ra embesa ji ique eã cote. Sã embesa ji riqui ñee no: “Mbae rasi ra esaã tuchi” i no, i que Jesús ñee Pedro je ra. ⁵⁵Jesús que ñee mbia ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoĩ jenyuchĩ nguia serea co. Tenda que amumba mumba beite rei quia jendese Dios chuchua resẽ. Mbia que ambaaquiato quiato bei rei quia huee resẽ. ¿Mbaerã seisiã nyucua aque mose re? ⁵⁶Embesa ji ique sacua ño jẽicuã icuã ndiqui nguiã seje ã, i que Jesús ra. Echimbaaquiato que nyoi ja chee uchã Jesús recha ra.

Jesús mbia curuchoi mbia rerecua je

⁵⁷Ae Jesús isi nae, ùquĩ ngue ecuruchoi sacerdote rerecua je ra. Huee que embesasa chi ja ñumunua nda. Amei ererecua ja abe. ⁵⁸Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Huee que ngoi sacerdote rimba mo ndese ra. —Mañi nda mbia Jesús je reae, i que huĩ ngoi eraarõ arõ nda. ⁵⁹Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandeiquia, i rei que ñee ñee nyue ra. —¿Mbae i ra aba mbia je Jesús riicharã nde? i rei que u ñee ñee nyue ra. ⁶⁰Emo emo ngue ngaẽ ndei ñee icuã icuã Jesús rĩ nda. Ùquinde que mbia nyeremo ngaẽ ñee ñooño Jesús

riĩ nda. ⁶¹—Jesús que ñee ñooño Dios chuchua riĩ nda. “Dios chuchua ra ambucoi. Tres días mose ra achaobe”, i que urechandu Jesús cheẽ nda, i que ùquĩ ñee ñooño Jesús riĩ nda. ⁶²Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderiĩ nde? i que Jesús je ra. ⁶³Jesús que ñee eã mbei echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? Díosaa echeẽ ure je, i que sacerdote rerecua ñee ee ra. ⁶⁴Jesús que ñee ee ra. —Ae. Dios rucucha chõ se re. Tacheẽ nyecua jėje. Jemae nda serese se coi mose Dios quirãcuã jii. Sechu mose abe ibeishĩ ndese, i que Jesús ee ra. ⁶⁵Sacerdote rerecua que paama i tuchi Jesús cheẽ mose ra. Huiirao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiirandube eã cote. Nandemae ndei ngue erese re. ⁶⁶¿I jėje re? ¿Mañi nande ra equia re? i que sacerdote rerecua ñee ererecua ataque je ra. —Eicua tuchi que ra jẽ. Sã mbia eiquia, i jate que ererecua ñee Jesús riĩ nda. ⁶⁷Mbia que ñinimbu nimbu Jesús ruba rese cote ra. Ucuu ucuu abe que erese ra. Emo emo ngue eritii mbeete ete o je ra. ⁶⁸Ñee ngue ee ra. —“Cristo chõ se re”, ere ñi equia. Aba chõ ucuu nderese chã. Ma eicua no, i que mbia ñee icuã icuã ee ra.

Jesús aicuayãte reseẽ, ichõiño Pedro

⁶⁹Pedro que chĩ mbeite ngoi itaicuee ra. Nyucuaaque mo ngue tu ñee ee mbia rimba mo nda. —Jesús resenda que nde abe ra. Galilea jenda, i que nyucuaaque ñee ee ra. ⁷⁰Pedro que ñee ee ra. —Tei. Ndecheẽ aicuayãte, ichõiño ngue Pedro mbia résaa ñee ee ra. ⁷¹Pedro que oso quia eiquesa cuti cote ra. Nyucuaaque nongue que ñee mbia je eriĩ nda. —Co abe que Jesús resenda ra. Nazaret jenda, i que ñee mbia je ra. ⁷²—Tei. Jesús aicuayãte, ibe que Pedro ñee icuã ee ra. ⁷³Ae chi huee nae, ùquĩ mo ngue ñee Pedro je cote ra. —Jesús resenda chõ nde abe resẽ. Ndecheẽ aba chiicuate resẽ, i que ñee ee ra. ⁷⁴Pedro que jurar i tuchi ñee ee ra. —Aicuayã tuchite se resẽ, i que ñee ñooño nda. Aque mose tuchi que nguira ñee cote ra. ⁷⁵Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nonde ra erecheẽ ñooño tres veces serĩ, sã Jesús i ee nyii no. Ùquĩ ndese que Pedro ndua cote ra. Nyebe esi nguia usẽ nyeseo tuchi.

Mbia Jesús curuchoi Pilato je

27 ¹Nyaashĩ namo mose que sacerdote rerecua ndua hue rĩ ja ra. Amei mbia rerecua ja abe no. Hue rĩ ja ndua Jesús iquia sacua. ²Jesús que echucua suruchoi Pilato je ra. Pilato rei mbia rerecua, hue jenda ja rerecua.

Judas uchoso mumbi nyiiquia

³Mbia ra Jesús iquia, i mose Judas je, eya eã tuchi que ùquĩ mose ra. —Jesús amee jirichĩ nguia mbia je, i que ra. Nyebe mbae isiquia mondobe

nguiã sacerdote rerecua je. Amei ererecua je abe no. ⁴—Mbae icuã tuchi asaãchĩ. Jesús seteã tuchi ameechĩ jêje. Eiquia sacua, i que Judas ñee nda. —Nde quia rei. Ure eã ñene, i ja que ererecua ñee ee ra. ⁵Judas que mbae isiquia mbaba asi mombo mondo íbii ra. Dios chuchúaa. Oso que uchoso mumbi nyiiquia cote ra. ⁶Sacerdote rerecua que mbae isiquia sirõ ibi si cote ra. —Mbia ribishoronda chõ ã mbae isiquia re. Nyebe nandemondo eã ofrendarã, i que ñee ñee nyue ra. ⁷Aquere que sacerdotes ibi mo isi aque mbae isiquia je ra. Ibi mo ngue eisi mbiamo tiquia tiquia sacua nda. Nionga, i que hue ibi je ra. ⁸Nyebe eriqui nguiã “mbia ruqui rua” i bei hue je. Namonyee. ⁹Aque mose que Jeremías ñimbese ique cote ra. Ñ ndei Jeremías ñimbese ã:

Ũqui mbae isiquia treinta que eisi cote ra.

Ũqui ndei mbia ribishoronda ũqui.

¹⁰Ũqui mbae isiquia que emondo hue ñionga ribishorõ cote ra.

Dios ñee guia eriñ seje nyi nae, ũqui ndui si,
i que Jeremías embese cose ra.

Pilato ñee Jesús je

¹¹Mbia que Jesús curuchoi Pilato je cote ra. Pilato que ñee ee ra. —¿Judíos rerecua chõ nde re? i que ee ra. —Ae. Judíos rerecua chõ se re, i que Jesús ee ra. ¹²Sacerdote rerecua que ñee icuã ja Jesús je ra. Amei ererecua abe no. Jesús que ñee ãte echeẽ mose ra. ¹³—¿Erechanuãte equia ñee mose nderiñ nde? i que Pilato ñee Jesús je ra. ¹⁴Jesús que ñee ãte echeẽ mose ra. Nyebe Pilato nyuruira tuchi nguiã echeẽ eã mose.

Jesús jëiquia mbucha ira rese, i ererecua

¹⁵Pilato que mbia tarõ ji mo mbusẽ mbei quia pascua mose ra. Co mii ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra. ¹⁶Barrabás, i que etarõ ji mo je ra. Mbia chiicua tuchi que ae ra. ¹⁷Mbia ñumunua ja mose que Pilato ñee ee ra. —¿Aba ra ambusẽ mondo jêje re? ¿Barrabás ra re? ¿Jesús ra re? i que Pilato ñee ee ra. ¹⁸—Sacerdote rerecua riqui paama i choõnote Jesús je ã, i quiatu que Pilato ndua ndua uchiangui re ra. ¹⁹Pilato que chĩ ngoi ndua ndua ngüenda tose ra. Eninisi que ucheẽ mondo ñee ee ra. —Ehui chõ Jesús si jẽ. Mbae icuã ngue esaã eãte resẽ. Atea que seque re isa ra jẽ. Seque re icuã tuchi que aa ra jẽ, i que Pilato ninisi ñee ngu je ra. ²⁰Sacerdote rerecua que ñee mbia ja je ra. Amei ndese. —Sã Pilato Barrabás mbusẽ mondo. Sã Jesús quiatu iquia, i que ererecua ñee ja mbia je ra. Nyebe mbia “eno” i chee ee. ²¹Pilato que ñee si mbia je ra. —¿Aba ra ambusẽ mondo jêje re? ¿Jesús ra re? ¿Barrabás ra re? i que Pilato ra. —Barrabás embusẽ mondo i que mbia ee ra. ²²—¿Mañi ae quia ra Jesucristo je re no? i que Pilato ra. —Embucha

ira rese, i ja que mbia ñee ee ra. ²³—¿Mbae icuã esaã nde? i que Pilato ee ra. —Embucha ira rese jẽ, ibe que mbia tasẽ tasẽ ee ra.

²⁴—Mbia riqui “Jesús eiquia” i i tuchichĩ, i que Pilato ndua ndua ra. —I mo embu seje, i que mbia je cote ra. Nyoï que mbia résaa cote ra. —A aico nyoï a. Se ra Jesús aiquiyã. Eseteãte quiatu ngue re. Jẽ nguiatu jẽingo erese, i rei que Pilato ñee mbia je ra. ²⁵Mbia que ñee ja Pilato je ra. —iEiquia jẽ! Eicuãte que eriqui ra jẽ. Dios ra paama i eã eiquia mose. Dios paama i mose, sã ure je quiatu paama i. Ureirĩ je abe no, i jate que mbia Pilato je ra. ²⁶Pilato que Barrabás mbusẽ mondo cote ra. Jesús cuasa quiatu que chiño nda. Pilato que Jesús iruã nua cote ra. —Jembucha iquia ira rese, i que ñee soldados je cote ra.

²⁷Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama nda. ²⁸Jesús irao que embui esi ra. Tiru ireĩ nguiatu ngue emingue nguiã ee cote. ²⁹Nyu ritiméi uma ji que emii eãquĩ ndese corona nda. Ira ñetẽ mo abe que emondo éoo ra. Ngoi ja que u ngúfã ndese Jesús nonde ra. Ñee icuã icuã ngue u eriĩ nda. —Judíos rerecua tuchi chõ nde re, ichõiño ngue soldados Jesús je ra. ³⁰Ñinimbu nimbu abe que erese ra. Ira abe que euru uru eãquĩ ndese no nda. ³¹Jesús rimba que esaã saã ee no nda. Iquia iquia que ee no nda. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

³²I rei que echoi quia ra. Mbia mo ngue esobeishĩ nda. Simón, i equia ee. Cirene jenda que ae ra. —Cruz echa rã Jesús mbucha sacuã pe, i que soldados ee ra. Nguerao que ee cote ra. ³³Ngasẽ ngue pee cote ra. Gólgota, i que hue je ra. Eresa cuare, i chõ nguiã hue je. ³⁴Huee que vino ñimocondo tuchi mo mondo Jesús je ra. Ubi rei que erese ra. Aquere que embei eã cote ra. ³⁵Soldados que Jesús mbucha ira rese ra. Aquere que sita ñetẽ mbaba mbaba o je cote ra. —Aba ra Jesús irao querao ñi ja, i que nyue ra. Aque mose que embesa ji cheẽ ique cote ra.

Seirao que embuchao chao nyue ra.

Sita ñetẽ mbaba mbabare o je,

i que embesa ji ra. ³⁶Aquere que soldados chi ngoi Jesús raarõ cote ra. ³⁷Mbia que letrero mii Jesús ãquĩ nguiti ibate ra. JESUS REI JUDIOS RERECUA, i que embesa mii nda. Ûquĩ nii ño eriqui nguiã eiquia hue. ³⁸Mbia nyeremo abe que embucha ira rese Jesús chabe ra. Jesús rereco chobei que emii ira rese ra. Mbae mbuquiachãsa tuchi que ùquĩ nda. ³⁹Mbia que iquia iquia chõ nguia echeẽ naa naa ecuã nda. Ñee icuã icuã ee. ⁴⁰—“Dios chuchua ra ambucoi. Tres días mose ra ambuchuruambe” ere que equia. Ndequiracuã tuchi mose, equichi u hue si. Nde Dios rucucha mose, equichi u cruz si, i tuchi que mbia quia iquia iquia ee ecuã mose ra. ⁴¹Sacerdote rerecua abe que iquia iquia chõ

nguia ee ra. Embesasa abe no. Amei ererecua abe no. Ñquĩ nguẽ ñee icuã icuã ja quia erĩ nda. ⁴²—Mbia que embuquera quera rei nyii ra. Ae si quia quera aroneate nguia aque. Judío rerecua mose ae, sã ae ae nguichi ira si. Ñ nda ureicu a cote, i ja que ererecua ñee icuã icuã e erĩ nda. ⁴³—“Dios aicuate”, i que equia, sã Dios ae embuquichi eya mose erese. “Dios rucucha rei se” i que equia, i ja que ererecua ñee icuã icuã erĩ nda. ⁴⁴Ae mbuchai chi ira rese mbae mbuquiachãsa nae, ñquĩ abe que ñee icuã icuã nyee ee ra.

Jesús mano cote

⁴⁵Tenda nandeite re mose que itondaru ru ra. Itondaru bei que mbia ja je tres horas ra. ⁴⁶Tenda cheseco mose que Jesús ñeemombo cote ra. — Elí, Elí, ¿lam a sabactani? i que ñeemombo ra. —Dios sererecua, ¿mbaerã ereico hui sesi re? i chõ nguẽ ñee nguia. ⁴⁷—Elías je eriqui “quiatushu” i reae, i rei que echeẽ andusa mo nda. ⁴⁸Aque mose tuchi que emo esponja monde vinagre ye ra. Ira ai rese que embia ji mondo rei Jesús chúruu cote ra. ⁴⁹—Esecha rei. ¡Sã Elías ruãte quia eera! i que eataque ñee ee ra. ⁵⁰Jesús que tasẽ mano mbei cote ra.

⁵¹Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. Ibi que nyere nyere cote ra. Sita abe que nyisia sia nyibite bite rĩ nda. ⁵²Mbia tãsa mo abe que nyeequia equia ra. Dios quiato raaque mo nguẽ quera quera ra. ⁵³Jesús quera si mose que ñquĩ ndaaque usẽ nyoĩ cote ra. Nyoĩ que Jerusalén cote ra. Mbia tubirã nguẽ mae u erese ra. ⁵⁴Soldados rerecua que chí mae Jesús rese ra. Soldados abe no. Ñquĩ nguẽ siquichete Jesús mano mose ra. Ibi chere mose. Mae mose mbae ja rese. — Dios rirĩ ño eriqui re, i jate que soldados ñee erĩ cote ra.

⁵⁵⁻⁵⁶Cuña nguẽ chí jate mae Jesús rese isho ra. María Magdalena abe que chí huee ra. María abe no. María rei Jacobo si. José abe si. Zebedeo rirĩ si abe que chí erese huee ra. Ñquĩ nguẽ siqui bei quia Jesús rui ra. Echiurã nguẽ emii mii mbei quia ee ra. Galiléaa eico mose bei.

Mbia Jesús raaque chati cote

⁵⁷José, i que mbaecha mo je ra. Arimatea jenda rei ae. Jesús quiato que ae ra. Tenda ireĩ mose que esi ñee Pilato je ra. ⁵⁸—Jesús raaque emee na seje, i que oso ñee Pilato je ra. Pilato que “eno” i ee ra. ⁵⁹José que eraaque curuchoĩ cote ra. Numa nguẽ tirushĩ mo je ra. ⁶⁰Jesús raaque que eiti suruchoĩ sita ribicoĩ ji imi ye ra. José chisaã ye. Nyati rei que sita cuasu mo je cote ra. Nyoĩ que erecha cote ra. ⁶¹María Magdalena nguẽ chí ngoi mae Jesús atisa rese ra. María rese.

Soldados Jesús raaque atiquia saarõ u

⁶²Isamami nguẽ sacerdote rerecua choi ñee Pilato je ra. Fariseos abe no. Sábado isamami nguẽ ra. ⁶³Ñquĩ nguẽ nyoĩ ñee Pilato je Jesús rii nda.

—Urendua nduachĩ nguiã ñeeñoño je rese. “Tres días mose ra aquera si”, i que equia mano nonde ra. ⁶⁴Soldados emondo rã eatiquia raarõ. Sã echi bei tres días eraarõ huee. Ñ nda echimbaaquiatu eraaque siroã suruchoi. “Quera si que ra” iichĩ nda ñee ñooño mbia je jê! Ûquĩ mose ra mbia mbiiĩ irĩ tuchi cote, i que ñee Pilato je ra. ⁶⁵Pilato que ñee ee ra. —Soldados jendao rã. Eraaque raarõ tuchi sacua, i que ee ra. ⁶⁶Soldados que ecuruchoi Jesús atiquiaa cote ra. Eiquesa aronda que ematã tuchi cote ra. —Jësaarõ tuchi jê, i rei que soldados je cote ra.

Jesús raaque quera si

28 ¹Jesús raaque ati ji que chibe sábadó mose ra. I nyaashĩ oso quia domingo mose, aque mose que cuña mo nyoĩ mae eatisa rese ra. María Magdaalena, i que emo je ra. María, i que enongue je ra. ²Aque mose tuchi que ibi nyere nyere ee ra. Angel ibatenda mo nguia tu quia eatisa mbuquiata reaẽ. Sita eatiquia que ecuruba ra. Ngoi que etose ra. ³Enininya tuchi que chĩ ngoi ra. Ama pirirã pirirã i rã tuchi que ra. Eiraoshĩ tuchi que chĩ nda. ⁴Soldados que titi titi i tuchi chõ mae ùquĩ ndese ra. Emundi tuchi que ra. ⁵Angel que ñee cuña je ra. —Jësiquiche quichechĩ nguiã. Jëingo raque Jesús raaque requia ã. ⁶Emoate aa resẽ. Eraaque que quera si no. Ucheẽ ndui si que quera resẽ. Jenyu rei mae eatisa rese ae. ⁷Jëso asi rã echimbaaquiatu mbiirandu equera si rese. “Jenonde ra esi Galilea. Jemae nda erese huee”, jenyembiiirandu. Ûquĩ ae chõ ngue u nguiã jêje, i que ángel cuña je ra. ⁸Cuña ngue siquichete echeẽ andu ra. Eyate abe que ra. Uchã ndei que echoi quia Jesús chimbaaquiatu mbiirandu ra. ⁹Ñeenda cúa chõ ngue Jesús nyecua saludar i ee ra. Cuña ngue nyoĩ oo erese ra. Jesús i que equiaama ama nda. ¹⁰Jesús que ñee ee ra. —Jësiquichechĩ nguiã sesi. Jëso ñee seresenda je. “Jëso rã Galilea. Hue ra jemae Jesús rese”, jenyemo ee, i que Jesús ñee cuña je ra.

Soldados ñee ñooño Jesús raaque riĩ

¹¹Soldados eraaque raarõsa que nyoĩ sacerdotes rerecua mbiirandu Jesús quera rese ra. Ae rese mae nae, ùquĩ ngue esenei ja ee ra. ¹²Sacerdotes rerecua que nyoĩ ja ñee amei ererecua je cote ra. —¿Mañi nande ra equia mbia jiranuã sacua Jesús quera rese re? i que ererecua ndua ndua hue rĩ ja ra. Nyebe mbae isiquia mee nguiã soldados je, ñee ñooño sacua mbia je. ¹³—Jënee ñooño mbia je jê. “Ureque mose Jesús resenda eraaque suruchoi rei sirõ”, jenyechooño mbia je jê. ¹⁴Pilato jirandu mose jendese, urecheẽ nda ee. Paama iã nda jêje chã, i que ererecua ñee ja soldados je ra. ¹⁵Soldados que mbae isiquia isi cote ra. Ñee ñooño tuchi que mbia je cote ra. Nyebe judíos riqui nguiã ñee mbei ã cote. —Jesús chimbaaquiatu que eraaque sirõ cose ra, nyebe eriqui nguiã i bei ã cote.

Jesús uchimbaaquiatsu mondo mbia mbiirandu

¹⁶Jesús chimbaaquiatsu once que nyoi ja Galilea ra. Ibi ibate mo ngue echoi Jesús cheẽ nguire ra. ¹⁷Jesús que nyecu a ee huee ra. Jesús rese mae mose que ngoi ngũĩã ndese ñee ee ra. —Jesús eã ño co reae, i rei que emo emo ñee uchiangui re ra. ¹⁸Aquere que Jesús si eriichã ñee ee cote ra. —Sequirãcuã tuchi chõ se re. Se rei ibi jenda rerecua ja. Ibatenda abe rerecua ja. ¹⁹Jẽso mbia mbaaquiatsu quiatsu ja seriĩ. Mbia mangu chooñoa jenda ja. Bautizar jenyee ee Paba riĩ. Seriĩ abe. Espiritu Turã nii abe no. ²⁰Jembaaquiatsu quiatsu tuchi secheẽ nii. Ae asenei senei nguia jẽje nae, ũquĩ jẽsenei senei ja ee. Secheẽ mumbayã sacuã. Aico bei ra se quia jendese. Mbae ua j a chee, i que Jesús ñee ee ra. Amén.